

TOONNYAK

Kaal O Agɔɔn Toonnyawa

1 ¹Laɗo Tipoliz, baale rak keteyeeda warage oma ci akati liɗliɗon o Yesu ki demziin onin dook iinyaye o ɗaan akanan niini liɗliɗon e zee been iiten baal akuli Jooi nɔɔnɔ akɔyi tamma e. ²Mazi ɗaan rak niini kook tamma e, iricanek niini dɔyize o Vɔɗiz o Joowo toonnyak ogin baal aɗera e kaal ci ka kutuguzo niigi. ³Ma vurte e itinɗawi niini daayiza e, avu rak loota iinya eet ram, ma ayelzak ele nɔɔgo lak ci meelik ka kagaac niigi nɔɔnɔ urugun didi. Icinit niigi nɔɔnɔ, ma buk azɔɔz niini ki nɔɔgo zɔɔz ci akati baliin o Joowo. ⁴Mazi avo alote niigi dook ɗaatodoi, iricanek niini nɔɔgo zɔɔz ci anek ne, “Má uunɗu Jerusalem, bar ereyo ɗinaante zee ma akunakuɗ Vɔɗizi o Joowo baal aterkedekuɗ Jooi igeet baal kaduwakuɗ e. ⁵Baale Jɔn oony ol maami doon, bar tiɗeere niiga iinyaye ci miliny avu neke oonyenu Vɔɗize o Joowo.”

Itiɗa Yesu ook tamma

⁶Mazi avo alote toonnyawa ki Yesu iitene oman, ijinit niigi nɔɔnɔ enektek ne, “Manyi, ma dim inoko ize niina alaan ci abal ol o Israyil neen ka tɔk akuma o Rom?”

⁷Ma anek Yesu nɔɔgo ne, “Alaɗ een nici zɔɔz cunooɗ, bar zɔɔz ci baaba doon o anyan aneet ka kabal Israyil. ⁸Zin tiɗeere ma iyyayɗ Vɔɗizi o Joowo, ɗaan anyuɗ niini igeet dɔyiz ka iziti niiga bacok cigan Jerusalema ki Judiya ki Samariya zee been viten ci akani tammu zɔɔ looc e.”

⁹Mazi ɗaan azɔɔz nɔkɔ icinit niigi nɔɔnɔ iɗaaz akɔ ki tammu taden nɔɔgo keberen nɔkɔ zee makacin ibiil diizoc alaɗaan acin bodo.

¹⁰Mazi ɗaan agelem niigi tammu taden nɔkɔ, bar acin ol ceen ram anyak rumanɛ ci vɔɔrik eel nɔɔgo kɔrgena. ¹¹Ma anek niigi nɔɔgo ne, “Ol o Galili, eelnu agelemnyu tammu taden nɔkɔn? Yesu ci acinu niiga akuli Jooi akɔyi tammu tadena noko, abada bodo katin icinit kiyo acinu akɔ tamma noko.”

ɗeryan o Matiyas

¹²Agooni kaala nicaga biye o kazi Kiriɗoc aɗɔɗɔz Jerusalem. Ma vurta ivitak niigi Jerusalem. ¹³Mazi avo arum ɗinite, zɔɔ ceeze uneen ataadonek gon tadena Ma ol nicigi awoyi Pitɔr, ki Jɔn, ki Jemis, ki Andoru, ki Pilip, ki Tomaz, ki Bartalamu, ki Matiyu, ki Jemis ween ɗeerti Alvayoz, ki Saiman baal gɔɔn oorine ol ogin akumawe o Rom e, ki Judaz ween ɗeerti Jemis. ¹⁴Gɔɔn tup nɔkɔ alote niigi ɗaatodoi aɗarye. Ma buk arome niigi ki ɗaai koogi, kibeen Meri yaati Yesu, kibeen gɔɔnɔgi Yesu.

¹⁵Ma iinyaye ogen olote ol o agama Yesu. Ma alotai ol ceen eet torgerem (120). Itiɗa ni Pitɔr nɔɔgo kɔrgena ma anek ne, ¹⁶“Gɔɔnɔga, zɔɔz o warage o Joowo akɔ zee ayelzai kibil tɔ didi. Baale uduwa Vɔɗizi o Joowo ɗaati Devid zɔɔz ci akati Judaz baal ayita ol o avu agam Yesu e. ¹⁷Ma Judaz baale laadun niini eet cinai, eeci eɗera waanice Yesu nɔɔnɔ ka kilirliɗ kibeen ageet. ¹⁸Agayu niiga Judaz waanice ataala mana guruce baal anyek ol nɔɔnɔ ka keyeleke niini nɔɔgo Yesu e. Ook zin waanice acabek niini alem keet mane nico, ma iina keet tadena kereece keɗ kudunta koloktena, ma adaai. ¹⁹Iziyit zin waanice ol o abaak Jerusalema dook zɔɔz nico. Ma akanek niigi mana nice zaar ci kazi ne Akeldama. Ma keɗ ci zaar nicoko kazi ne mana ci biyetu.” ²⁰Ma azi Pitɔr bodo ne, “Ayeet baale Devid waragewe o beniinowu zɔɔz ci akati Judaz azi ne, “Een katin ceez cine lik kɔkɔm eet ci abaayi.”

Ma buk ayeedi gi ci azi ne, “Abon arigiz ɗintin o eeti oman.”

²¹⁻²²Zin giye nico abon kaɗera eet oma ole baal karome ki ageet iinyaye baal ɗaan aave Manyi Yesu ɗaatinai e, akanai iinyaye baal oonyi Jɔn nɔɔnɔ e, zee been iiten baal akɔyi niini tamma e. Abon kaɗera eet nico ka kizi bacoɗ buk ki ageet ci aduwak ol ɗaazi o Manyi Yesu daayiza.”

²³Eɗerta ni niigi ol ram. Codoi kazi zaar ne Matiyas. Bodo codoi kazi zaar ne Josev o kazi Justus Barsabas. ²⁴⁻²⁵Ma aɗarye niigi azi ne, “Manyi, aga niina ol dook zinzeeti. Inoko yeleyet eet codoi ole ceen ram noko ci te eɗera niina laadun ka kirigiz zɔɔ o Judaz, eeci Judaz baale otoɗet ageeta, ma ook gooye o abil been neen.” ²⁶Ma agɔɔn niigi maadico ci ka keɗertai eet codoi ole ceen ram noko. Eɗera ni Jooi Matiyas, ma aromonek niini toonnyak ween amɔtɔ codoi.

Kuni o Vɔɗiz o Joowo

2 ¹Mazi akɔ aku iiteni o kazi Pintikos, ulute ol o tuwento dook ɗaatodoi. ²Taman nɔkɔ iya mɔlɔyi ci aku tamma ci atobɔ ki ɗɔɔt ci ivaan ɔɔt, ma aku adala ceez ci ona aavtiye niigi o dook. ³Ma acin niigi kaal ci kizik goonya ci alanyit, ma azaanonek nɔɔgo dook ooti. ⁴Makacin anyayit niigi dook Vɔɗiz o Joowo ɔɔt. Ma anyek Vɔɗizi nici nɔɔgo kozoosit utugetine ci ɗaan laadun kagaac.

⁵Maje ɗinaante anyak ol ceen Juz ci gɔɔn adiɗɗan Jook. Avu niigi vitenane ogen, ma avu aavtiz Jerusalema. ⁶Mazi azii molok nico, olotai niigi, ma abiir nɔɔgo dook ooti, eeci gɔɔn eeti ceeni ɗaatineen azi ol o tuwento azɔɔz zooze onin. ⁷Ma abaraɗani nɔɔgo dook ooti, ma ajinɔ anɔ ne, “Alaɗ een ol ci azɔɔz noko ol o Galili? ⁸Ku zin yo azɔɔz niigi utugetine ogaac ele o? ⁹ɗaatinai ɗina anyek ol ci avu looce o kazi Partiya, ki Midiya, ki Ilam, ki Mesopatamiya, ki Judiya, ki Kapadociya, ki Pontus, ki Asiya, ¹⁰ki Pijiya, ki Pampiliya, ki Masir, been Libya libir ci aɗɔɗɔ ki Sariin e. ¹¹Ol ogene ɗaatinai Juz kibeen ol o alaɗ een Juz o avu niigi looce o Rom, ma avu agama Jook o ol o Juz. Buk ol ogen avu looce o kazi Karit kibeen Arabiya. Ma azɔɔz niigi otoge ona. Aduwa niigi kaal o ateeɗ ol biye agɔɔn Jooi.” ¹²Ma olla abaraɗani niigi dook, ma anɔ ne, “Mayo gi nici keɗ cine gitaz?”

¹³Maje bar ol ogene ɗaatineen ararni ol o tuwento, ma anɔ ne, “Abaaki inoko ol nici.”

Uuwak Pitɔr

¹⁴Itiɗa ni Pitɔr jena kibeen toonnyak ween amɔtɔ codoi, ma azɔɔz niini molowe ci alɔɔlɔ anek ol ne, “Igeeta ol o Juz kibeen ol o abaaku Jerusalema dook, iziiktaɗ di aneet anyan kuduwayuɗ keɗ ci gi nico. ¹⁵Ol nicigi alaɗ abaaki kiyo ona abaabanu niiga o. Acinu gɔɔn abaaki ol ɗeere iɗaan een ziik tɔrkɔc? ¹⁶Bar zin nici gi baal aduwa nyakaɗani o kazi Jol e neen, azi baale niini ne,

¹⁷“Azi Jooi ne, Katin iinyaye ci ka koṭorei looci e, kitoonai Vɔŋiz onan ol dook. Lɔgɔz ugooc been dɔl ugooc katin uuwak zɔɔz onan. Ma buk katin lɔgɔz ugooc acin ootine kaal o Joowo. Buk katin matuwo ugooc awunozi wunozyak ci avu Joowa. ¹⁸Kanyi katin Vɔŋiz onan iinyaye niceke gabara ogan mac been o ŋaai buk. Ma uuwak niigi zɔɔz onan. ¹⁹Kagoon katin kaal ci atɛet ol biye tamma kibeen loota buk. Ma katin anyak biye kibeen goo kibeen buret ci appe. ²⁰Katin ii ookci kizi koli. Maje nyeloyi ookci kizi meerik kiyo biyeta o. Agooni kaal nicigi iŋaan rak iiten o adikir akuni Manyi kiiya. ²¹Zin ɛeti ci awo zaar o Manyi ka kitirit nɔɔnɔ, ŋaan ɛelyai niini iinyaye niceke.”

²²Igeet ol o Israyil, iziiyit zoozok ci kaduwakuŋ ce. Yesu o kutur o Nazaret neen o eyelizayuy Jooi igeet kizi didi niini eet o itoonnyai Joowa kaale o agɔɔn adiŋdiŋ ateeduy igeet biye. Agayu ri niiga kaal nicoko ɛɛltɔ didi, eeci utuguze ŋaatunooŋ ŋina. ²³Agama Jooi gi o ka agamti niiga Yesu ka urukti niiga nɔɔnɔ kadaak gole ci anyeku ol o ger kotodoyi nɔɔnɔ keete ween talakec. Kaal nicoko dook aga Jooi baale laadun iŋaan naaga kagaac. ²⁴Bar zin Jooi anyek nɔɔnɔ kɔmɔk daayiz, ma iŋaani nɔɔnɔ daayiza korok bodo, eeci alaŋ aganɔ ŋaati amɔgi daayizi nɔɔnɔ. ²⁵Aduwa baale Devid gi ci akati nɔɔnɔ azi ne, “Kacin gɔɔn Manyi onan aneeta ŋuma iinya dook. Ajoŋozan niini aneet tup, gerze ŋaan kanyei ŋoliin. ²⁶Atalne zin zin onane giye nico, ma kazooz talniinta, eeci mayo nuun tiŋeere kadaai o, kaga akom gi ci ger agoononekan. ²⁷Eeci niina Jooi alaŋ oonŋei vɔŋiz onan looc o daayizo. Alaŋ uuŋ gabaren unun abon kumu loowa. ²⁸Eyeleyan baale niina aneeta gɔl o ka kook korogi bodo. Ma giye o karomen naana ki ineet, kanyei naana talniin ci appe.”

²⁹Gɔtɔnɔga, abon zin kaduwakuŋ igeeta kaal o akati jijitinai o kazi Devid ka agaac juruy zoozok baal aduwa niini e. Agayu niiga adaak baale niini. Ma inoko look onine baal adawin e ŋaan abil tɔ ŋina zɛɛ been inoko o. ³⁰Baale zin niini nyakanan ci aga zɔɔz o aterkedek Jooi nɔɔnɔ. Aterkedek baale Jooi nɔɔnɔ gi ci anek ne, “Kanyi katin logo oma dolene ci dɔl cugun kizi alaan ci abil kiyo niina o.” ³¹Icinun ni niini gi o ka kutugu Jooi katin. Ma azɔɔz niini gi ci akati ŋaazi o Kiristo azi ne, “Alaŋ oonŋek Jooi nɔɔnɔ looc o daayizo. Ma alaŋ ele onine ame loowa.”

³²Itiŋawi zin Jooi Yesu daayiza didi. Ma inoko naaga dook kiziti bacok giye nico. ³³Ooyi Jooi nɔɔnɔ tammu tadena, ma ako arek libir onin azo, ma anyek nɔɔnɔ Vɔŋiz o Joowo kiyo baale aterkedek niini nɔɔnɔ e. Mazin ci inoko acinu, ma aziŋŋu noko, Vɔŋiz o Joowo anyet niini ageeta neen. ³⁴⁻³⁵Alaŋ een zin Devid neen o ako tamma, bar olla aduwa niini waanice zɔɔz ci akati Yesu azi ne, “Anek Jooi Manyi onan ne, Avu ŋina aneet aza nɔko zɛɛ ma kanyin rocek ol o amarninin ineet looc zɔɔnɔ.”

³⁶Abona zin niiga ol o Israyil dook agayu zɔɔz nico juruy. Yesu baal adodoyu niiga nɔɔnɔ keete ween talakec e neen o anyek Jooi nɔɔnɔ kizi Manyi, ma een Kiristo.”

³⁷Mazi azii ol zɔɔz ci Pitɔr noko, anyayit ŋoliin ɔɔɔt ele, ma anek niigi Pitɔr ki toonnyak ne, “Gɔtɔnɔga, mayo kutuguza naa?”

³⁸Ma anek Pitɔr nɔɔnɔ ne, “Abona niiga dook ateedinu oŋe ugooc, ka otoonyce zaare o Yesu Kiristo, ka kaara Jooi oŋe ugooc. Mā agoonu nɔko, anyuy koca Jooi igeet Vɔŋiz onin. ³⁹Eeci eterkedeyuy niini gi ci ka kiiyakuŋ Vɔŋizi onine igeet, kibeen dɔl ugooc, kibeen buk ol o abaak reena dook. Terkediin nici akati ol dook o awak Jooi ween Manyi onai ele onin.”

⁴⁰Ma uuwayek Pitɔr nɔɔnɔ zoozok golowe ci meel, ma ilotek nɔɔnɔ zɔɔz ci azi ne, “Orogozit eleeti ugooc piryakzete o akunak ol o ɔɔ nico ger abor Jook.”

⁴¹Makacin iziiyit ol ci meelik zɔɔz nico, ma atu Yesu, ma oonyi ol ceen eet tur lak eetom kamɔtɔ (3000) iitene nice, ma aromonek niigi ol baal atuwe laadun e. ⁴²Ma ademez toonnyawa nɔɔnɔ zoozok o Joowo. Ma arome niigi dook tup kizito laŋoten kibeen ol o tuwento dook, ma arome ŋaatodoi zɔlɔnta been ŋaryiinta.

Baayiz o ol o tuwento

⁴³Ma aŋole ol dook Jerusalema Jook, eeci anyek Jooi toonnyak doyiz ci agɔɔni kaal ci meelik ci atɛet ol dook biye. ⁴⁴Oromte ni ol o tuwento dook laŋotizete ci adɔi kak, ma atirtɔ niigi dook kaale ugeec anyak. ⁴⁵Ma ataaline niigi manɛɛn kibeen kaal ugeec anyak, ma aŋer guruc o ataala. Ma aŋerak gɔɔn niigi eet codoi ŋaatiŋeŋ ci alɛɛnɔ ki nɔɔnɔ. ⁴⁶Tup nɔko alote niigi ceenze o Joowo, ma azɔlɔ niigi ŋaatodoi ceezine ugeec talniinta. ⁴⁷Ma anyek niigi Jook zany, ma anaat ol dook nɔɔnɔ baayize uneŋ. Ma aromonek nɔɔnɔ tup nɔko ol ci colai meel ci orogoz Jooi nɔɔnɔ, makacin azaacun Jooi ol o tuwento kizi meeel ger.

Atirit Pitɔr kibeen Jɔn eet ci ŋanyŋany

3 ¹Ma iitene oman ɔɔtɔ Pitɔr kibeen Jɔn ceenze o Joowo ziiye ween iiyu ŋaryiinto yomana. ²Maje ŋinaante anyak eet ci aritai kizi ŋanyŋany nɔko laadun ci gɔɔn ako aavi araan o kazi Alina otoga. Adoŋek gɔɔn ol nɔɔnɔ ŋinite tup nɔko ka kook kala guruc ole o avunak ceez o Joowo. ³Mazi acin niini Pitɔr kibeen Jɔn avu ka kɔɔtɔ ceenza alawun niini nɔɔnɔ ka kanycek nɔɔnɔ guruc. ⁴Ma agelem Pitɔr kibeen Jɔn nɔɔnɔ, ma anek Pitɔr nɔɔnɔ ne, “Gelemet juruy.” ⁵Ma egelem didi niini nɔɔnɔ, bar abaaban niini azi ne, Coma tedec anyek niigi gi ci anyan. ⁶Ma anek Pitɔr nɔɔnɔ ne, “Akɔmnan guruc ci ka kanyin kina, bar zin ŋaan kanyin gi ci kanyei ce. Zaare o Yesu Kiristo o looc o kazi Nazaret kanekin ne, Tiŋa je, tɔ.”

⁷Ma agam Pitɔr nɔɔnɔ aziit cin azo o, ma atirit nɔɔnɔ kitiŋa je. Taman nɔko obonta nɔɔnɔ zɔɔnɔ ogine. ⁸Ma iŋaaz ŋaati akuli, ma abil jena zɔɔnɔ, ma awo ŋaati anotane looc. Ma ɔrkɔr niini ki nɔɔnɔ avɔ ceenze o Joowo eecitɔ ŋaati arogomi talniinta anaati Jook. ⁹Ma acin ol dook nɔɔnɔ ŋaati awɔyi, ma anaati Jook noko. ¹⁰Mazi iiyez ol nɔɔnɔ een eet o gɔɔn alaye ceenze o Joowo araane o kazi Alina otoga o neen, eteede nɔɔnɔ biyeta giye ci agoononek nɔɔnɔ o.

Uuwak Pitɔr ceenze o Joowo

¹¹Mazi acin ol eet nico ŋaati atorkodi Pitɔr ki Jɔn, eteede nɔɔnɔ dook biyeta, ma adokonyonek niigi nɔɔnɔ kaluwawe o kazi Solomon. ¹²Mazi acin Pitɔr ol agɔɔn nɔko, enek nɔɔnɔ ne, “Ol o Israyil, ateedinuy igeet biyeta giye nico naa? Má agelemnyetu ageeta gaga. Má bar abaabanu kizik inoko kanyeka eet nico kɔɔtɔ doyiz cinaaŋ, karabɔŋ een bonate cinaaŋ.

¹³Jook o Ibrayim ki Aizak ki Jakob been jijitigaac neen o anyek Yesu ween gabaren onin diŋdiŋon o tammo. Zin igeet neen baal anyeku nɔɔnɔ ala, ma otobortu nɔɔnɔ ŋume o alaan o kazi Pailat, mayo nuun arɔŋŋ waanice kotoŋ Pailat nɔɔnɔ e. ¹⁴Niini laadun eet ci abon Joowa, ma bar otobortu niiga nɔɔnɔ, ma ajinu Pailat ka kɔɔgayuy igeet eet o monyento. ¹⁵Ma aruku nɔɔnɔ kadaak eet o anyek ol roget ween didi. Bar zin Jooi itiŋawi nɔɔnɔ daayiza, ma keegina naaga bacok giye nico. ¹⁶Doyiz zin ci zaar ogin neen ci arogni ɛeti ci ŋanyŋany baal agayu noko. Tuwen zin onaŋ katuya naaga Yesu neen ci anyek eet nico kobona igeet dook keberen noko.

¹⁷ Götönöga, inoko zin kaga naana gi baal agooneku niiga kibeena alaata ugooc Yesu e, agoonu o, eeci njaan agaac niiga niini Kiristo neen. ¹⁸ Baale uduwa Jooi laadun nyakananete dook piyakzet ci ka kiiya kipirai Kiristo. Zin didi gole nico anyek Jooi gi nice kelemnyai. ¹⁹ Abon zin niiga inoko abadu mony, ma abadaku Jook ka keeya Jooi onje ugooc. ²⁰ Ka coma itoonakuñ Jooi igeet talniin ci appe zinzeeti ugooc, ma bodo buk katin itoonakuñ Jooi Yesu ween Kiristo baal laadun enjerayun niini igeet e. ²¹ Bar zin rak aavi niini tamma zee ma ako agoon Jooi kaal dook kiziti colaye kiyo baale aduwa niini nyakananete ogin baal reen e. ²² Eeci azi Mosis baale ne, “Katin itoonakuñ Jooi ween Manyi unoon nyakanan ci anjera njaatunoon kiyo itoonanan niini aneet o. Abon zin niiga aziijnun kaal dook o aduwakuñ niini igeet. ²³ Ma eeti o alañ azooni zozz o aduwa nyakanani nici, anjerayi niini ole o Joowo, ma uulali.”

²⁴ Zin didi Samwel kibeena nyakananete oogi baal avu nōōō vurta iinyaye baalgeecik e, uuwak zozz ci akati kaal o ka kiiya kutugu Yesu. ²⁵ Igeeta zin neen o eeginu dōl o nyakanete niceke, ma itoonayun Jooi igeet Kiristo baal aterkedek niini jigitugoo e. Anek baale Jooi Ibrayim ne, “Kamayuwi katin ol dook loota njaaten dole ci dōl cugun.” ²⁶ Zin enjera Jooi gabaren onin, ma itoonayun igeet ka kamayuwuñ, ma abadanun igeet dook gole o ger.”

Aavtiz Pitōr kibeena Jōn roonnya

4 ¹ Mazi njaan uwayek niigi ol zozz nōōō, ivitak nōōō ol ween alaata o ceez o Joowo, kibeena alaan o ol o abek ceez o Joowo, been ol o kazi Sajuzi. ² Eeci abor niigi nōñ giye o ademzeke toonnyawa nicigi ol zozz ci akati njaazi o Yesu daayiza. Ma buk zozz nicini ayelza njaazi o ijaani eeti ci deer daayiza. ³ Agamit ni niigi nōōō, ma avo arek sijn katanuguzo kal, eeci izi lōōōci yoman. ⁴ Maje ol ci meel ole ona azii zozz uneen e utuyo. Makacin urumit ol ci atuwe o dook eet tur lak eet ram kamoto (5000).

⁵ Ma njeere olotai alaata o Juz, ki ol o adikir baayizo, been ol o demziinto alotonek Jerusalem. ⁶ Ma avu arumō kibeena alaan o ceez o Joowo kazi Anas, kibeena Kayavas, kibeena Jōn, kibeena Alikzandar, ki ol oogi ceen atenok ci Anas. ⁷ Ma anyek niigi Pitōr ki Jōn keelit nōōō njaama, ma ajin nōōō anek ne, “Ajowanu dōyiz ci aruguzu eet ci njanjany o zaare ci njeñ?”

⁸ Enico iyyak Pitōr Vōñizi o Joowo, ma abedeke niini nōōō anek ne, “Alaata o abalu ol, kibeena igeet ol o adikir baayizo, ⁹ Mate laadun anyaanetu o ka ivita ijintetu gi ci abon ona karuguza eet ci njanjany noko kotōwi tōp o? Gi nici alañ abon? ¹⁰ Dōyiz zin o Yesu Kiristo neen o anyet ageeta korogozta eet nico. Yesu Kiristo o Nazaret neen baal adodoyu keete ween talakec, ma itijawi Jooi nōōō daayiza e. ¹¹ Nōōō neen baal aduwaket warage o Joowo zozz o akati nōōō azi ne, “Ma be o abor ol o teenyinto ookci bar katin kizi be ci adiññij kujuk biyen oogi e.” ¹² Anyet zin rogzen niini doon. Akom bodo eet oma loota njina ci anyet Jooi ageet ka korogit zaare cigin.”

¹³ Ma abiiir ol o roonnyo dook ooti, eeci acin niigi Pitōr kibeena Jōn azozz moozeta, ma aga nōōō een ol ci celbezik labak. Ma aga niigi nōōō aduwa zozz genyiza noko, eeci baale orkor ki Yesu. ¹⁴ Ma bar okoma gi ci ger ka kuduktak niigi nōōō, eeci acin niigi eet baal njanjany e obona, ma arome kibeena Pitōr been Jōn. ¹⁵ Anyek ni niigi nōōō kudunito bitaala ka kabaabanit niigi doon rak. ¹⁶ Ijintō ni niigi maany izito ne, “Kayo kutuguzek ol nicoko naa? Ol ci abaak Jerusalem njina noko dook aga utuguzo niigi gi ci atet ol biye, ma alañ kanim bodo kadañit. ¹⁷ Alañ zin karōñ ol ci kuturyok oogi kiziiyit zozz ci arogzi niigi eet ci njanjany noko. Inoko abon olla kagernyek nōōō ka calañ bodo ademzek ol zozzok ci akati Yesu.”

¹⁸ Utuya ni niigi nōōō kabadaak ceez, ma aricanek gi ci anek ne, “Inoko alañ karoonyun edemeztek ol zozz o Yesu bodo been neen.”

¹⁹ Bar Pitōr ki Jōn abedeke nōōō anek ne, “Apayit di zozz nico niiga maany mā acinu abon njume o Joowo. Mayo dim abon njaati kaziijnun naaga igeet yo Jook da? ²⁰ Alañ zin naaga kaziijnun igeet, eeci alañ bodo kanimnya kajaktowa kaale o kicinta ma kiziiikta.”

²¹ Ma agernyek ol o roonnyo nōōō orōōō. Oborocit ni niigi nōōō, eeci acin niigi akom gi ci ka korōōōki nōōō giye o anaati ol dook Jook kaale o agooni. ²² Maje eeti o njanjany ona atirit niigi e anyak waanice irkitok ci atayanit eet ram (40).

Anjarye ol o tuwento

²³ Mazi aborca ol Pitōr ki Jōn, imiirtozek niigi ol o tuwento, ma avo aduwak nōōō kaal dook o aduwak alaata o ceez o Joowo kibeena ol o adikir baayizo e. ²⁴ Mazi azii niigi kaal nicoko, anjaruyo ano ne, “Manyi, een niina Jook o eenyca tammu taden ki looc ki liilok kibeena kaal dook o abaak njaatineen. ²⁵ Baale azooz niina Vōñize unun njaaten gabaren unun kazi Devid ween jijitinaan waanbaal ane ne, “Abor modena nōñ naa? Arōñ kutuguzek ol Jook gi ci ger gaga nōōō o naa? ²⁶ Aak alaata o loocu gan, ma arom eleeti ka kooyoyit Jook kibeena Kiristo o ka kitoona niini.” ²⁷ Zin inoko didi gi baal aduyai e ibilun tō. Didi alaani o kazi Erod kibeena alaan o kazi Pantas Pailat oromte kuture nico kibeena moden koogi kibeena buk ol o Israyil, ma amarnin niigi Yesu ween gabaren unun abon baal arōnyai kizi Kiristo e. ²⁸ Ma alote niigi ka kutuguzo kaal dook baal aroñ niina kutuguze dōyize unun. ²⁹ Manyi, cin di njaati agernyeket alaata. Nyet zin ageeta o keegina gabara ugun kōzōzta zozz unun moozeta. ³⁰ Yeliza dōyiz unun rogoz ol o amōō, ma buk agoon kaal o atet ol biye zaare o gabaren unun Yesu.”

³¹ Mazi odotiz niigi njariinta, orōōō njinti ona anjaryin niigi e. Ma akunak nōōō dook Vōñizi o Joowo, ma azozz zozz o Joowo moozeta.

Zōlōn o ol o atuwe

³² Ma waanice ol o tuwento dook adoye zinzeeti, ma abaaban niigi gi codoi. Ma akom njaatineen eet ci azi ne, Kaal cigine anyak o kaal cigin doon. Bar azōl niigi dook kaal ugeec anyak. ³³ Ma uuwak toonnyawa dōyiza zozz o akati njaazi o Yesu Kiristo daayiza. Ma amayuk waanice Jooi nōōō dook orōōō. ³⁴⁻³⁵ Ma akom njaatineen eet ci arōñ gi ci arōñ, eeci ol o anyak maneen karabōñ een ceezi ataaline, ma anyak guruc ci ataala o toonnyak, ma anjerek toonnyawa ol dook eet co gōōō ci agano ki nōōō.

³⁶ Maje njinaante anyak eet ci kazi Josev. Niini eet ci ol o kazi Livai ci aritai looce o kazi Sipras. Ma akanek toonnyawa nōōō zaar ci kazi Barnabas o akat keñ cine eet ceen tiritoi. ³⁷ Ataaline buk niini mana cin, ma anyak guruc toonnyak.

Ananayas kibeena Savira

5 ¹ Maje buk njinaante anyak eet ci kazi Ananayas. Kazi njaama cin zaar ne Savira. Ataaline niini mana codoi. ² Ma arōōō bodo guruc oogi guruce ci ataala mana o, ma anyek oogi toonnyak, ma anek toonnyak ne, “Guruc o kataala mane onan dook neen nici.” Maje uyene njaama cine aga buk zozz nico. ³ Ma anek Pitōr nōōō ne, “Ananayas, naa anyi Loryen kook ziniza ma alaba Vōñiz o

Joowo giye ci arɔɔde guruc oogi guruce ci ona ataala mana o? ⁴ Ma laadun mana alaŋ een mana cun? Mazi ataaline e ma guruca buk alaŋ een cugun? Zin naa ako ma abaabana ziniza gi nico o? Alaŋ zin niina alaba ɔl ci deer, bar alaba Jook.”

⁵ Mazi ŋaan azii Ananayas gi nico nɔko, iita kir, ma adaai enico ɛle. Maje ɔl dook ona azii gi nico e anyayit ŋoliin. ⁶ Ma avu lɔgɔzet, ma abunɛ ɛle cin o, ma avɔyi bitaala, ma avɔ ada.

⁷ Mazi ako adicai ziiya iiyon, iiya ŋaa online, bar alaŋ aga niini gi ci ona agoononek eet cin o.

⁸ Ma bodo ajin Pitɔr nɔɔnɔ anek ne, “Duwayan di, ceegi guruc ona ataalanu mane unooŋ e dook neen?”

Ma abedeke niini nɔɔnɔ anek ne, “Ii, dook neen.”

⁹ Enek ni Pitɔr nɔɔnɔ ne, “Ma dim niina ki eet unun acinanu Vɔŋiz o Joowo naa? Cin di zin ɔl ona ada eet unun e nɔɔgo neen ci avu ceez tatoga neke. Atikekin niigi tedec ineet buk bitaalin ka kɔɔt kadayin.”

¹⁰ Taman nɔko iita niini nɔɔnɔ ŋuma, didi adaawa. Mazi avɔ avu lɔgɔz oke, acin niigi nɔɔnɔ adaawa, ma atikek nɔɔnɔ bitaalin, ma avɔ ada nɔɔnɔ eet onin libira. ¹¹ Ma akunak ŋoliin ci appe ɔɔɔt ɔl o tuwento been ɔl o azii gi nico dook.

Kaal o ateet ɔl biye

¹² Ma waanice agɔɔn toonnyawa kaal ci meel ateet ɔl biye. Ma arome ɔl o tuwento dook ceeze o Joowo kaluwawe o Solomon.

¹³ Maje ɔl o alaŋ atuwe, yo nuun waanice adiŋdiŋan niigi toonnyak e, alaŋ anyak moozet ci ka kulutoi niigi ki nɔɔgo ŋaatodoi.

¹⁴ Ma iinyaye niceke ɔl ci mac kibeen ŋaai ci meel utuweec Manyi, ma aromonek niigi ɔl o tuwento. ¹⁵ Mazin giye o acini ɔl kaal ci agɔɔn toonnyawa noko, ɔɔŋta niigi ɔl ɔl ci amɔɔr kuwane, ma avu arek nɔɔgo golok, ka ma adir Pitɔr nɔɔgo, coma akunak riritanti cine o nɔɔgo ka kanyek kizi mayete moorizowe ugeec. ¹⁶ Ma avu ɔl ci meelik ɔɔɔt kuturyowe o ajɔŋzo ki Jerusalem dook. Ma anyaa niigi toonnyak ɔl ci amɔɔr kibeen ɔl ci anyak miniŋ o Loryento, ma arogze niigi dook.

Apirnane ɔl toonnyak

¹⁷ Maje alaani o adikir ceeze o Joowo kibeen ɔl o ɔrkɔr ki nɔɔnɔ kazi Sajuzi amadiyit toonnyak, ma arɔɔŋ kutuguzek nɔɔgo gi ci ger. ¹⁸ Agamit ni niigi nɔɔgo, ma avɔ acap sijina. ¹⁹ Bar baaline nice ɛle iiya toonnyaiti ci Joowo, ma akɔl araan o sijino ma aduŋnan toonnyak bitaalin, ma anek niini nɔɔgo ne, ²⁰ “Ɔɔɔ ceeze o Joowo ka ɔɔt uduktak ɔl zɔɔz o roget o colai.” ²¹ Mazi azii toonnyawa zɔɔz nico, ɔɔɔ didi niigi ceeze o Joowo ŋeere ririwɔna, ma avɔ ademez ɔl ŋinaante.

Ma iitene nice ɛle utuya alaani o adikir ceeze o Joowo kibeen ɔl o ɔrkɔr ki nɔɔnɔ ɔl o Juz adikir dook ka kivitak rooni ci adikir. Ma itoon takirnya ka kɔɔt kanyaakta toonnyak sijina. ²² Bar mazi avɔ arum takirnya sijin, arɔba toonnyak aziito. Abadaak ni niigi ŋino roonnyo e, ma avu anek ɔl ne, ²³ “Ako mazi kavɔ karumnya sijin, kamadana agarani. Aje bekcowa abek karogi, bar mazi kakola, kavoya eecito, akɔm ɔl oke kina.”

²⁴ Mazi azii alaani o ɔl o abek ceez o Joowo kibeen alaani o adikir ceeze o Joowo gi nico, abaraŋante nɔɔgo ooti, ma ano ne, “Iiyak toonnyak gitaz?” ²⁵ Iiyak ni ete oman nɔɔgo, ma aku anek ne, “Iziikto di, ɔl baal areku sijin e aavtiz ceeze o Joowo ademez ɔl.” ²⁶ Ma iŋaaz alaani o takirnyawu kibeen ɔl ogin, ma avɔ anyaa toonnyak. Ma alaŋ agit niigi nɔɔgo gola, eeci aŋole ɔl gerze ŋaan avac ɔl nɔɔgo biyene.

²⁷ Anyaaktak ni niigi toonnyak ceez o roonnyo, ma avu anyek nɔɔgo keelit ɔl kɔrgena. ²⁸ Ma anek alaani o adikir ceeze o Joowo nɔɔgo ne, “Iinyaye baalke ŋaan kiricaneyuŋ keneyuŋ ne, Má ŋaan ademezu ɔl zɔɔz ci akati Yesu? Icinit di gi o agoonu. Azaanteyu demziin unooŋ Jerusalem dook, ma arooŋnyu anycetuu ageeta kizita ɔl o karuka Yesu kadaak neen.”

²⁹ Ma abedeke Pitɔr kibeen toonnyak oogi nɔɔgo anek ne, “Abon kaziŋna naaga Jook kujuk ɔl ci deer. ³⁰ Eeci itihawi Jooi o jijitigaac Yesu daayiza ŋaa baal aruku niiga nɔɔnɔ kadaak keete ween talakec e. ³¹ Ma ooyi Jooi nɔɔnɔ, ma ako arek libire onin azo ka kizi alaan been ruguzoi ci ka kanyek ɔl o Israyil waŋi ci abadi mony, ka kaaryai oŋe ugeec. ³² Keegina naaga bacok kaale nicoko. Ma een buk Vɔŋiz o Joowo o anyek Jooi ɔl o azii nɔɔnɔ bacoi kaale nicoko.”

³³ Mazi azii ɔl o roonnyo gi nico, otoborit nɔŋ ɔɔɔt, ma arɔɔŋ niigi ka kuruyit toonnyak kadaayito. ³⁴ Maje ŋinaante anyak eet ci kazi Gamalil. Niini eet ci ɔl o Parici, ma een niini alaan ci ademzek ɔl lotinok o Joowo. Atitiny gɔɔn ɔl dook nɔɔnɔ. Itiŋa ni niini jena, ma anek ɔl ne, “Anycek rak di ɔl nicoko kudunit bitaala ŋintimiliny.” ³⁵ Mazi adun toonnyawa, enek niini ɔl ci roonnyo o ne, “Ɔl o Israyil, abaabanit rak di gi ci ka utuguzek ɔl nicoko o juruŋ. ³⁶ Agayu niiga baale eet o kazi Tudaz baal anyek ɛle kizi eet ci adiŋdiŋ. Ma ano ɔl ceen eet tur lak wec (400) nɔɔnɔ e. Ma vurta uruyit ɔl waanice nɔɔnɔ, ma azaani ɔl baal ɔrkɔr ki nɔɔnɔ e, makacin waanice idicai demziin online. ³⁷ Ma vurte onin bodo iiya ete o kazi Judaz o looc o Galili iinyaye o akɛɛbi akuma ɔl. Ma agama ɔl ci meelik demziin onin. Ma vurta uruyit ɔl nɔɔnɔ kadaak buk, makacin azaante ɔl baal ɔrkɔr ki nɔɔnɔ e. ³⁸ Zin giye nico kanekuŋ ne, Má agooneku ɔl nicoko gi ci ger. Otoŋit nɔɔgo kɔɔzɔ labak, eeci mā een demziin been liŋliŋɔn cineŋ agɔɔn noko ci eet ci deer, ŋaan katin adicai labak. ³⁹ Bar mazi aku demziin cineŋ noko Joowa, akɔm gol ci ka omogti nɔɔgo kina. Má agooneku gi ci ger ɔl nicoko, alaŋ kaga karabɔŋ bar koca agooneku gi ci ger Jook.”

Iziyit ni ɔl o roonnyo gi ci aduwa Gamalil o. ⁴⁰ Utuya ni toonnyak, ma anyek niigi takirnya korooyit nɔɔgo nyaboyen, ma aricanek nɔɔgo zɔɔz ci anek ne, “Má bodo ŋaan azoozu zɔɔz ci akati Yesu.” Oborocit ni nɔɔgo. ⁴¹ Ma adun toonnyawa ceeze o roonnyo talniinta, eeci acin niigi agano ŋaati anyeke Jooi nɔɔgo kipirta zaare o Yesu. ⁴² Ma avɔ tup nɔko ceeze o Joowo been korogjowe o ɔl o tuwento, ma ademez ɔl, ma uwayek ɔl gi o eene Yesu Kiristo.

Ŋjeryan o tiritok ween torgerem

6 ¹ Ma vurta iinyaye o azaacɔi ɔl o tuwento kizi meeɛle, anyayit niigi daŋɔn ki ɔl ween Juz o aganek zɔɔz ween Garik kibeen Juz o abaak Jerusalem laadun. Azi ɔl ci Juz ci aganek zɔɔz ceen Garik o ne, “Ŋaai ogaacak boye alaŋaan ajowa dayiin o gɔɔn aŋeronek ɔl o tuwento.” ² Zin giye nico utuya toonnyawa ween amɔɔt ram ɔl o tuwento dook ŋaatodoi, ma avu anek nɔɔgo ne, “Alaŋ abon ŋaatiinaŋ ŋaati kuuŋna uwayi o zɔɔz o Joowo ka koota keŋerteya ɔl dayiin. ³ Gɔɔnɔga, inoko eŋerta ɔl torgerem ŋaatonooŋ ci agayu niiga anyak Vɔŋiz o Joowo ɔɔɔt, ma anyak genyiz ka kanycek nɔɔgo liŋliŋɔn nico. ⁴ Ka zin kizi liŋliŋɔn cinaaŋ neen ŋaryiin kibeen uwayi.”

⁵ Ma atalna ɔl o atuwe dook baabani cineŋ o. Ma aŋera niigi eet ci kazi Istiven ci anyak tuwen kibeen Vɔŋiz o Joowo ɔɔɔt. Ma bodo aŋera Pilip, ki Pokoros, ki Nikanora, ki Timon, ki Parmena, been Nikolo ween moden o looc o Antiyok o anyek ɛle kizi eet o Juz. ⁶ Anyaaktak ni ɔl o tuwento ɔl ceen torgerem ona aŋera noko toonnyak, ma aŋarye toonnyawa, ma ataadek nɔɔgo azɛen ka kiziti ɔl ci aliŋliŋ liŋliŋɔn nico.

⁷Ma azaanonek zɔɔz o Joowo ɔl ci meel ɔrɔɔt. Ma agama ɔl ci meelik Jerusalema Yesu. Ma buk atu Yesu alaata ci meel alaate o goon agoonek Jook todoyok o Juz.

Gamiin o Istiven

⁸Maje Istiven niini eet ci amayuwi Joowa ɔrɔɔt, ma anyek Jooi nɔɔnɔ dɔyiz ci agooni kaal ci atɛet ɔl biye ɔla. ⁹Bar anyak ɔl oogi ci abor nɔɔnɔ. ɔl nɛci goon aɲarye ceeze o lotento kazi Ceez o Aborcen ɔl Ween Mirɔk. Niigi ɔl ci Juz abadaak Jerusalem looce o kazi Sariina ki Alikzandariya ki Silisiya been Asiya. Ma abor niigi Istiven, makacin adaɲto ki nɔɔnɔ. ¹⁰Bar anyek Vɔɲizi o Joowo Istiven genyiz ci appe ateezane ɔl nicoko. ¹¹ɔt ni ototoota niigi ɔl oogi ka kivita kakatit Istiven vɔlɔɲa kiziti ne, “Kaziɲna iiten baale Istiven aduwa kaal ci ger akati Mosis kibeem Jook.” ¹²Mazi ako azii ɔl o Juz kibeem alaata o ademzek ɔl lotinok o Joowo kibeem ɔl o adiɲɲiɲ gi nico, otoborit niigi nɔɲ. Agamit ni niigi, ma anyaa nɔɔnɔ ɔl o roonnyo. ¹³Ma anyaa buk niigi bacok ci ka kivita kakatit Istiven vɔlɔɲa kiziti ne, “Ɛeti nɛci goon azɔɔz kaal ci ger akani ceez ona Joowo kibeem lotinok o Mosis. ¹⁴Ma buk kaziɲna nɔɔnɔ azi ne, Yesu o Nazaret katin alip ceez o Joowo, ma owo keerane baal anyet Mosis e dook.” ¹⁵Maje ɔl ci aavtiz roonnyo o dook agelem Istiven, ma acin niigi ɲum cino abil kiyo ɲum o toonnyai o Joowo o.

Zɔɔz o Istiven

7 ¹Ijin ni alaani o adikir ceeze o Joowo Istiven anek ne, “Abil zɔɔz nɛci didi nɔko?” ²Ma abedeke Istiven azi ne, “Gɔtɔnɔga kibeem baatigan, iziiktaɲ di. Baale ayelzak Jooi o adiɲɲiɲ Ibrayim ween jijitinaɪ ele ɲaa baal abaai niini kazi Mesopotamiya e iɲaan kook kabaak niini looce o kazi Eran. ³Ma anek Jooi nɔɔnɔ ne, “Toɲ atenok ugun kibeem looc unun, luuk bitɔ looce oman ci ɲaan kaka kayelekin.” ⁴Ma didi utuɲun niini looc nice, ma ook abaak ɲaa kazi Eran. Mazi ako adaai baati Ibrayim, anyek Jooi Ibrayim kuluugak looc ci inoko abaaku noko. ⁵Bar zin iinyaye niceke ɲaan kanyek Jooi Ibrayim looc nico kizi cin. Yo nuun een ɲinti kidic ter waanice, ɲaan kanyek kizi cin. Bar olla aterkedek Jooi Ibrayim zɔɔz ci ka kanyeke nɔɔnɔ ki dɔl ci dɔl cigin looc nico, yo nuun waanice ɲaan kanyak niini dɔl e. ⁶Aduwak waanice Jooi Ibrayim zɔɔz ci anek ne, “Abaak katin dɔlya ci dɔl cugun looce oman. ɲinaante katin niigi eegin gabara, ma agit ɔl nɔɔɔɔ ɔrɔɔt irkitok eet tur lak wec (400). ⁷Bar zin katin kuulal ɔl ci agit nɔɔɔɔ o, ka vurta kudunta dɔlya ci dɔl cugun o looce nice, ka kivita kidiɲɲiɲantan niigi aneet ɲina.” ⁸Anyewun ni Jooi Ibrayim keer ci atɛedi dɔl kuli ka kizi bayen ci zɔɔz o aterkedek niini nɔɔnɔ. Mazi ako aritai Aizak e, anyek Ibrayim nɔɔnɔ kidica iinya turge zɛɛ eteeduni nɔɔnɔ. Waanice zin iya Aizak izi baati Jakob. Maje Jakob iya izi baati lɔɔz ween amɔtɔ ram o ivita iziti jijitigaac.

⁹Odomta lɔɔz o Jakob amartɔi Josev ween gɔtɔni uneɲ, makacin ataaltɔi nɔɔnɔ ka kook kizi gabaren Masire. Bar Jooi itirit nɔɔnɔ. ¹⁰Ma azooni nɔɔnɔ gidente baal agidi ɔl nɔɔnɔ e dook. Mazi ako akunak Josev Veero ween alaani o Masiro, anyek Jooi nɔɔnɔ ziniz ci iina kibeem genyiz. Zin giye nico anyewun Veero nɔɔnɔ kabal Masir kibeem kaal o kɔrɔk onin dook. ¹¹Ma vurta anyawun Masira kibeem looce o abaai Jakob kazi Kanan tarjo ci appe ci adayi ɔl magiz ɔrɔɔt. Ma ɔkoma jijitigaac ɲinti ka kojoktai dayiin. ¹²Mazi ako azii Jakob anyak Masira labi, itoonun lɔɔz ogin kɔɔt kataala labi ɲinaante. ¹³Mazi avu amiiri lɔɔz eci vurto o ka kɔɔt bodo kataala labi Masire, uduwak Josev gɔtɔnɔgi ele. Makacin iziik buk alaani o Masiru kazi Veero gɔtɔnɔgi Josev ivitak Masir. ¹⁴Zin ɲina itoonewun Josev baatin Jakob otok ka kuluuktak niini ki ɔl o kɔrɔk onin dook Masir. Maje ɔl ci kɔrɔk cin o dook waanice een eet iyyu kamɔtɔ ki tiin tur (75). ¹⁵ɔt ni Jakob been kɔrɔk onin dook Masire. Ma avɔ abaak ɲinaante zɛɛ ma adaai Jakob kibeem lɔɔz ogin. ¹⁶Ma eel ame ugeec zɛɛ ma irkite baal ɲaananɛ Mosis ki ɔl o Israyil Masire e, itiktak niigi ame cigeeɔ o ɲin o kazi Cekam ka kivita kadaac niigi nɔɔɔɔ boote baal ataala Ibrayim guruci modene o kazi Amor e.

¹⁷Mazi waanice ako ajɔn iiten baal aterkedek Jooi Ibrayim ka kanyeke nɔɔnɔ looc o kazi Kanan e, azaace waanice ɔl ogaac Masire kizi meeɛ ɔrɔɔt. ¹⁸Maje iinyaye niceke abalun ɔl Masire alaani oman calaɲ aga Josev. ¹⁹Ma alaba niini jijitigaac, ma agoonek nɔɔɔɔ kaal ci ger. Buk ako ma adaɲek nɔɔɔɔ kujuktek dɔl tuu kadaayitɔ. ²⁰Ma iinyaye niceke aritai logoti ci alina ɔrɔɔt kazi Mosis. Ma arɔɔt yaatine ceeza nyelɔwe iyyu. ²¹Ma vurta ook oroodun yaatine nɔɔnɔ tuuwa, ma aku ajowa nɔɔnɔ tinati Veero, ma ako abaayiza nɔɔnɔ kizi dole cin. ²²Ma ɛdemez niini genyiz dook Masire. Makacin izi eet ci titiny zɔɔza kibeem kaale o agoon.

²³Mazi ako een Mosis irkitowa eet ram, orooɲun niini kook kicin gɔtɔnɔgi ween Israyil. ²⁴Mazi ako niini ɲinaante ook icinun eet codoi ole ween Israyil agit ɛeti ceen Masiren. Ɛɛla ni niini nɔɔnɔ, ma aruk eet ceen Masiren noko kadaak. ²⁵Abaaban niini ane coma ɔl cigine Israyil o aga gɔl o ka keelai nɔɔɔɔ Jooi ɲaaten nɔɔnɔ ka calaɲ bodo eegin gabara ci Masiro. Bar ɔl o Israyil alaɲ aga gi nico. ²⁶Ma iitene oman acin niini ɔl ceen Israyil ram ayɔwɔ niigi maany. Ma arɔɔɲ niini keɲer nɔɔɔɔ. Anek nɔɔɔɔ ne, “Iziiktaɲ di gɔtɔnɔga. Niiga dook eeginu ɔl o Israyil. Ayowonu zin bodo niiga maany naa?”

²⁷Bar ɛeti ona apan gon e ɔtɔyɔɔt Mosis, ma ajin nɔɔnɔ anek ne, “ɲeneen ci anyin ineet alaazet ci ka paket ageeta o? ²⁸Arooɲ ka ruyan kadaak kiyo balawaz arui eet ween Masiren e?”

²⁹Mazi azii Mosis zɔɔz nico, ivirun niini Masire. Ma ako abaak looce o kazi Midiyan. Ma ɲinaante ook ɔrɔɔɔ, ma arita lɔɔz cigin een ram.

³⁰Mazi ako adica Mosis irkitowa ceen eet ram ɲinaante, eyelizak toonnyaiti ci Joowo nɔɔnɔ ele gooye ci alanyit lugurgoca balale o ajɔɲɔ ki be o kazi Sinai. ³¹Ma abiir Mosis ɔɔ giye ci acin noko, ma akunak ijonun ka kicin juruɲ. Bar mazi ako ajɔɲɔɔ ɲinite, enek Manyi nɔɔnɔ ne, ³²“Aneeta Jook o jijitugun. Aneeta Jook o Ibrayim ki Aizak ki Jakob.” ɔtɔɲɔle ni Mosis looc ɲina, ma abarit zɛɛ ma alaɲ arɔɔɲ kicin ɲinito bodo.

³³Ma anek Jooi nɔɔnɔ ne, “Aara caava zɔɔne, eeci ɲinti abilne noko ɲinti alile. ³⁴Kacin naana piryakzet ci apirname ɔl ogane Masire o nɔko, ma buk kiziiwa naana luwa uneɲ. Kiiya zin ka keela nɔɔɔɔ piryakzete cineɲ o. Inoko zin karoɲ kitooneyin ineet Masir.”

³⁵Nɛci Mosis baal abor ɔl o Israyil e ele neen baal ajin niigi nɔɔnɔ anek ne, “ɲeneen ci anyin ineet alaazet ci ka paket ageeta o?” Nɔɔnɔ neen o itoona Jooi ka kabal nɔɔɔɔ, ma eela nɔɔɔɔ dɔyize o toonnyai baal ayelzak nɔɔnɔ ele lugurgoce o alanyit e.

³⁶Nɔɔnɔ neen o uluugai ɔl o Israyil Masire, ma agoon kaal ci atɛet ɔl biye Masire, ki liile o Meeri, been balala irkitok eet ram.

³⁷Mosis ele neen baal aduwak ɔl o Israyil anek ne, “Katin itoonakuɲ Jooi nyakaɲan ci aɲera ɲaatonooɲ ele kiyo itoonanan aneeta o.” ³⁸Mosis neen baal azɔɔz been toonnyai o Joowo biye o kazi Sinai. Ma akɔyi niini zɔɔz o aduwak toonnyaiti nɔɔnɔ ole ween jijitigaac baal arome ki nɔɔnɔ balala e. Ojowa niini toonnyaito o Joowo zɔɔz o anyek ɔl roget o abil been neen ka buk kiiyayet zɔɔz nɛci ageet.

³⁹ Bar jijitigaac waanice otoborit ɲaati aaziɲni nɔɔɔ. Ma anek nɔɔɔ ne, “Alaɲ naaga karoɔɲnyin ineet bar karoɔɲnya kimiirtewa koota Masire.” ⁴⁰ Ma anek niigi Aron ween gɔtɔni Mosis ne, “Karoɔɲnyin bar naaga ineet ka dilayet joowane ci oontanet ageeta kootet Masire, eeci alaɲ kagaya gi ci alamun Mosis baal anyanet ageet Masire e.” ⁴¹ Idilta ni waanice niigi jook ci atobo ki mool, ma atɔɲdek todoyok, ma adake ɲaatodoi, eeci atalne niigi joowe ci adila azeene o. ⁴² Otoborewun ni Jooi nɔɔɔ ɔɲɲ giye nico, ma oɔɲ nɔɔɔ kidiɲɲanit monyony o tammo. Kiyo aduwa Jooi waragewe o nyakaɲanetu zɔɔɔ ci azi ne, “Igeet ɔl o Israyil, alaɲ atɔɲdekaɲ baale otodɔɲteyaɲ todoyok aneeta irkitok ween eet ram baal aavtiyu balala e. ⁴³ Bar waanice atiku niiga ceez ween rum o jook o kazi Malok kibeem riritɔn o monyatot o kazi Ravan. Nicigi zin joowane o adilanu niiga doon ka idiɲɲanit nɔɔɔ. Zin giye nico, ɲaan katooyekuɲ igeet ɲinti reem many looc o kazi Babilan libire ci gɔl e.”

⁴⁴ Baale mā aavtiz jijitigaac balala e, anyak ceez o Joowo een rum. Agɔɔna niigi ceez nice kotobto kibeem riritɔn baal ayelek Jooi Mosis e. ⁴⁵ Ma vurta odomta jijitigaac baal oɔɲnek baatigeecik ceez ceen rum neke. Itikit niigi ceez nice ooti waanbaal arayin Jasuwa nɔɔɔ akɔyi ka kɔɔt kirigizit loocok o moden baal abaak ɲinaante baal atɔɔk Jooi nɔɔɔ ɲuma e. Ma aavi waanice ceez nica ɲinaante zee been iinya o Devid. ⁴⁶ Ma atalne Jooi ɲaati Devid ɔɔɔt. Ma ajin Devid Jook arɔɲɲ ka keteenyak niini nɔɔɔ ween Jook o Jakob ceez.

⁴⁷ ɲaan zin Jooi kanyek Devid keteenya ceez nico, ma bar iiya anyek niini Solomon ween ɲeerin kiiya keteenya. ⁴⁸ Zin Jooi o adiɲɲan alaɲ abaak ceezine ci eenyca ɔl ci deer. Kiyo baale aduwa nyakaɲani azi ne, “Azi Manyi ne, ⁴⁹ Tammu taden ɲin onan kaave neen. Maje tɔɔwa ɲin onan kari zɔɔ neen. Mazin yo ceez taz ci ka eteenycayaɲ niiga aneet o? Ma ɲinti kayubze taz ci ka utuguzayaɲ niiga aneet o? ⁵⁰ Ma kaal nicoko dook alaɲ keenyca naana alya?”

⁵¹ Eeginu niiga ɔl ci ricil! Adoɲnuɲ zinzeeti kak, ma alaɲ agamanu zɔɔɔ o Joowo kiyo modena o alaɲ eegin ɔl o Joowo o. Ma buk adiitenuɲ iina calaɲ atu Jook o. Eelnu niiga kiyo jijitugooɔ baale e. Aburnu niiga zɔɔɔ o Vɔɲɲiz o Joowo. ⁵² Baale jijitugooɔ agit nyakaɲanet o Joowo dook. Ma aruk niigi nyakaɲanet o Joowo baal uuwak kuni o Kiristo ween gabaren o Joowo abon kadaayito. Inoko zin buk niiga utuburtu Kiristo, ma uruktu nɔɔɔ kadaak. ⁵³ Eeginu niiga ɔl o ajowanu lotinok o Joowo toonnyaye ogin neen, ma bar aburnu ɲaati aaziɲnu.”

Daayiz o Istiven

⁵⁴ Mazi azii ɔl o roonnyo zɔɔɔ ci Istiven noko, otoborit niigi ɔɲɲ ɔɔɔt, ma adak azeem bornet nɔɲa. ⁵⁵ Maje Istiven anyak niini Vɔɲɲiz o Joowo alye onin ɔɔɔt, ma agelem niini tammu taden, ma acin titinyɔn o Joowo, ma acin Yesu abil libire o Joowo azo. ⁵⁶ Ma anek nɔɔɔ ne, “Icinin di, kacin tammu taden akoli, ma kacin ɲeerti Eeto abil libire o Joowo azo.”

⁵⁷ Enico egerenyit ɔl o roonnyo ɔɔɔt, ma adiit iin ugeec. Ma aɲozonek niigi dook nɔɔɔ. ⁵⁸ Ma agurak nɔɔɔ kaluwawe o kuturo bitaalin, ma avac nɔɔɔ biyene ka kuruyit kadaak. Ma aara niigi rumanu ugeec, ma anyek logo ci kazi Cɔl ka kagamek nɔɔɔ ka kavacit niigi Istiven juruɲ. ⁵⁹ Mazi ɲaan avac niigi Istiven nɔɔɔ, aɲarowɔ niini ajin Jook anek ne, “Manyi onan Yesu, biti vɔɲɲiz onan.” ⁶⁰ Ma akani kozɔɲti looc, ma agereny molowe ci appe azi ne, “Manyi, mā anyayei nɔɔɔ da oɲec cineeɲ noko.” Mazi aduwa gi nico, adaawun niini.

Agit Cɔl ɔl o tuwento

8 ¹ Ma atalne Cɔl daayize o Istiven. Ma iitene nice ele iyyak ɔl o tuwento Jerusalema gidem ci appe. Ma avir niigi dook Jerusalema, ma azaanonek Judiya kibeem Samariya. Ma aavtiz Jerusalema toonnyawa doon. ² Ivita ni ɔl ogen ole o gɔɔn adiɲɲan Jook, ma avu ada Istiven, ma aluwek niigi nɔɔɔ ɔɔɔt ele. ³ Igit ni Cɔl ɔl o tuwento, ma azɔp niini ceezi dook, ma agam ɔl o tuwento dook, ɲaai ki ɔl o mac, ma ako acap nɔɔɔ sijina.

Uuwak Pilip Samariya

⁴ Maje ɔl o tuwento baal avir e ɔɔt azaantozek niigi loocok dook, ma avɔ uuwak zɔɔɔ o Joowo. ⁵ Buk Pilip ook niini kuture ci abil Samariya, ma ako uuwayek ɔl zɔɔɔ o akati Kiristo ɲinaante. ⁶ Ma azii ɔl ɲinaante zɔɔɔ o aduwak niini nɔɔɔ ɔɔɔt ele. Ma acin niigi kaal o agɔɔn Pilip ateeɔ nɔɔɔ biye. ⁷ Ma atɔɔk Pilip miniɲ ci Loryento ole ci meelik, ma aduɲna miniɲa nicigi ɲaatineeɲ gernya. Ma anyek ɔl o rebrebik kibeem ɔl o ɲɔɔlik kobonta kotɔɔɔ. ⁸ Zin kaale nicoko ataltɔ ɔl o Samariya ɔɔɔt.

Saiman ween ɲari

⁹ Ma kuture nice baale anyak eet ci kazi Saiman ci gɔɔn agɔɔn niini kaal ci ɲarizetu, ma anyek ɔl o Samariya dook kibiirit ooti ɲarizete cin noko. Ma anyek niini ele kizi eet ci titiny ɔɔɔt. ¹⁰ Ma aɲaamnek gɔɔn ɔl o titiny kibeem ɔl o labak dook kaal cigin agɔɔn noko ɔɔɔt. Ma anɔ ne, “Kiziiyt baale zɔɔɔ o akati dɔyiz o Joowo. Dɔyiz zin o Joowo neen ci anyak eeti nici noko.” ¹¹ Azii waanice ɔl dook nɔɔɔ, eeci alaba niini nɔɔɔ kaale ogin ɲarizetu abiirni ɔl ooti baal gɔɔn agɔɔn niini tup e. ¹² Bar mazi azii niigi ɲaati Pilip kaviyak o abon akati baliin o Joowo kibeem zaar o Yesu Kiristo, utuweec niigi kaviyak nicoko, ma oonyi niigi dook. ¹³ Buk Saiman alya utuwɔ, ma oonyi, ma orkor gɔɔn gɔɔn ki Pilip. Mazi acin kaal o adɔi ateeɔ ɔl biye agɔɔn Pilip, ibiir nɔɔɔ ɔɔ ɔɔɔt ele.

¹⁴ Mazi azii toonnyawa Jerusalema ɔl o Samariya agamta zɔɔɔ o Joowo, itoontek niigi nɔɔɔ Pitɔr kibeem Jɔn. ¹⁵ Mazi avu arum Pitɔr ki Jɔn Samariya, aɲaruyozek niigi ɔl o tuwento ka kiiyak nɔɔɔ Vɔɲɲizi o Joowo. ¹⁶ Eeci olla waanice oonyi niigi zaare o Manyi Yesu Kiristo, ma ɲaan Vɔɲɲizi o Joowo kiiyak nɔɔɔ. ¹⁷ Ma ataadek Pitɔr kibeem Jɔn nɔɔɔ azeem, ma akunak nɔɔɔ Vɔɲɲizi o Joowo.

¹⁸ Mazi acin Saiman Vɔɲɲiz o Joowo iyyak ɔl o tuwento ɲaati ataadeke Pitɔr kibeem Jɔn nɔɔɔ azeem, aara guruc arɔɲɲ ka kanyek Pitɔr ki Jɔn. ¹⁹ Ma anek niini nɔɔɔ ne, “Anycaɲ da buk dɔyiz nico aneet ka buk gɔɔn mā kataadei naana ɔl oogi azeem, ka kiiyak buk nɔɔɔ Vɔɲɲizi o Joowo.”

²⁰ Ma abedeke Pitɔr nɔɔɔ anek ne, “Nyamer adaayit niina alya kibeem guruc cugun noko, eeci abaaban niina ka taal gi ci anyaa Jooi o guruci. ²¹ Alaɲ zin abon ɲaati aliɲliɲe liɲliɲɔn o Joowo, eeci ziniz cune o alaɲ iimi ɲume o Joowo. ²² Inoko zin teɔɔi gerzitin nico. Jin Jook ka kaara oɲec noko. ²³ Eeci kacinin ineet appe ziniz ɔɔɔt, makacin acabin oɲeci.”

²⁴ Ma anek Saiman ceen ɲari noko Pitɔr ki Jɔn ne, “Ijinteyaɲ zin da Jook ka calaɲ avunakan kaal ci aduwanu noko.”

²⁵ Mazi odotiz Pitɔr ki Jɔn kaale o aduwa akati Yesu kibeem zɔɔɔ o Joowo, imiirtozek niigi Jerusalema. Ma gɔla uuwayit niigi kaviyak o Joowo kuturyowe ci meelik looce o kazi Samariya.

Pilip kibeem eet ceen Abacen

²⁶ Ma aku toonnyaiti ci Joowo, ma anek Pilip ne, “Cap kaal ka tiŋa bito ki tenet gole o Jerusalem o ako been kutur o kazi Gaza.” (Ma gól nica inoko izirzire.) ²⁷ Itiŋa ni Pilip ɔ́ɔ. Ma ako ajowa góla eet ceen Abacen. Maje eeti nica eet ci apayai teri ci góon aliŋliŋonek ŋaa ceen alaan ci adikir abal looc o Abacu. Ma góon agam eeti nici guruc ci ŋaa ceen alaan noko dook. Eeron zin da niini iitene oman ako Jerusalema ka kook kidiŋdiŋan Jook ŋinaante. ²⁸ Ma aku amiire ako Abace. Awo niini kavoole ci agurut jomane. Ma góla ekeebun niini warage o Joowo baal ayeet nyakaŋani o kazi Izaya. ²⁹ Ma anek Vɔŋjizi o Joowo Pilip ne, “Bito jɔŋɔz kavool nice.” ³⁰ Odokonyozek ni Pilip nɔɔnɔ, ma azii nɔɔnɔ akeep warage o nyakaŋan o kazi Izaya. Ijin ni Pilip nɔɔnɔ enek ne, “Ma dim inoko gi ci akeebi o aga?”

³¹ Ma abedeke niini nɔɔnɔ anek ne, “Alaŋ kaga, eeci akom eet ci oobekan keŋ juruŋ.” Ma awa niini Pilip kɔɔɔda kavool koromte ki nɔɔnɔ eecito. ³² Ma zɔɔz ci akeep niini o zɔɔz ci warage o Joowo o azi ne, “Atobo niini kibeem azeet o avɔyi ɔl ka kook kɔɔɔɔɔne o, ma buk atobo niini kibeem nyɔɔn o alaŋ eegek ŋaati ateedi ɔl nyalaado o, ma alaŋ niini azɔɔz been neen. ³³ Ma acelbezen ɔl nɔɔnɔ, ma akom eet ci apayek nɔɔnɔ leeminet. Ma akom dɔl cigin ci aga ɔl, eeci aruk ɔl nɔɔnɔ kadaak kodocai.”

³⁴ Ma anek eeti ceen Abacen noko Pilip ne, “Duwayan di, aduwa nyakaŋani zɔɔz ci akati ŋeneen ŋina? Aduwa gi ci akati nɔɔnɔ yo da aduwa gi ci akati eet oma?”

³⁵ Ma anek Pilip nɔɔnɔ ne, “Zɔɔz nici akati Yesu Kiristo.” Oobek ni niini nɔɔnɔ kavoyak o Joowo akati Yesu. ³⁶ Ma góla ojokta ŋinti anyak maam. Ma anek eeti ceen Abacen noko Pilip ne, “Maam nici. Alaŋ uunyan naa?”

³⁷ (Ma anek Pilip nɔɔnɔ ne, “Mā didi agama Yesu zinize unun dook, kuunyin koca.”

Ma azi ne, “Didi kagama.”)

³⁸ Ma anyek eeti ceen Abacen noko kavool kibil. Ma aduŋna niini kibeem Pilip, ma avo maami eecito, ma oony Pilip nɔɔnɔ.

³⁹ Mazi avo aduŋna niigi dook maami, iiya Vɔŋjizi o Joowo, ma akoyi Pilip ɔ́im, calaŋ acin eeti ween Abacen e nɔɔnɔ bodo. ɔ́ɔɔ ni niini talniinta. ⁴⁰ Mazi aara Pilip kebere, bar aavi kuture o kazi Azotus. Ma iŋaaz ŋinaante ako uuwak kavoyak o Joowo kuturyowe dook zee ma arum kutur o kazi Sisiriya.

Utu Cɔl Yesu

9 ¹ Iinyaye niceke ŋaan Cɔl amena agit ɔl o atu Yesu noko, ma arɔɔŋ kuruk nɔɔɔɔ kadaayito tup noko. Ma iitene oman ook niini alaane o adikir ceenze o Joowo. ² Ma ako ajin nɔɔnɔ ka kanyek waragenya ci itoononek alaate o ceezi o lotento kuture o kazi Damacik. Ma waragewi nici anyek nɔɔnɔ dɔyiz ci ka kook kagami ɔl o mac ki ŋaai o ano gól o Yesu ŋinaante, ka kanyaak nɔɔɔɔ sijn Jerusalema.

³ ɔ́ɔɔ ni zee mazi ako ajɔŋɔz Damacik, kataman noko iiyak nɔɔnɔ vooritin tamma, ma ataran nɔɔnɔ. ⁴ Ma aruk looc, ma azii molok ci anek nɔɔnɔ ne, “Cɔl, Cɔl, naa amarninan nɔɔnɔ?”

⁵ Ma abedeke Cɔl molok nico anek ne, “Ineet ŋeneen Manyi?”

Ma abedeke mɔlɔyi nici nɔɔnɔ anek ne, “Aneeta Yesu o amarninan. ⁶ Inoko zin tiŋa je. Bito Damacika. Anyak eet ci ka kook kuduwayin ineet gi ci ka tugu ŋinaante.”

⁷ Maje ɔl o ɔ́kɔr kibeem Cɔl e eel olla ajaki. Eeci azii niigi molok doon, ma akom eet ci acin kina. ⁸ Ma iŋaaz Cɔl jena. Mazi bar arɔɔŋ kamadak kebere, alaŋaan acine. Agamit ni ɔl o ɔ́kɔr ki nɔɔnɔ e nɔɔnɔ aziit, ma ayit nɔɔnɔ avɔyi Damacika. ⁹ Ma aavi Cɔl iinya iiyu calaŋ acinen. Ma alaŋ adake, ma alaŋ buk awode.

¹⁰ Maje Damacika ŋinaante anyak eet ci atu Yesu ci kazi zaar ne, Ananayas. Ma awo Jooi nɔɔnɔ wunozyai anek ne, “Ananayas.”

Ma abedeke Ananayas nɔɔnɔ anek ne, “Woo, Manyi. Kawe.”

¹¹ Ma anek Jooi nɔɔnɔ ne, “Tiŋa je. Bito gole o kazi Abil Tɔp. Mazi ako arum ceez o eet o kazi Judaz ŋinaante, jino nɔɔnɔ ka keyeyin eet o kazi Cɔl o looc o Tarsas. Niini inoko aŋarye ŋinaante. ¹² Ma acinin niini ineet wunozyai kizik akunai niina nɔɔnɔ ka taadek azeen ka kicinɔ bodo.”

¹³ Ma abedeke Ananayas nɔɔnɔ anek ne, “Manyi, kazii eet nico ole ci meel ger azi ne, Agoonek góon niini ɔl ugun kaal ci ger Jerusalema. ¹⁴ Inoko akunak niini Damacik o, eeci anycek alaata o adikir ceenze o Joowo dɔyiz ci ka kiiya kagami ɔl o atuyin ineet.”

¹⁵ Bar anek Manyi nɔɔnɔ ne, “Bito labak, eeci keŋera naana nɔɔnɔ ka kilijliŋozeyan aneet ka kuduwak niini zɔɔz onan moden kibeem alaate ugeec kibeem ɔl o Israyil. ¹⁶ Mazin naanalya ŋaan kayelei nɔɔnɔ kaal ci ka kanyek nɔɔnɔ piryakzet gole o aduwake niini ɔl zɔɔz onan.”

¹⁷ Ook ni didi Ananayas ceenze o aave Cɔl, ma ako ataadek nɔɔnɔ azeen. Ma anek ne, “Gɔtɔna Cɔl, Manyi Yesu neen ci itoonanan aneet ŋina o. Nɔɔnɔ neen baal ayelzakin ineet ele góla iiten baal akune ŋina e. Itoonanan zin niini aneet ka kiiya kanyin cinɔ bodo, ka buk kiiyayin ineet Vɔŋjizi o Joowo.” ¹⁸ Kataman noko iitazo keberene o Cɔl kaal ci kizik tagayaŋ ci kulugto. Makacin icino bodo. Itiŋa ni niini, ma oony Ananayas nɔɔnɔ. ¹⁹ Mazi ako adake, izi nɔɔnɔ ele pir kɔɔk kak bodo.

Uuwak Cɔl Damacika

Ma amon niini iinya ci miliny arome kibeem ɔl o tuwento Damacika. ²⁰ Ma góon ako niini ceezine o lotento, ma ako uuwak ŋinaante zɔɔz o akati Yesu anek ɔl ne, “Yesu niini ŋeerti Joowo.”

²¹ Maje ɔl o azii nɔɔnɔ dook abiir nɔɔɔɔ ooti, ma ajino ano ne, “Ma nici alaŋ een eet o góon aruk ɔl o atu eet o kazi Yesu kadaayito Jerusalema o neen? Aku inoko niini ŋina o arɔɔŋ buk ka kiiya kagam ɔl nicoko ka kooyi nɔɔɔɔ alaate o ceez o Joowo Jerusalema.”

²² Maje Cɔl uuwak moozeta kɔɔk ziniz kak kujuk we. Ma ayelek niini ɔl kaal o akati Yesu o eene didi niini Kiristo. Ma anyek zɔɔz cine o ɔl o Juz abaak Damacika olla kapaŋante kɔkɔm gi ci abarzek nɔɔnɔ kina.

²³ Ma iinyaye ogen olotai ɔl o Juz, ma avu abaaban gól ci ka kurukti Cɔl kadaak. ²⁴ Maje bar Cɔl iziiwun gi nico. Ma góon are ɔl nɔɔnɔ araanowe o kaluwa o aliya kutur waazinok ki baalinok dook arɔɔŋ ka kuruyit niigi nɔɔnɔ kadaak. ²⁵ Ma baaline oman inikta ɔl o góon ɔ́kɔr ki Cɔl ivitak nɔɔnɔ, ma avu arek nɔɔnɔ doŋok ci appe, ma atɔɔdi nɔɔnɔ kaluwa taden, ma itoonok nɔɔnɔ bitaalín doŋowe nico loronta.

Aavi Cɔl Jerusalema

²⁶ Ook ni Cɔl Jerusalema, ma njinaante ɔɔɔɔ koromozek ɔl o tuwento. Bar ɔl o tuwento alaɲ agama zɔɔɔ ci izoi niini eet ci tuwento o, ma ɲaan aɲole niigi dook nɔɔnɔ nɔkɔ. ²⁷ Iiyak ni Barnabas nɔɔnɔ ka kiiya kooyi toonnyaye. Ma ako oobek Barnabas toonnyak zɔɔɔ baal acini Cɔl Manyi gɔla, ma azɔɔzeke Manyi nɔɔnɔ e. Ma oobek buk zɔɔɔ baal uwayi Cɔl zaare o Yesu moozeta Damacika e. ²⁸ Iiya ni Cɔl oromozek nɔɔɔɔ, ma ako azɔp niini Jerusalem dook uwak zɔɔɔ o akati Yesu moozeta. ²⁹ Ma buk azɔɔɔ niini, ma adanɔ kibeen Juz o aganek zɔɔɔ ween Garik. Ma bar arɔɔɔ kuruyit niigi nɔɔnɔ kadaak. ³⁰ Mazi azii ɔl o tuwento zɔɔɔ nico, ivita ooti Cɔl kuture o kazi Sisiriya, ma njinaante itoonit niigi nɔɔnɔ kavoole ci liilu kidicek kook kuture onin kazi Tarsas.

³¹ Ma iinyaye niceke abaak ɔl o tuwento yaak looce o kazi Judiya ki Galili been Samariya. Ma atirit Vɔɲizi o Joowo nɔɔɔɔ, makacin ɔl o tuwento odoyit kak tuwenta, ma buk atuwe ɔl ci meelik ogen. Ma abaak niigi dook baayiz ci aɲolin Jook.

Atirit Pitɔr eet ci rebrebi

³² Maje Pitɔr waanice azɔp loocok dook. Ma iitene oman ook icin ɔl o tuwento abaak kuture ci kazi Lida. ³³ Ma njinaante ojowa eet ci kazi zaar ne Iniyas. Niini eet ci rebrebi calaɲ awo irkitok turge. ³⁴ Ma anek Pitɔr nɔɔnɔ ne, “Iniyas, itiritin Yesu Kiristo. Tiɲa je. Doma kuwen cun o.” Kataman nɔkɔ itiya didi Iniyas jena. ³⁵ Mazi acin ɔl o Lida kibeen ɔl o Ceran nɔɔnɔ obona, utuweec niigi dook Manyi.

Arogz Pitɔr ɲaa oma daayiza

³⁶ Waanice anyak ɲaa ci kazi zaar ne Tabiza ci abaak kuture o kazi Japa. Atu niini Jook. Kazi zaar ci ɲaa nico zooze ween Garik ne Dorkaz. Ma keɲ ci zaar nicoko kazi ne alyaz. Niini tup nɔkɔ alinliɲ kaal ci abon. Atirit gɔɔn niini ɔl ci ama. ³⁷ Ma iitene oman omoorun zee makacin adaawa. Ma oony ɔl ele onin, ma avɔ arek ceez ci ataadonek gɔn tadena ka waan kɔɔt kadaac niigi nɔɔnɔ. ³⁸ Maje Japa kibeen Lida aɲɔɲzɔ. Mazi azii ɔl o tuwento abaak Japakti Pitɔr aavi Lidakti, itoontek niigi nɔɔnɔ ɔl ram ka kɔɔt kenektek ne, “Ijayet ageeta ɲaato kataman.” ³⁹ Itiya ni Pitɔr orkorit ki nɔɔɔɔ. Mazi ako arum looc, ooti niigi nɔɔnɔ ceenze o arek ɔl ele o Tabiza e. Ma avu ɲaai ci bɔyɛk, ma aliya Pitɔr, ma alu, ma ayelzek nɔɔnɔ rumane baal alolak nɔɔɔɔ Tabiza waanbaal ɲaan arogni e. ⁴⁰ Anyek ni Pitɔr ɔl dook kudunit ceenza. Ma akani kozoɲti looc, ma aɲarye. Ma ookconek ele o Tabiza e, ma anek ne, “Tabiza, tiɲa jena.” Ma akɔl niini kebere. Mazi acin Pitɔr, itiya kaavu je. ⁴¹ Ma atirit Pitɔr nɔɔnɔ kitiɲa je. Otowa ni niini ɔl o tuwento been ɲaai o boi e, ma ayelzek nɔɔɔɔ Tabiza o oroga. ⁴² Ma adala zɔɔɔ nici kutur o kazi Japa dook, ma atu ɔl ci meel Manyi. ⁴³ Ma amɔn Pitɔr Japakti iinya ci meel. Aavi niini korge o Saiman o gɔɔn adɔɔ kuwa.

Awa Korniliyas Pitɔr

10 ¹ Ma iinyaye niceke anyak eet ci kazi zaar ne Korniliyas ci abaak Sisiriya. Niini eet ci Rom, ma een alaan ci agam takirnya ceen eet tur. Awo ɔl takirnya nicoko zaar ci kazi ne Takirnya o Italiya. ² Maje Korniliyas been ɔl o kɔɔk onin dook adiɲɲan gɔɔn niigi Jook. Ma atirit ɔl ci Juz ama. ³ Ma iitene oman yomana ziiye ween iiyu acin toonnyai ci Joowo akunak nɔɔnɔ, ma awo nɔɔnɔ anek ne, “Korniliyas.”

⁴ Ma agelem niini toonnyai nico ɲoliinta, ma anek ne, “Aroɲ te naa Manyi?”

Ma abedeke toonnyaiti nɔɔnɔ anek ne, “Atalɔ Jooi ɲaryiinte unun kibeen irkente unun. ⁵ Inoko zin toon ɔl koogi kɔɔt kuture o kazi Japa ka kɔɔt kanyaakta eet ci kazi zaar ne Saiman Pitɔr. ⁶ Aavi niini ole ci Saiman o gɔɔn adɔɔ kuwa abaak liiltoga.”

⁷ Ɔɔɔ ni toonnyaiti ɲaatin. Ma awa Korniliyas ɔl ram ole o alinliɲ ceenze onin kibeen eet ceen takiren codoi ci alinliɲonek buk nɔɔnɔ ci gɔɔn buk niini adiɲɲan Jook. ⁸ Ma aduwak nɔɔɔɔ zɔɔɔ o aduwak toonnyaiti nɔɔnɔ e. Itoonek ni nɔɔɔɔ kutur o kazi Japa.

⁹ Ma iitene co mazi ɲaan awo niigi gɔla ɲaati oɲɔɲzɔti Japa, itiya Pitɔr waaz ook ɲaryiin ceez tadena. ¹⁰ Ma njinaante adawun nɔɔnɔ magiz, ma ɔɔɔɔ gi ci adak. Mazi ɲaan agɔɔn ɔl dayiin nɔkɔ, uwunozɛ niini. ¹¹ Ma wunozinte nico acin niini tammu akoli, ma acin rum ci abil kiyo rum o malkinto o akunak looc tammu tadena. Acabje rum nico aɲɛtɔ dook loronyaye ceen wec. ¹² Anyak rum nico eecitɔ kelek kebere dook, ki kaal o awo keɲtine, been kibaali o too. Maje kelek nicoko oogi abor gɔɔn ɔl o Juz ɲaati adayi. ¹³ Ma azii Pitɔr molok ci azi ne, “Pitɔr, tiɲa je. Tɔɔɔ kaal nicoko ka dawɔ.” ¹⁴ Bar abedeke Pitɔr nɔɔnɔ anek ne, “Akɔm! Kajura Manyi. ɲaan gɔɔn laadun kadak dayiin ci abor lotinowa o Joowo.” ¹⁵ Ma anek mɔloyi bodo nɔɔnɔ ne, “Má anyi dayiin ci kazi naana ne abon o kizi gerze.” ¹⁶ Ma aduwa mɔloyi nici zɔɔɔ nico lak iiyu. Imiire ni rum nici ook tamma bodo.

¹⁷ Ma abaaban Pitɔr keɲ ci wunozak nicoko ɔɔɔɔ. Mazi ɲaan abaaban niini gi nico, ivita ɔl ona itoona Korniliyas e kɔɔk ci Saiman noko, ma avu eel niigi araana. ¹⁸ Ma awe niigi ajine azi ne, “Mayo njina anyak kernoi ci kazi zaar ne Saiman Pitɔr tɔ?”

¹⁹ Mazi ɲaan abaaban Pitɔr keɲ ci wunozyak nicoko, enek Vɔɲizi o Joowo nɔɔnɔ ne, “Ziik di, anyak ɔl ceen iiyu arooɲnyin ineet ɲaato. ²⁰ Tiɲa je. Bitɔ ceez loota ka ɔɔt urumtɔ ki nɔɔɔɔ. Má ajura ɲaati orkoryu ki nɔɔɔɔ giye o eegine moden, eeci aneet neen o kitoonakin nɔɔɔɔ.”

²¹ Iiyak ni Pitɔr ceez loota, ma anek niini nɔɔɔɔ ne, “Aneeta eet ci arooɲnyan o neen nici. Avunakaɲ te naa?”

²² Ma abedeke niigi nɔɔnɔ anek ne, “Itoonanet alaani onaan kazi Korniliyas. Niini eet ci abon adiɲɲan gɔɔn Jook, ma atitiny ɔl o Juz dook nɔɔnɔ. Iiya zin uduwak toonnyaiti ci Joowo nɔɔnɔ gi ci anek ne, Toonek ɔl Pitɔr kɔɔt kutuyayin nɔɔnɔ ka ija ziik ɲaatin zɔɔɔ ci aduwakin niini ineet.” ²³ Anyaak ni Pitɔr nɔɔɔɔ ceez ka katanguzɔ baalin.

Ma ɲeere itiya niini orkorit ki nɔɔɔɔ. Ma buk ɔkɔɔ ɔl ogen ole o atuwe kuture o kazi Japa ki nɔɔɔɔ. ²⁴ Ma iitene co urumit niigi kutur o kazi Sisiriya. Maje njinaante are Korniliyas ki atenok ogin been laɲotigin o awa niini e dook Pitɔr. ²⁵ Mazi arum Pitɔr kɔɔk, iiyak Korniliyas nɔɔnɔ, ma akani kozoɲti looc ɲaatin, ma adiɲɲan nɔɔnɔ. ²⁶ Bar Pitɔr agam nɔɔnɔ aziit, ma ɲaani jena anek ne, “Tiɲa je. Keen buk naana eet ci deer kiyo niina o.” ²⁷ Ma azɔɔɔ niigi, ma avɔ niigi dook ceenza eecitɔ, ma amada Pitɔr ɔl ci meelik ger ceenza.

²⁸ Ma anek Pitɔr nɔɔɔɔ ne, “Agayu niiga dook gɔɔn naaga ɔl o Juz keere onaan alaɲ keerononeka moden ceezine cigeec, ma alaɲ buk korkorya ki nɔɔɔɔ. Bar zin Jooi eyeleyan gi ci ka koromtoya naana ki moden dook labak, eeci ɔl dook atobɔ ɲume onin kɔkɔm ɲaatineɲ ci ger. ²⁹ Zin giye nico ako mazi arumnyan mɔloyi baal itoonekan e, kiiya calaɲ kajura. Kajinuy zin di igeet, awakan naa?”

³⁰ Ma anek Korniliyas Pitɔr ne, “Balawantaal iiten o gɔl kaɲarye ceenze onan ziite ween iiyu yomana kiyo inoko noko. Mazi ɲaan kaɲarye nɔkɔ, anai eeti ci aborcek rumane ci vɔɔr per kɔɔtɔp, ma aku abil aneeta ɲuma. ³¹ Ma anekan ne, “Korniliyas, iziiwun

Jooi n̄aryiin unun, ma atalne niini irkite unun. ³²Toon zin ɔl kɔɔɔ kuture o kazi Japa ka kɔɔt kutuyayin eet o kazi Saiman Pitɔr. Niini kernoi ole o Saiman o adodo kuwa o abaak liiltoga.” ³³Taman nɔkɔ kitooneyin didi ɔl nicoko. Zin didi bonate unun atala niina zɔɔz nico, ma iyyayan kataman. Inoko zin kaavtiya naaga n̄ina n̄ume o Joowo. Kareyin ineet ka ija duwayet kaal o aduwakin Jooi ineet dook.”

Zɔɔz o Pitɔr

³⁴Ma anek Pitɔr nɔɔɔ ne, “Inoko kagawa didile Jooi alañ anyayek ɔl oogi tel. ³⁵Mã anyak modene dook eet ci adiññan Jook, ma agɔɔn kaal ci abon, agama Jooi nɔɔnɔ. ³⁶Agayu niiga zɔɔz o kaviyak o abon akati ɔl o Israyil. Kaviyak o azi ne, Anyak ɔl ganɔn n̄aaten Yesu Kiristo ween Manyi o ɔl dook. ³⁷Agayu niiga zɔɔz nica akanai looce o kazi Galili vurte o uduwake Jɔn ɔl zɔɔz o Joowo ka kotoonyɔci e. ³⁸Agayu niiga anyek Jooi Yesu o Nazaret dɔyiz been Vɔñiz onin. Iziiktu niiga buk nɔɔnɔ azɔp loocok dook aliññiñ kaal ci abon, ma arogoz ɔl dook o agit Loryenti. Agɔɔn niini nɔkɔ o, eeci arome Jooi ki nɔɔnɔ. ³⁹Ma kicinta naaga toonnyawa kaal baal agɔɔn niini loocowe o Judiya been kuture o kazi Jerusalem e dook. Otodooc zin ɔl nɔɔnɔ kadaak keete ween talakec. ⁴⁰Bar zin iinyaye ceen iyyu itijawi Jooi nɔɔnɔ daayiza, ma anyek Jooi ɔl kicinit nɔɔnɔ orogun. ⁴¹Ñaan zin bar kicinit ɔl dook nɔɔnɔ, bar kicinta naaga baal an̄eranet Jooi e doon. Ma kazolona, ma kawodena been nɔɔnɔ vurte o itijawi niini daayiza. ⁴²Ma aricaneket niini ageeta kuuwakteya kaviyak o Joowo ɔl kenekteya ne, “Yesu n̄een o anyek Jooi nɔɔnɔ kizi alaan ci ka kapak ɔl o arogi been o adaai buk.” ⁴³Baale nyakananeta dook ayɛet gi ci akati nɔɔnɔ azi ne, “Ma ɛeti o atu nɔɔnɔ aaryai n̄aatin oñe dɔyize o zaar ogin.”

Akunak Vɔñizi o Joowo moden

⁴⁴Mazi n̄aan azɔɔz Pitɔr nɔkɔ, iyyak Vɔñizi o Joowo ɔl dook o azii zɔɔz o aduwa Pitɔr e. ⁴⁵Maje ɔl ween Juz o atuwe baal ɔrkɔra ki Pitɔr kuture o kazi Japa e, ibiirit nɔɔɔ ooti giye ci anyeke Jooi Vɔñiz onin moden buk o. ⁴⁶Eeci azii niigi ɔl ween moden azɔɔz zɔɔzwe ogen, ma anaat Jook. ⁴⁷Ma azi Pitɔr ne, “Iyyak Vɔñizi o Joowo ɔl nicoko kiyo baale akunaket ageet e. Akɔm zin eet ci ka kalam nɔɔɔ n̄aati oonyene.” ⁴⁸Iricanek ni Pitɔr nɔɔɔ kotoonye zaare o Yesu Kiristo. Ma ilalek niigi Pitɔr kɔmɔn rak n̄aatineñ iinya ci miliny.

Oobek Pitɔr ɔl o tuwento kaal o agoononek moden

11 ¹Zin iziiyt toonnyawa kibeen ɔl o tuwento abaak looce o Judiya dook zɔɔz o iyyake zɔɔz o Joowo moden buk. ²Mazi ako Pitɔr Jerusalema, odomta ɔl o Juz tuwento ogen ci gɔɔn arɔɔñ moden keteede, egerenycek niigi Pitɔr anek ne, “Agoon niina gi ci ger. ³Iiten baale ako een kernoi modene o alañ aateedi, ma ook ozoltowu ki nɔɔɔ.” ⁴Enico oobek Pitɔr nɔɔɔ kaal baal akanai e dook.

⁵Anek niini nɔɔɔ ne, “Kañarye iiten baale kuture o kazi Japa, ma kawunoze. Kacin wunozyai rum ci aku tamma ci abil kiyo rum o malkinto o akunak looc acabjai ajetɔ dook loronyaye ceen wec, ma aku ajojɔzan. ⁶Mazi kagiriiny rum nico eecito, kacin kelek kebere dook, ki kaal o awɔ keñtine, been kibaali. ⁷Ma kazii molok ci anekan ne, “Tiña je Pitɔr. Tɔdɔñ kaal nicoko ka dawɔ.” ⁸Ma bar kabedeke naana nɔɔnɔ kanei ne, “Akɔm. Kajura Manyi. Ñaan laadun kadak dayiin ci abor lotinowa o Joowo.” ⁹Ma azoozekan bodo mɔloyi nici tamma anekan ne, “Má anyi dayiin ci kazi naana ne abon o kizi gerze.” ¹⁰Kazii zɔɔzok nicoko lak iyyu. Ma vurta imiurozek rum nici tammu. ¹¹Taman nɔkɔ ivita ɔl ceen iyyu ci itoonnyai looce o kazi Sisiriya. Ma avunakan ceeze baal katikene e. ¹²Ma anekan Vɔñizi o Joowo ne, Tiña je. Orkorit ki modo nicoko calañ anyei n̄oliin. Kɔrkɔrta ni ki nɔɔɔ koota Sisiriya korge o eet o kazi Korniliyas. Ma korkorya buk ki ɔl ci tuwento een tɔrkɔnɔm coko, ma kavoya naaga dook ole o Korniliyas. ¹³Ma n̄inaante uduwayet Korniliyas gi baal acini niini toonnyai o Joowo ceeze onin e. Ma anek toonnyaiti nɔɔnɔ ne, “Toon eet oma kook kuture o kazi Japa ka kook kotowayin eet o kazi Saiman Pitɔr. ¹⁴Ñaan aku aduwakin niini ineet zɔɔz o ka kuruguzin ineet been ɔl o kɔrɔk unun dook.” ¹⁵Ma kakana kuuwayei zɔɔz Korniliyas been ɔl ogin. Mazi n̄aan kazooz kuuwai nɔkɔ, iyyak Vɔñizi o Joowo nɔɔɔ kiyo baale akunaket buk ageet e ele. ¹⁶Zin enico kaada gi baal aduwa Manyi Yesu azi ne, “Oonyi baale Jɔn maami doon, maje bar igeet uunyuy Jooi tiñeere Vɔñize onin e.” ¹⁷Inoko zin kagaac anyewun Jooi moden niceke Vɔñiz onin kiyo baale anyet ageet waan o kutuyi naaga Manyi Yesu Kiristo e. Mazin yo giye nico naana keen n̄eneen ci ka waan kalam liññon ci Joowo o?”

¹⁸Mazi azii ɔl o tuwento gi nico, otoñit zɔɔz o agernyeke niigi Pitɔr e. Ma anaat niigi Jook azi ne, “Inoko anyewun Jooi moden gɔl ci ka kabadai oñene ka korogit roget o abil been neen.”

ɔl o tuwento kuture o kazi Antiyok

¹⁹Zin azaante ɔl o tuwento Jerusalema, eeci iitene baal aruyi ɔl Istiven kadaak e, akatai giden o agidi ɔl nɔɔɔ. Ma avɔ ɔl ogen n̄aatineñ looce o kazi Venosiya. Maje ogen avɔ looce o kazi Sipras. Bodo ogen avɔ kuture o kazi Antiyok. Ma avɔ aduwak niigi kaviyak o Joowo ɔl o Juz doon. ²⁰Maje ɔl o tuwento ogen ole o avu Siprasa kibeen Sariina ɔɔt Antiyokti, ma avɔ uwayek buk niigi zɔɔz o Joowo moden n̄inaante. Ma aduwak nɔɔɔ kaviyak o abon o akati Yesu Kiristo. ²¹Maje dɔyizi o Joowo aavi n̄aatineñ, ma atu modena ci meel ger Jook, ma avu ano Manyi.

²²Mazi avɔ azii ɔl o tuwento Jerusalema kaviyak nicoko, itoonit niigi Barnabas kook Antiyokti. ²³Mazi ako arum niini Antiyok, icin niini mayuwenet o amayuwi Jooi ɔl, ma atalne niini, ma aricanek nɔɔɔ kagamit Jook ɔrɔɔt. ²⁴Maje waanice Barnabas niini eet ci abon anyak Vɔñiz o Joowo been tuwen ɔrɔɔt. Ma buk anyek niini ɔl ci meel n̄inaante kutuweec Manyi.

²⁵Ook ni Barnabas kuture o kazi Tarsas ka kook kɔrɔɔñ Cɔl. ²⁶Mazi ako ajowa niini nɔɔnɔ, ooyi nɔɔnɔ Antiyokti. Ma irkit nice dook arome niigi dook ramantiya been ɔl o tuwento, ma ademez niigi ɔl ci meel ger. Zin nica kutur baal laadun akanoneke ɔl o atuwe zaara o kazi Kiristan e neen.

²⁷Ma iinyaye niceke ɔtɔɔz ɔl ceen nyakananet ci Joowo Jerusalema ɔtɔ Antiyokti. ²⁸Ma n̄inaante itijã ɛeti codoi n̄aatineñ ci kazi zaar ne Agabas jena, ma aduwak niini ɔl Vɔñize o Joowo zɔɔz ci akati tarjo ci appe ka kiiyak looc dook. ²⁹Zin giye nico orooñit ɔl o tuwento dook ka kolotit guruc ci ka kitiriti niigi gɔɔnɔgi o tuwento abaak looce o kazi Judiya. ³⁰Uluta ni didi niigi guruc, ma anyek Barnabas ki Cɔl ka konyowoztek alaati o tuwento Jerusalema. Zin didi iyya tarjo nica iitene baal agami alaani o kazi Kaladiyas looc e.

Piryakzet ci ɔl o tuwento

12¹ Ma iinyaye niceke akata alaani o kazi Erod giden ci agidi ɔl o tuwento oogi. ² Anyek niini Jemis ween gɔtoni Jon kuruyit ɔl nɔɔnɔ dilawa kadaak. ³ Mazi acin Erod ɔl o Juz atalne giye nico, utugu gi ci ger bodo ci ka kagamti ɔl Pitɔr. Agooni gi nici iinyaye o gɔɔn aloten ɔl o Juz adayi ɔɔken o alaɲ amokcar. ⁴ Agamit ni ɔl Pitɔr, ma avɔ aryek nɔɔnɔ sijn. Ma aɲera Erod takirnya amɔnki tɔrkɔnɔm kɔɔt kebeyit Pitɔr sijina. Ma aɲer takirnya eleeti lelenet wec ka kanyɔɔi beyiin, ma anyɔn niigi beyiin ɔl wec wec. Maje Erod arɔɔɲ kooyi Pitɔr ka kook kapaktek ɔl nɔɔnɔ daayiz kɔla iitene ci aɲorneke loten o Juz vardanjinto. ⁵ Maje maɲaan aavi Pitɔr sijina e, ajinak ɔl o tuwento nɔɔnɔ Jook ɔɔɔt.

OboroƆai Pitɔr sijina

⁶ Ma baaline ci ka kalai iitene ci ka waan kapayekɛ Erod Pitɔr daayiz o, ɔɲɲ Pitɔr ɲaati aɲereke takirnya raman nɔɔnɔ kɔrgen acabji azeena ziiye raman. Maje bodo takirnya ogen abek araan o sijino. ⁷ Ma ɲinaante iya toonnyaiti ci Joowo olla boyoɲɲoɲ, ma ataran ceez ci ona acabin Pitɔr o wak. Ma iɲka toonnyaiti Pitɔr amɔɔni dodop ka kicine, ma anek nɔɔnɔ ne, “Tiɲa je taman.” Ma iɲaaz didi Pitɔr jena, ma iina ziiya azeene cigin o. ⁸ Ma anek toonnyaiti nɔɔnɔ ne, “Borocek rum unun been caava.” Ma agɔɔn Pitɔr nɔkɔ, ma anek toonnyaiti bodo nɔɔnɔ ne, “Doma rum unun malkinto. Nowawan.” ⁹ Ono ni Pitɔr nɔɔnɔ, ma adun sijina. Bar Pitɔr alaɲ aga gi ci agoonek toonnyaiti o gi ceen didi, bar olla abaaban niini anyek kizi wunozyak. ¹⁰ Ma adicek niigi abatak takirnya ci oowu o, ma avɔ bodo abatak ci korgenu e zɛɛ ma avɔ arum araan ween ziit aɲorneke. Ma akɔl araani nici ele doon kɔkɔm eet ci deer, ma adun niigi bitaala. Oneec ni niigi gɔl ɔɔɔɔɔ. Taman nɔkɔ izi toonnyaiti ɔim.

¹¹ Zin ɲina agawun Pitɔr gi ci ona agoononek nɔɔnɔ o, ma azi ne, “Inoko kagawa naana gi nico didi juruɲ. Itoona Manyi toonnyai onin ka kiiya korogozan aneet ɔyize o Erod been ole o Juz o arɔɔɲ kutuguzeyan kaal ci ger.”

¹² Mazi agawun niini oboroƆa didi toonnyaiti nɔɔnɔ, ook ole o Meri ween yaati Jon Marko. Maje ɔl ci meel ɲinaante alote aɲarye ka kitirit Jooi nɔɔnɔ. ¹³ Ma ɲintimiliny nɔkɔ eteren Pitɔr karogi o anyoogene kaluwa, ma aku gabarenti ceen dole ci ɲaai ci kazi zaar ne Roda ka kiiya kɔkɔl karogi. ¹⁴ Mazi ka kɔkɔl karogi, iziiwun niini Pitɔr molok, ma atalne ɔɔɔt zɛɛ makacin imiurozek ceez iɲaan kɔkɔl karogi. Ma akɔ anek ɔl ne, “Pitɔr abil bitaala.”

¹⁵ Ma anek niigi nɔɔnɔ ne, “Aamnyin maɲɔni.”

Bar anek niini nɔɔɔ ne, “Didile nɔɔnɔ gi. Alaɲ kalutuɲ.”

Ma abedeke niigi nɔɔnɔ anek ne, “Coma een toonnyai o Joowo o gɔɔn abek nɔɔnɔ.”

¹⁶ Maje bar Pitɔr ɲaan ateren karogi nɔkɔ. Mazi akɔ akɔl eeti codoi karogi, iya Pitɔr eecitɔ, ma acin niigi nɔɔnɔ, ma abiiir nɔɔɔ ooti tet. ¹⁷ Ma adɔɲ niini aziit anek nɔɔɔ ne, “Ajaktɔ di.” Oobek ni niini nɔɔɔ gɔl o aduɲnan Manyi nɔɔnɔ sijina. Ma anek niini nɔɔɔ ne, “Uduktak zɔɔz nico Jemis kibeen ɔl o tuwento dook.” Otoɲek ni niini nɔɔɔ looc ook ɲaaman.

¹⁸ Mazi akɔ aaliz tammu, olla egenyenyit takirnya o abek sijn e arɔɔɲ Pitɔr. Ma anɔ ne, “Gitaz ci utuguwozek eet we o? Mayo ook niini ɲaadaɲ?” ¹⁹ Ma aricanek Erod takirnya ka koroɔɲit nɔɔnɔ juruɲ, ma bar ɲaan niigi kojokta nɔɔnɔ. Ma aricanek Erod alaan uneɲ ka kegez nɔɔɔ juruɲ. Apayewun ni Erod nɔɔɔ daayiz.

Mazi akɔ adicai zɔɔz nici, itiya Erod Judiya, ook avu kuture o kazi Sisiriya.

Daayiz o Erod

²⁰ Ma iinyaye niceke abornek Erod ɔl o Tayor ki ɔl o Sidon nɔɲ ɔɔɔt. Ivita ni ɔl ceen kɔle loocowe niceke ka kivita kimicit ki nɔɔnɔ. Ɔɔwa rak arumɔ niigi kibeen eet o kazi Balastus o alijliɲ ole o Erod, ma agama Balastus ka kitirit nɔɔɔ. Enice ele ɔɔtɔ ɔl nici ɲaati Erod avɔ arɔɔɲ ganɔn ɲaatin, eeci gɔɔn dayiin cigeecik avu looce ci abal Erod o. ²¹ Ma iitene o ka kurumtɔi niigi kibeen Erod, oborocek Erod rumanɛ ogin alaazetu. Maje ɔl ci meel ger alotak nɔɔnɔ, ma uwayek niini nɔɔɔ kaal. ²² Ma agerɛny ɔl anɔ ne, “Alaɲ een nicini eet ci deer. Niini Jook gi.” ²³ Taman nɔkɔ iya toonnyaiti ci Joowo, ma anyek Erod kɔmɔɔr, eeci agama zɔɔz ci adiɲɲani ɔl nɔɔnɔ o, ma bar alaɲ anyek ɔl kidiɲɲanit Jook. Adayit ni nɔɔnɔ kuluuta zɛɛ makacin adaawa.

²⁴ Adala ni zɔɔz o Joowo iinyaye niceke loocok dook, ma atuwe ɔl ci meelik.

²⁵ Maje Barnabas kibeen Cɔl ɔɔt anyek guruc baalke alaat o tuwento Jerusalema, ma amiiri niigi avɔ Antiyokti. Ma azɔt niigi buk Jon Marko.

Itoon ɔl o tuwento Barnabas kibeen Cɔl

13¹ Ma ole o tuwento o abaak Antiyokti anyak nyakaɲanet ci uuwak zɔɔz o Joowo kibeen ɔl ci ademzek ɔl zɔɔz o Joowo. Ɔl nicigi awɔyi Barnabas, ki Simiyan ci akanek ɔl zaar ci kazi Koli, ki Luciyas o aku looce o kazi Sariin, ki Manan baal abaakzai kibeen Erod ween alaan ɲaatodoi e, been Cɔl. ² Ma iitene oman mazi avɔ adiɲɲan niigi Jook ɲaati oɔɲni dayiin, iyyak Vɔɲjizi o Joowo nɔɔɔ, ma anek ne, “Eɲertayaɲ Barnabas kibeen Cɔl ka kilijliɲit liɲliɲɔn o kaɲerai naana nɔɔɔ.”

³ Otoɲit ni ɔl o tuwento dayiin, ma aɲarye, ma ataadek azɛɛn ugeec nɔɔɔ, ma itoon nɔɔɔ eo aroɲɲi Vɔɲjizi o Joowo.

Uuwak Cɔl ki Barnabas looce o kazi Sipras

⁴ Ma itoon Vɔɲjizi o Joowo Barnabas kibeen Cɔl kɔɔt looce o kazi Selusiya, ma ɲinaante otooɲit kavool o liilu, ma avɔ looce o kazi Sipras. ⁵ Mazi avɔ arum kutur o kazi Salamis, ɔɔt uuwak zɔɔz o Joowo ceezine o Juz lotento. Ma gɔɔn ɔrkɔr niigi kibeen Jon Marko ka kitirit nɔɔɔ buk liɲliɲɔnta.

⁶ Ma abatak niigi looc o kazi Sipras, ma avɔ arum ɲinti kazi Papos. Ma ɲinaante urumtɔ kibeen eet ceen ɲari kazi Bar Yesu. Niini eet ceen Juz ci anyek ele kizi nyakaɲan, alaɲ zin bar een nyakaɲan ci Joowo. ⁷ Niini laɲoti alaan o ageny kazi Sergas Palos o abal Sipras. Ma awa alaani nici Barnabas been Cɔl ka kivitak nɔɔnɔ, eeci arɔɔɲ kiziik niini zɔɔz o Joowo ɲaatineɲ. ⁸ Maje bar eeti ceen ɲari kazi zaar oogi ne Elimas noko amarnin nɔɔɔ. Ma akat niini alaan vɔlɔɲa ka calaɲ atu zɔɔz o Joowo. ⁹ Maje bodo Cɔl o kazi zaar oogi ne Pɔl iyyak nɔɔnɔ Vɔɲjizi o Joowo ɔɔɔt. Ma agelem niini eet ceen ɲari noko. ¹⁰ Ma anek ne, “Ineet ɲɛerti Loryento. Een niina maryoi ci kaal o abon dook. Alaba niina ɔl kaale o ger agoon dook. Atultul gɔɔn niina tup ɲaati arɔɔɲe gɔl ci anyeke leeminet o Manyi kizi vɔlɔɲ. ¹¹ ɲaan zin atoryin Manyi ineet inoko ele ɲina. Inoko rak een ruben calaɲ acine iinya ki iinya.”

Taman nɔkɔ izi didi nɔɔnɔ kebere kalimik. Ma atamtamen looc arɔɔɲ eet ci ka kiyit nɔɔnɔ. ¹² Mazi acin alaani kaal ci agooni o, utuwa, eeci abiiir nɔɔnɔ ɔɔ ɔɔɔt ele ɲaaten demziin o akati Manyi.

Ako Pól Antiyokti o looc o kazi Pisidiya

¹³ Ma iinyaye ogen ootodit Pól been ol o ɔrkɔr ki nɔɔnɔ kavool o liilu Paposá, ɔt kuture o kazi Perga looce o kazi Pampiliya. Maje Jón Marko ɔtɔ niini imiire ook Jerusalemá. ¹⁴ Itiŋgazo ni niigi Pergakti, ma avo zee been Antiyok o aavi looce o kazi Pisidiya. Ma iitene o yubzento ɔtɔ niigi ceeze o lotento, ma avo aavtiz loota. ¹⁵ Ma vurma mazi ekee bit ol warage o Mosis been waragenya o ayeet nyakananeta, enektek alaata o ceez o lotento nɔɔgo ne, “Gɔtɔnɔga, mā alam te zɔɔz ci dizkento anyaku, karoonyunɔ ka uduktak ol.”

¹⁶ Itiŋa ni Pól jena, ma adonɔ aziit ka kitivan ol, ma anek nɔɔgo ne, “Iziiktaŋ di niiga dook ol ogane eeginu Israyil kibeem ol o eeginu moden o agamtawu Jook. ¹⁷ Ma Jooi ci ol ci Israyil noko enjera baale jigitigaac. Ma anyek nɔɔgo kiziti bor ci appe waano abaa niigi kiziti mirɔk looce o kazi Masir. Ma adunɔnan Jooi nɔɔgo dɔyize onin adikir. ¹⁸ Ma azooni Jooi nɔɔgo irkitok eet ram balala. ¹⁹ Ma azaan Jooi boryok ween moden een torgerem baal abaa looce o kazi Kanan e lai, ma anyek looc nice nɔɔgo ween ol ogin kazi Israyil. ²⁰ Ma kaal nicaga agooni irkitok ceen eet tur lak wec ki eet ram kamɔtɔ. (450) Zin enice anyek Jooi ol ci aganek zoosok payiinta kabalit nɔɔgo zee been iiten o nyakanan o kazi Samwel. ²¹ Ma iinyaye niceke ijinit niigi Jook ka kanyek nɔɔgo alaan ci adikir ci ka kabal nɔɔgo. Anyek ni Jooi nɔɔgo alaan o kazi Cɔl ween ŋeerti Kic ween borit o Benjimen, ma abal Cɔl nɔɔgo irkitok eet ram. ²² Mazi ako aboroc Jooi Cɔl, arigzek Jooi Devid kizi alaan cineenɔ. Ceeni zin zɔɔz o aduwa Jooi akati Devid azi ne, “Kaga naana Devid ween ŋeerti Jesi. Kareez naana nɔɔnɔ. Niini eet o ka kutugu kaal o karoonye naana nɔɔnɔ kutugu dook.” ²³ Zin Devid nici jijiti Yesu o anyek Jooi kizi ruguzoi o ol o Israyil kiyo baale aterket niini e. ²⁴ Zin ma ŋaan kakata Yesu liŋliŋon onin e, uwayek rak Jón ol o Israyil zɔɔz ci anek ne, “Abadai zinzeeti onene ugooc ka otoonye.” ²⁵ Mazi ka kidica Jón liŋliŋon onin e, ajin niini ol anek ne, “Aniyu yo dim gɔɔn niiga ne, Keen naana ŋeneen? Alaŋ keen naana eet o areyu neen. Bar eeti o areyu niiga nɔɔnɔ ŋaan anowan aneet vurma. Ma alaŋ katin naana kaganona ŋaati kaborcane caava ogin zoonu, eeci adiŋdiŋ niini ɔtɔtɔ ele.”

²⁶ Iziiktaŋ zin di niiga ol ogane Israyil o eeginu dɔl ci dɔl o Ibrayim kibeem buk niiga ol o eeginu moden o adiŋdiŋanu Jook ŋina. Itoonyaket zɔɔz ci rogeto noko ageet dook. ²⁷ Eeci ol baal abaa Jerusalemá e kibeem alaate ugeec ŋaan kagaac Yesu een Kiristo baal are niigi e neen. Ma alaŋ buk aga niigi zoosok baal ayeet nyakananeta, baal gɔɔn akeep ol iinyaye o yubzento dook e. Anyek zin niigi zoosok o nyakananeta keleemte gole o apakteke Yesu daayiz. ²⁸ Yo nuun waanice ma ɔkɔma gi ci ka kapakteke niigi nɔɔnɔ daayiz e, alaate niigi alaan o kazi Pailat ka kuruk nɔɔnɔ kadaak. ²⁹ Ma vurte o otodoyi niigi nɔɔnɔ keete ween talakec, ma utuguzeke nɔɔnɔ kaal dook kiyo ayeedi waragewe o Joowo o, aarya nɔɔnɔ keete ween talakec, ma avo arek bɔɔt. ³⁰ Bar zin Jooi itinawu nɔɔnɔ daayiza. ³¹ Ma iinyaye ci meelik eyelizak Yesu ele ol ogin baal ɔrkɔra been nɔɔnɔ Galiliya avunak Jerusalem e. Ma inoko iziti niigi bacok giye nico ole o Israyil. ^{32–33} Inoko zin naaga buk ŋina kanyaakun igeet kaviyak o abon. Zin gi baal aterkedek Jooi jigitigaac e utuguwe ŋaatinai ageet o keegin dɔl ci dɔl ugeecik gole o inani Yesu daayiza. Kiyo ayeedi waragewe o beniinowu zooc ram azi ne, “Een niina ŋeeran. Waanico kayeeli naana ol gi o keene naana baatun.” ³⁴ Aduwa Jooi zɔɔz ci akati ŋaazi o Yesu daayiza ki gi o alaŋ adaanɔni bodo azi ne, “Ŋaan kanyin mayuwenet onan een didi baal katerkedei Devid e.”

³⁵ Buk baale anek Devid Jook waragewe o beniinowu ne, “Alaŋ uun niina gabaren unun abon kumu loowa.”

³⁶ Alaŋ zin Devid aduwa zɔɔz ci akati ele onin, eeci baale ma ŋaan arogi niini e, agɔɔn niini kaal o aroonyek Jooi nɔɔnɔ kutugu. Ma waanice adaak niini, ma ada ol nɔɔnɔ ŋaao adawin jigitigine, ma ame ele onine loowa. ³⁷ Bar zin Yesu neen o itinawu Jooi nɔɔnɔ daayiza inaan kumu. ³⁸ Gɔtɔnɔga, abon agayu niiga dook ŋaaten Yesu uwayize zɔɔz o aaran Jooi onje ola. ³⁹ Zin eeti o atu Yesu ɔɔɔjai niini onene baal alaŋ lotinowa o Mosis aara e. ⁴⁰ Egenyit zin ka calaŋ zɔɔz baal aduwa Jooi nyakananeta e akunakun igeet. ⁴¹ Baale azi niigi ne, “Niiga ol o gɔɔn adonɔnɔ nyigita, ma apezu gi ween didi, icinit gi ci ka kutugu ce. Ateedun tedec gi nici biye. Tedec mā acinu gi nico, adaanɔnu. Eeci gi ci ka kutugu naana iinya nicoko noko, yo nuun oobekun ol igeet, alaŋ atuyu.”

⁴² Mazi odotiz Pól zoote nico, udunda niini been Barnabas ceeze o lotento. Ma aduwak ol nɔɔgo kabada bodo iitene ci yubzento aku e, ka kiiya kuduktak niigi nɔɔgo kaal ci eel kiyo nici noko bodo. ⁴³ Ma vurma mazi azaani ol lotenta, oneec ol ci Juz meel kibeem moden o adiŋdiŋan Jook Pól been Barnabas. Ma aduwak Pól kibeem Barnabas nɔɔgo zoosok ci ka kodakti niigi tuwenta ka kabaayit baayiz o Joowo abon.

⁴⁴ Ma iitene ci yubzento oman, iridjai ol o abaa kutura ka kivita kiziiyit zɔɔz o Joowo. ⁴⁵ Mazi avo acin ol o Juz kɔle, inyigitita. Ma akɔny zɔɔz o Pól kizi vɔlɔnɔ, ma bar aduwa zɔɔz ci ger akani nɔɔnɔ. ⁴⁶ Bar enico Pól been Barnabas ozoosit moozeta ɔtɔtɔ. Ma anek ol o Juz ne, “Laadun aganɔ waan rak ŋaati kuuwayekun zɔɔz o Joowo ɔwa igeet ol o Juz. Zin giye o utuburtu niiga zɔɔz nico, ma icintu eleeti ugooc alaŋaan aganonu ŋaati ajowanu roget o abil been neen, ŋaan kuunɔnɔn igeet ka koota kuuwakteya zɔɔz o Joowo ol ween moden. ⁴⁷ Eeci aricaneket Manyi ageeta zɔɔz ci azi ne, “Kitoonun igeet ka iziti vooritin ci modenu, ma buk eeginu gɔl ci rogzen ci ol o loocu dook.”

⁴⁸ Mazi azii ol ween moden zɔɔz nico, ataltɔ niigi, ma anaate Jook zoote o akati Yesu. Utuyo ni ol baal laadun anjerak Jooi nɔɔnɔ roget o abil been neen.

⁴⁹ Ma azaanonek zɔɔz o Joowo kuturyok o looc nice dook. ⁵⁰ Maje bar ol o Juz amacuc alaate o kutur nice kibeem ŋaai o moden ween arɔk gɔɔn adiŋdiŋan Jook ka kotobortek niigi Pól been Barnabas nɔnɔ. Ma anyek niigi ol kigidit Pól kibeem Barnabas, ma atooyek tuu. ⁵¹ Ma adunɔta Pól ki Barnabas tɔdɔ zɔɔne ka kizi yelzan o aborni ol o kutur ci kazi Antiyok noko zɔɔz o Joowo. Idicek ni niigi ɔtɔ kuture o kazi Ikoniya. ⁵² Maje ol o tuwento abaa Antiyokti anyak Vɔŋiz o Joowo zinzeetine, ma atalne ɔtɔtɔ.

Uuwak Pól kibeem Barnabas Ikoniya

14 ¹ Ma Ikoniya ŋinaante ɔtɔ Pól kibeem Barnabas ceeze o lotento, ma avo uuwak dɔyize o Joowo, makacin ol ci meel ole o Juz been moden oogi utuyo. ² Maje bar ol ci Juz ogen calaŋ arɔnɔ kutuyo amacuc moden, ma akat nɔɔgo zɔɔza ka kotoborit nɔnɔ ka kigidit Pól ki Barnabas been ol o atuwe. ³ Ma amon Pól kibeem Barnabas ŋinaante ŋinti wun, ma uuwak niigi zɔɔz o Manyi moozeta. Ma ayeelza Manyi zɔɔz uneen akati reezinet onin kibil tɔ ŋaati anyeke nɔɔgo dɔyiz ci agɔɔni kaal ci atee ol biye. ⁴ Enjerto ni ol o kuturo lak ram. Ceegi agama zɔɔz ci ol ci Juz o, maje ceegi agama zɔɔz o toonnyawu.

⁵ Oromit ni modena eleeti kodoye kibeem Juz been alaate ugeec ka kigidit toonnyak ka kavacit nɔɔgo biyene kadaayito. ⁶ Mazi azii toonnyawa gi nico, ivirit ɔtɔ kuture o kazi Litra kibeem kuture o kazi Darbi o eel looce o kazi Likoniya kibeem viten o ajɔnɔz loocok niceke. ⁷ Ma ŋinaante ɔtɔ uuwaktek niigi ol kaviyak o Joowo abon.

Atirit Pól eet ci ɲanyɲany

⁸ Maje kuture o kazi Litra anyak eet ci aritai kizi ɲanyɲany calaɲ awo been neen. ⁹ Aavi niini ɲinaante, ma azii zɔɔz o Pól. Ma agelem Pól nɔɔnɔ ɔɔɔt, ma acin nɔɔnɔ anyak tuwen ci ka kanyek nɔɔnɔ kobona. ¹⁰ Ma anek Pól nɔɔnɔ molowe ci appe ne, “Tiɲa jena. Zolan zɔɔ.” Ma iɲaaz didi eeti nici jena taman nɔkɔ, ma awo. ¹¹ Mazi acin kɔle gi ci agɔɔn Pól o, egerenyit zooze uneɛɛn een Likoniya anɔ ne, “Ivitayet joowane eleetine ci ɔl ci deer.” ¹² Ma akanek niigi Barnabas zaar ci jook uneɛɛn kazi Zuus. Maje Pól akanek zaar ci jook uneɛɛn kazi Ormez, eeci azɔɔz niini ɔɔɔt. ¹³ Maje ceez ci jook cineɛɛn kazi Zuus noko aavi waanice kutur nice kabanyca. Iiya ni alaani ci ceez ci jook cineɛɛn kazi Zuus noko. Anyaa tiin ceen olenya ci anyak koroboli aletmetine zɛɛ been araan. Arɔɔɲ niini been kɔle kutuguzek todoyok toonnyak, eeci abaaban niigi anɔ ne, ɔl nicigi joowane gi.

¹⁴ Mazi azii Barnabas been Pól gi ci arɔɔɲ kutuguzek niigi nɔɔɔɔ o, ereecit rumanɛ ugeec maany, eeci gi nici gerze ɔɔɔt Joowa. Ma adokonyonek niigi kɔle eecitɔ, ma agerɛny nɔɔɔɔ anek ne, ¹⁵ “Má agoonu gi nico nɔkɔ. Naaga keegina ɔl ci deer kiyo niiga o. Kaavtiya ɲina o ka kuuwakteyɲ iɛget zɔɔz ci ka otoɲti diɲɲaninet ci adiɲɲanɲu joowane o labak adilyai, ka bar idiɲɲanit Jook o arogi tamma. Jook nico neen o eɛnyca tammu taden ki looc ki liilok been kaal o anyak niigi dook. ¹⁶ Baale ooɲ niini moden dook kutuguzɔ kaal o arɔɔɲ kutuguzɔ niigi labak. ¹⁷ Bar zin gɔɔn ɲaan niini ayelza eɛ ɔla kaale o abon agoonek niini nɔɔɔɔ. Nɔɔnɔ neen o anyɲɲ iɛget tammu tiilez been manɛen o gɔɔn abiir keberece uneɛɛn. Ma anyɲɲ buk niini iɛget dayiin, ma anyek zinzeeti ugooc katalto.” ¹⁸ Alamit ni toonnyawa ɔl o arɔɔɲ kotodoɲtek nɔɔɔɔ todoyok, bar zin yo nuun aduwak niigi nɔɔɔɔ zɔɔzok nicoko o, alaɲ niigi arɔɔɲ kiziiyit jurɲɲ.

¹⁹ Ma vurtā ivitā ɔl o Juz ogen Antiyokti looce o Pisidiya kibeen Ikoniya. Ma avu akana niigi kɔle kavacit Pól biyene. Ma avac nɔɔnɔ zɛɛ makacin abaabanit kizik adaawa. ɔt ni ujuktek tuu. ²⁰ Bar mazi alotak ɔl o tuwento Pól, ma avu eelnek nɔɔnɔ, itiɲa bodo niini jena, ma amiironek kutur. Ma iitene ci aalna o ɔtɔɔzɔ Pól kibeen Barnabas ɔtɔ kuture o kazi Darbi.

Amiironek Pól kibeen Barnabas Antiyok

²¹ Ma Darbiya ɲinaante ɔt uwayit Pól kibeen Barnabas zɔɔz o Joowo, makacin utuyɔ ɔl ci meelik. Ma amiironek bodo kutur o kazi Litra ki kutur o kazi Ikoniya kibeen kutur o kazi Antiyok looce o kazi Pisidiya. ²² Ma ilot niigi ɔl o tuwento kuturyowe nicoko kodoyit kak, ma ilot nɔɔɔɔ ka kemedak tuwen Joowa. Ma ademez nɔɔɔɔ anek ne, “Naaga o katuwe dook kapirna tiɲeere kaale ci meelik loota ɲina maɲaan rak naaga kɔɔtɔ baliinte o Joowo tamma o.” ²³ Ma aɲera niigi alaati ci ɔl o tuwento kuturyowe nicoko dook. Ma adiɲɲan Pól ki Barnabas Jook ɲaati ooɲni dayiin, ma aɲaryɛ, ma anyek niigi alaati nicoko Jook o atu niigi ka kozooti nɔɔɔɔ nɔkɔ.

²⁴ ɔtɔ ni niigi, ma avɔ adiiir looc o kazi Pisidiya, ma avɔ zɛɛ been looc o kazi Pampiliya. ²⁵ Ma avɔ uuwak zɔɔz o Joowo kuture o kazi Perga. Ma adicek avɔ kuture o kazi Ataliya. ²⁶ Ma ɲinaante ootodit kavool o liilu, imiirtozek kutur o kazi Antiyok baal itooni nɔɔɔɔ ɔl o tuwento kɔt kuuwakti zɔɔz o Joowo e, eeci idica niigi liɲliɲon uneɛɛn.

²⁷ Mazi avɔ arum Antiyok, uluta niigi ɔl o tuwento kivitak ɲintodoi, ma aduwak nɔɔɔɔ kaal baal agɔɔn Jooi ɲaaten nɔɔɔɔ e dook. Ma aduwak buk niigi nɔɔɔɔ gi o anyeke Jooi moden gɔl ci ka kutuyɔi. ²⁸ Ma aavtiz niigi ɲinaante ɲinti wun arome kibeen ɔl o tuwento.

Loten o ɔl o tuwento Jerusalema

15 ¹ Ma avu ɔl ogen looce o Judiya avunak Antiyok. Ma avu ademez ɔl o tuwento anek ne, “Alaɲ bai ajowanu roget o abil been neen mā alaɲ ateedinu kiyo baale aduwa lotinowa o Mosis e.” ² Mazi azii Pól been Barnabas zɔɔz nico, adaɲtɔ ki ɔl nicoko ɔɔɔt. Makacin giye nico eɲɛta ɔl o tuwento Pól kibeen Barnabas kibeen ɔl koogi ole o tuwento Antiyokti ka kɔt Jerusalema kɔt kuduktak toonnyak kibeen alaati o ɔl o tuwento zɔɔz nico.

³ Ma itoonek ɔl o tuwento nɔɔɔɔ gɔl. Mazi avɔ adiiir looc o kazi Venosiya kibeen Samariya, uduktak niigi ɔl o tuwento loocowe nicoko zɔɔz o utuyi modena Jook. Mazi azii ɔl o tuwento kaviyak nicoko, ataltɔ niigi dook ɔɔɔt eɛ. ⁴ Mazi avɔ arum Pól kibeen Barnabas been ɔl o tuwento ɔrkɔr ki nɔɔɔɔ Jerusalem, atalta ɔl o tuwento ki toonnyak been alaati o ɔl o atuwe nɔɔɔɔ. Ma oobek Pól ki Barnabas nɔɔɔɔ kaal o agɔɔn Jooi ɲaatineɛɛn dook. ⁵ Maje bar ɔl ogen ci rak baale een ɔl ci Parici, ma ivita utuweec Yesu itingazɔ jena, ma azi ne, “Abon ɔl ceen moden atuwe o ateedi. Uduktak buk nɔɔɔɔ kuzuuti lotinok o Mosis dook.”

⁶ Ma alote toonnyawa kibeen alaati o ɔl o tuwento ɲaatodoi ka kabaabanit gi nico. ⁷ Ma adaɲɲ giye nico ɲinti wun zɛɛ makacin vurtā itiɲa Pitɔr jena, ma azi ne, “Gɔtɔnɔga, agayu niiga nɔkɔ baale eɲɛrawan Jooi ɲaatunooɲ ka kuuwayizek moden kaviyak ogin abon ka zin buk niigi kiziiyit, ma atu. ⁸ Ma Jooi o aga zinzeeti o ɔl dook eyelizayit gaman o agaman niini moden o utuweec nɔɔnɔ giye o anyeke niini nɔɔɔɔ Vɔɲiz onin kiyo buk baale anyet ageet e. ⁹ Zin giye nico eyeliza Jooi tobɔnet o katobɔne naaga dook kibeen moden. Ma aara Jooi ooɲ ugeec, ma anyek zinzeeti ugeec kobonta, eeci utuyɔ buk niigi. ¹⁰ Zin yo arooɲnyu anycek Jook kotobor nɔɲ giye ci adaɲɲeku ɔl ceen moden atuwe o gɔl ci ka kuzuuti lotinok o jijiitigaac o naagalya Juza alaɲ kanim kuzuuti, ma buk baale jijiitigaac alaɲ azooni o naa? ¹¹ Naaga Juza alaɲ keɛlyai gole ci kazooni lotinok cigaac o. Katu naaga Jook, ma eɛlanet niini ageet ɲaaten Manyi Yesu kiyo buk eɛla niini moden o.”

¹² Oobtek ni Barnabas kibeen Pól nɔɔɔɔ kaal baal atɛt ɔl biye baal agɔɔn Jooi ɲaatineɛɛn ole ween moden e. Mazi azii ɔl o tuwento dook zɔɔz nico, ajaktɔ tiv. ¹³ Mazi odotiz Barnabas ki Pól zɔɔza, itiɲa bodo Jemis jena, ma azi ne, “Iziiktaɲ di gɔtɔnɔga. ¹⁴ Oobeket ona noko Saiman Pitɔr gi o akunake Jooi moden gole o aɲɛran ɲaatineɛɛn ɔl oogi kizi ɔl cigin. ¹⁵ Ma zɔɔzowa o nyakananetu atobɔ kibeen zɔɔz nico ɔɔɔt eɛ. Ayeedi waragewe o Joowo gi ci ane Manyi ne, ¹⁶ “Katin ɲaan kabada ka kiya keteeny baliin o Devid baal oyoki e, ma kadon kɔdɔk bodo. ¹⁷ Kagoon zin naana katin nɔkɔ o, ka ɔl ci loocu noko dook kivitayan aneta, eeci keɲera buk moden kiziti ɔl cigan. ¹⁸ Gi zin o aduwa Manyi neen nici, ma naaga dook kagaac gi nico baale.”

¹⁹ Ma amena Jemis azi ne, “Kabaaban zin naana alaɲ abon ɲaati kamacuci moden o atu Jook. ²⁰ Bar abon kayeedek nɔɔɔɔ warage ci kaneki ne, “Edeya eleeti dayiine ci ataabi ɔl joowane o adilyai. Otoɲit waanzet. Má adaku kelek calaɲ atɛt ɔl aletmeti. Má adaku biye. Eeci mā agoonu niiga kaal nicoko ɲaati aromenu kibeen ɔl o Juz, abornekuɲ koca niigi iɛget nɔɲ.” ²¹ Eeci gɔɔn akeɛp ɔl lotinok o Mosis abor kaal nicoko ceze o lotento irkitok ci meel iinyaye o yubzento dook. Ma uuwak ɔl zɔɔzok o Mosis kuturyowe dook.”

Warage ci itoononek moden o atuwe

²² Ulute ni toonnyawa ki ol o mayan ole o tuwento ki ol o tuwento dook, ma aŋera niigi ol ci atuwe oogi ŋaatineej ka kitoonit nɔɔɔ korkorit kibeen Pɔl been Barnabas kɔɔɔ ole o tuwento Antiyokti. Aŋera niigi Silas kibeen Judaz o kazi Barsabas. Ol ceen ram noko ol ci titiny waanice ɔɔɔɔ ole o tuwento. ²³ Ma ayeet niigi warage, ma anyek nɔɔɔɔ kooti. Azi waragewi nici ne, “Ageeta toonnyak kibeen alaat o ol o tuwento o keegina gotonogu kazaayun igeet dook o eeginu moden o atuwenu Antiyokti ki Siriya been Silisiya. ²⁴ Kiziikta naaga azi ol ne, Anyak ol oogi ŋaatinaaŋ ci ɔɔɔ ŋaatunooŋ ŋinaante, ma uulaltun zooze o aduwakuŋ niigi igeet. Avɔ zin ol nici ŋaatunooŋ niigi doon. Alaŋ kitoona naaga. ²⁵ Zin giye nico kulutewa naaga dook, ma kaŋerana Judaz been Silas ci kitoonekuŋ igeet noko. Ol nicigi ɔɔɔ kibeen laŋotigaac o kazi Pɔl been Barnabas. ²⁶ Nɔɔɔɔ neen o goon arɔɔŋ kuruyit ol nɔɔɔɔ kadaayit giye o alinŋinji linŋinon o Manyi Yesu Kiristo. ²⁷ Zin kitoonteyun Judaz kibeen Silas o ka kɔɔɔ kuduktayun niigi igeet utugetine kaal ci kayeedekuŋ waragewe nico o. ²⁸ Naaga dook kibeen Vɔŋji o Joowo alaŋ karoonnya kanycuŋ igeet lotinok ci adɔi. Olla zin abon azuunu niiga kaal oogi ce. ²⁹ Edeya eleeti dayiine ci ataabi ol joowane o adilyai. Otonjit waanzet. Má adaku kelek o alaŋ atet ol alemeti. Má adaku biye. Má uunnu kaal nicoko, utuguzu koca niiga kaal ci abon ɔɔɔɔ. Kaŋorneka ŋina.”

³⁰ Ma itoonok ol o tuwento ol ci avɔyi warage noko gɔl, idicek ni niigi ɔɔɔ Antiyokti. Mazi avɔ arum looc, uluta ol o tuwento dook, ma avu anyek nɔɔɔɔ warage nico. ³¹ Mazi akeep niigi warage nico, ataltɔ ɔɔɔɔ zooze ci adizkeke ol nɔɔɔɔ o. ³² Ma azɔɔɔ Judaz kibeen Silas o goon uuwak zɔɔɔ o Joowo kibeen ol o tuwento ŋinti wun, ma ilot niigi nɔɔɔɔ ka kanyayit moozet kibeen dayiz. ^{33–34} Mazi akɔ adicai iinya ugeecik keronnyo, itoontek ol o tuwento nɔɔɔɔ gɔl, ma anek nɔɔɔɔ ne, “Oɔɔɔ yaak.” Imiirtozek ni niigi ol o tuwento baal itoona nɔɔɔɔ Jerusalema e.

³⁵ Maje Pɔl kibeen Barnabas omonit iinya oogi Antiyokti. Ma arome niigi ŋinaante kibeen ol oogi, ma ademze, ma uuwak zɔɔɔ o Joowo.

Aŋera Pɔl kibeen Barnabas

³⁶ Ma iinyaye ogen enek Pɔl Barnabas ne, “Kimiirte kɔɔɔ kicinil ol o tuwento kuturyowe baal kuuwayi zɔɔɔ o Manyi e dook ka kɔɔɔ kicinil di karabon aavtiz niigi ku iinyaye nicoko.” ³⁷ Oroonun ni Barnabas Jon Marko korkorit buk ki nɔɔɔɔ. ³⁸ Maje Pɔl abaaban alaŋ agano niini ŋaati ɔɔɔɔ ki nɔɔɔɔ, eeci rak baale orkorit niini ki nɔɔɔɔ lak codoi, ma ook otoŋek niini Pɔl ki Barnabas looc o kazi Pampiliya, ma amiironok kɔɔɔ iŋaan kidicai keroni dook. ³⁹ Adaŋtɔ ni niigi giye nico, makacin eŋertɔ. Orkorit Barnabas been Marko otooɔit kavool o liilu ɔɔɔ looce o kazi Sipras. ⁴⁰ Maje Pɔl eŋera Silas orkorit ki nɔɔɔɔ. Ma ajinek ol o tuwento nɔɔɔɔ Manyi ka kozooti nɔɔɔɔ. ⁴¹ Ma avɔ azɔɔ niigi looc o kazi Siriya been Silisiya ka kɔɔɔ kidizikteŋ ol o tuwento kodoyit ŋinaante.

Orkor Timozi ki Pɔl been Silas

16 ¹ Ma eerononek Pɔl kutur o kazi Darbi been kutur o kazi Litra. Maje ŋinaante abaak eeti ci tuwento kazi Timozi. Yaatine dole ceen Juzen, ma atu Yesu buk. Maje baatine eet ceen Garik. ² Ma goon ol o tuwento dook kuture nice been kuture o kazi Ikoniyaŋ ɔɔɔ Timozi kizi eet ci abon ɔɔɔɔ. ³ ɔɔɔŋ ni Pɔl Timozi korkorit ki nɔɔɔɔ. Ma atet rak nɔɔɔɔ kul. Agɔon niini nɔɔɔ o, eeci ol o Juz abaak vitenane niceke dook aga Timozi baatine Garik. ⁴ Ma avɔ azɔɔ niigi kuturyok, aduwak ol o tuwento lotinok o aduwa toonnyawa kibeen alaat o ol o tuwento Jerusalema. Ma aricanek nɔɔɔɔ ka kuzuuti lotinok nicoko. ⁵ Anyayit ni ol o tuwento dayiz tuwenta, ma agama ol ci meel Jook tup nɔɔɔ, ma azaaci ol o tuwento kizi meelee.

Awunozi Pɔl kuture o kazi Toras

⁶ Ma vurtɔ ɔɔɔɔ niigi, ma avɔ adiiir looc o kazi Pijiya kibeen looc o kazi Galatiya, eeci Vɔŋji o Joowo alam nɔɔɔɔ calaŋ uuwak zɔɔɔ o Joowo looce o kazi Asiya. ⁷ Mazi avɔ arum kek o aŋeron Misiya been Biziniya, oroonjit kɔɔɔ looce o kazi Biziniya. Maje bar Vɔŋji o Yesu ajurake nɔɔɔɔ keroni ci avɔyi ŋinaante. ⁸ Idiirit ni looc o kazi Misiya, ma adicek avɔ kuture o kazi Toras abil liiltoga. ⁹ Ma baaline nice uwunoze Pɔl. Acin niini wunozyai eet ceen Masidoniyan ci abil ilalek nɔɔɔɔ anek ne, “Ijayet da Masidoniyaŋ ki ija tiritet.” ¹⁰ Mazi akɔ aŋorneke wunozya nici, icine Pɔl. Enico ele naana Luka kibeen nɔɔɔɔ kuluta kaal ka koota Masidoniyaŋ, eeci kagaya awuyet Jooi ka koota kuuwakteya ol zɔɔɔ o Joowo abon ŋinaante.

Atu ŋaa ci kazi Lidiya Jook

¹¹ Ma katooda kavool o liilu kuture ci kazi Toras neke, ma kavoya looce o kazi Samosas. Ma iitene co koota kuture o kazi Napolis. ¹² Ma ŋinaante kuduntawa kavoola, ma kawoya zɔɔne kavoya kuture o kazi Vilipiya. Ma kuturi nici kutur codoi kuturyowe o looc o kazi Masidoniya. Abaayi kutur nico ol baal avu looce o kazi Rom. Ma kamona kuture nice iinya ci miliny. ¹³ Ma iitene o yubzento kudunta kutura koota liiltoga, eeci kabaabana kaziya ne, Anyak inoko ŋinti aloten ol o Juz aŋaryin. Ma ŋinaante kɔɔɔ kaavtiya loota, ma kazoozona ki ŋaai ci alote ŋinaante. ¹⁴ Anyak ŋaatineej ŋaa ci kazi zaar ne Lidiya ci looc o kazi Sayatara. Niini ŋaa ci goon ataaline rumane ci kolik een jalo. Ma goon buk adiŋŋin niini Jook, ma akɔl Manyi nɔɔɔɔ ziniz kagama kaal o aduwa Pɔl. ¹⁵ Makacin otoonye niini kibeen ol o kɔɔɔ onin dook. Ma awuyet aneket ne, “Má agayaŋu niiga kutuwa didi naana Yesu, ivita kɔɔɔ koromte ki aneet ole can e.” Ma amena ŋaati awuyet zee makacin koota.

Cabiin o Pɔl ki Silas

¹⁶ Mazi kavoya iitene oman ŋaao ŋaryiinto, kɔɔɔ kurumtowa kibeen dole ceen gabaren ci anyak miniŋit ci Loryento, ma anyek nɔɔɔ kuduwa kaal ci katin iina, ma ajowa ol o alinŋinonek niini guruc ci meel gole ci aruweke ol o aduwak kaal o ka kiitazo katin nɔɔɔ guruc. ¹⁷ Ma ano goon dole nici Pɔl kibeen buk ageeta. Ma agereny azi ne, “Ol nicigi gabara ci Jook o adiŋŋin kujuk joowane dook. Uuwayekuŋ niigi igeet gɔl ci ka orogti.” ¹⁸ Ma agɔon niini gi nico iinya ci meel zee makacin otobor Pɔl nɔɔ. Ma ookci, ma anek miniŋit o Loryento abil doleca ne, “Karicanekin ineet duna dolece nico zaare o Yesu Kiristo.” Taman nɔɔɔ uduna miniŋiti ci Loryento noko ŋaatin. ¹⁹ Mazi avɔ aga ol o alinŋinonek dole nici izii miniŋiti o Loryento baal anyak e ŋaatin tɔ, agaac ɔkɔma gɔl ci ka kojoktai bodo niigi guruc. Agamit ni niigi Pɔl been Silas, ma agurek nɔɔɔɔ ŋino roonnyo melegenya. ²⁰ Avɔyi nɔɔɔɔ alaate o Rom, ma anek ne, “Ol nicigi ol ceen Juz, ma avu uulal niigi ol kuture cinai noko. ²¹ Ademez niigi ol keerane ci abano kibeen lotinok ogaac. Ma alaŋ abon ŋaati kagɔoni kaal ci aduwaket niigi ageet o giye o keegine naaga ol o Rom.”

²² Enico olotai kōle, ma aņozonek nōōgo. Ma areec alaata rumane o Pōl been Silas ona aborcek e lai. Ma aricanek takirnya kodooyit nōōgo. ²³ Mazi avo odotiz ŋaati adōoi nōōgo ɔɔɔt, acabit nōōgo sijina. Ma aricanek alaata alaan o sijino konyoogek nōōgo ceez ka calaņ avir. ²⁴ Mazi avo aduwak niigi nōōno zōz nico, arek niini nōōgo zanzan eecito. Ma acabek nōōgo zōo keen ci adiņđiņ ɔɔɔt.

²⁵ Ma baalin keņja aņaruyō Pōl been Silas, ma aben beniinok ci adiņđiņani Jook. Maje ɔl o acabje dook azii nōōgo nōko. ²⁶ Ŋintimiliny nōko ɔɔɔmō lōoci dook ɔɔɔt, ma amōt sijini. Taman nōko ɔkōlte karogeta dook, ma aaryai ziiya o acabin ɔl o acabje dook. ²⁷ Ma acine alaani o sijino. Mazi acin niini karoget o sijino okole, abaaban niini izi ne, Coma odokonyit inoko ɔl o acabje e dook. Ma aara kabaz onin tibila arōōņ ka kuruk ele kadaak. ²⁸ Egerenyek ni Pōl nōōno molowe ci appe anek ne, “Má arui ele daak gaga. Ŋaan kaavtiya naaga dook tō.”

²⁹ Ma awa alaani o sijino eet oma ka kanyaa tokolec. Ma adokonyonek sijin eecito, ma akani kozoņti looc Pōl been Silas zōone ŋaati abarini. ³⁰ Ma aduņnan nōōgo bitaala, ma ajin anek ne, “Eeta, mayo kutugu gitaz ci ka korogozan?”

³¹ Ma abedeke niigi nōōno anek ne, “Tu Manyi Yesu ka orogit niina kibeen ɔl o ceez unun buk.” ³² Uuwaktek ni niigi nōōno kibeen ɔl o ceez onin dook zōz o akati Manyi. ³³ Ma baaline nice ele ook alaani ci sijino noko, ma ako amoor Pōl ki Silas tobe. Otoonyce ni enice niini kibeen ɔl o ceez onin dook. ³⁴ Ma akōyi niini Pōl been Silas ole onin, ma ako anyek dayiin kadaktō. Ma atalne niini kibeen ɔl o ceez onin ɔɔɔt, eeci utuweec niigi Jook.

³⁵ Ma ŋeeretine co itoonit alaata o Rom takirnya ka kooti molok ci azi ne, “Oborocit ɔl baalke.”

³⁶ Uduwak ni alaani o sijino Pōl enek ne, “Anyaa alaata o Rom molok ci azi ne, Uburucewu sijina niina kibeen Silas. Inoko zin ɔɔzōz yaak.”

³⁷ Bar Pōl anek takirnya ne, “Ma alaata ŋaan rak buk kootet rooni ka kicinit zōz cinaaņ o, bar olla adooket niigi kōle kebereca gaga nōko. Zin naaga buk keegina ɔl ci Rom. Ma alaņ waan kaganona ŋaati agooneket niigi ageeta gi ci abil nōko. Acabtet niigi ageeta sijina. Ma inoko arōōņ ka koborocet roodinta. Alaņ zin kagamana naaga zōz nico. Abon avu alaata o Rom niigi alya ŋina ka kivita kuburucawet.”

³⁸ Ooti ni takirnya zōz nico alaate o Rom. Mazi avo azii niigi Pōl kibeen Silas een ɔl ci Rom, anyayit ŋoliin. ³⁹ ɔɔt ni niigi ŋaatineeņ, ma avo anek ne, “Kavoloņnya naaga giye ci kagoonekuņ igeet o.” Uburuca ni niigi nōōgo sijina, ma ilalek nōōgo kōzōzō kuture nico. ⁴⁰ Mazi aduņna Pōl ki Silas sijina, ɔt korge o ŋaa o kazi Lidiya. Ma ŋinaante urumtō kibeen ɔl o tuwento, ma aduwak niigi nōōgo zōozok ci dizkento. Ma vurta ɔɔzōz niigi kuture nice.

Aavtiz Pōl kibeen Silas kuture o kazi Tesalonika

17 ¹ ɔɔzōz ni niigi, ma avo adiir kutur o kazi Ampipolis kibeen Apoloniya. Ma avo zee been kutur o kazi Tesalonika. Ma ŋinaante anyak ceez ci ɔl o Juz lotento. ² Ook ni Pōl ceeze ci lotento noko eonin gōon akōyi laadun. Ma ŋinaante ɔt adañtōi ki ɔl zōz ci akati warage o Joowo iinya ci yubzento iiyu. ³ Ma oobek niini nōōgo warage o Joowo, ma ayezek nōōgo kaal o ayeedi akati piryakzet o Kiristo kibeen ŋaazi onin daayiza. Ma anek nōōgo ne, “Ma Yesu ci kuuwawekuņ naana o, nōōno neen ween Kiristo.” ⁴ Agamta ni ɔl ogen Yesu ceeze o lotento, ma aromonek niigi Pōl been Silas. Ma buk atuwe ŋaai ci meel ci gōon agayi niigi ɔla, kibeen ɔl ci meelik ole ween Garik o gōon adiņđiņan niigi Jook gole o reen.

⁵ Maje bar ɔl ci Juz ogen amadiyit nōōgo, ma avo alota ɔl o gōon olla avo kōkōm liņliņon ci agōon, ma akat nōōgo ka kotobortek Pōl ki Silas nōņ. Ivita ni iminaņti kōle nici kaal kutura dook. Ma aņozonek niigi ɔl korge o Jeson, eeci arōōņ niigi Pōl ki Silas ka kuduntak kōle bitaala. ⁶ Bar mazi ŋaan kojokta niigi nōōgo ŋinaante, utugurta niigi Jeson ele kibeen ɔl o tuwento oogi, ma avōyi nōōgo alaate o kuturo. Ma agereny azi ne, “Pōl ki Silas o gōon uulal ɔl vitenane dook, inoko ivitayet niigi ageet kuture cinai o buk. ⁷ Ma aku atalna Jeson nōōgo ole onin. Inoko zin alaņ azooni niigi lotinok o alaan o Rom adikir. Azi niigi ne, Abil alaani oman ci kazi Yesu.”

⁸ Mazi avo azii kōle kibeen alaata o kuturo zōz nico, otoborit niigi nōņ. ⁹ Ma anyek alaata Jeson been ɔl o tuwento oogi kuruyit karama ci ka kuburucai. Mazi avo aruk niigi karama nico, uburuca ɔl nōōgo bitaala.

Avō Pōl ki Silas kuture o kazi Bariya

¹⁰ Mazi ako baalin lōoci, itoontek ɔl o tuwento Pōl ki Silas gōl kōt kuture o kazi Bariya. Mazi avo arum ŋinite, ɔɔt ceeze o Juz lotento. ¹¹ Maje ɔl ŋinaante arōōņ demziin ɔɔt kujukit ɔl o Tesalonika, ma atalna niigi zōz ci Pōl ki Silas noko ɔɔɔt. Ma gōon tup nōko akēep niigi warage o Joowo ka kicinit zōz o aduwa Pōl mā een zōz ceen didi. ¹² Utuyō ni ɔl ci Juz meelik ŋaatineeņ, ma atuwe buk ɔl ci mac ole ween Garik been ŋaai ci meelik ŋaane ci agayi ɔla. ¹³ Bar mazi azii ɔl o Juz abaak kuture o Tesalonika gi o uuwayi Pōl zōz o Joowo kuture o kazi Bariya, ivita niigi ŋinaante buk, ma avu akana kōle ka kōt kigidit Pōl. ¹⁴ Taman nōko itoonit ɔl o tuwento Pōl kook liiltoga. Maje Silas been Timozi aavtiz niigi Bariya ŋina. ¹⁵ Ma ɔrkōr ɔl ci itoonek Pōl gōl ki nōōno zee been kutur o kazi Atinas. Ma ŋinaante abadaak niigi Bariya anyaa otok ci itoona Pōl arōōņi Silas kibeen Timozi ka kōt karabta nōōno kataman.

Aavi Pōl kuture o kazi Atinas

¹⁶ Mazi ŋaan are Pōl Silas kibeen Timozi kuture o kazi Atinas nōko, icinun niini joowane ci adilyai meele ɔɔt ŋinaante. Otobor ni niini nōņ ɔɔt ele giye nico. ¹⁷ Ma ako ceeze o lotento, ma ako adañō ki Juz kibeen moden o adiņđiņan Jook ŋinaante. Ma buk adañō niini tup ki ɔl o gōon olla avunak ŋaami. ¹⁸ Ma buk adañō kibeen ɔl koogi o kazi Epikuran kibeen Sitowik ci gōon ademez gōōngi. ɔl ogene ŋaatineeņ anō ne, “Ma gi ci labak azee yeedinet noko arōōņ kizi ne?” Bodo ɔl ogene azi ne, “Coma inoko arōōņ niini kuduwayet ageet zōz ci akati joowane ci moden koogi.” Anō niigi nōko o, eeci uuwak Pōl zōz ci akati Yesu kibeen ŋaazi onin daayiza. ¹⁹ Ooti ni niigi Pōl, ma anyaa nōōno ŋino gōon aloten ɔl biye o kazi Arapagus. Ma ŋinaante enektek niigi nōōno ne, “Karoōņnya di ka kiziikta demziin ci colai anyaa ket noko. ²⁰ Eeci kaal ci aduwa noko ŋaan kiziikta laadun baale. Karoōņnya zin ka duwayet keņti cigeec.” ²¹ Aje ɔl dook o abaak Atinasa kibeen ɔl o avu loocowe ogen aavtiz iinya dook ŋinaante olla aņaam, arōōņ ka kiziiyit demziinok ci colai.

²² Itiņa ni Pōl ibilun jena ɔl ci alote biye ci Arapagus noko dook ŋuma. Ma anek nōōgo ne, “Kacinuņ igeet ɔl ci Atinas noko eeginu ɔl ci adiņđiņanu joowane ɔɔt. ²³ Eeci kotonowa naana kutur cunooņ o dook, ma kicina viten ci adiņđiņanu niiga joowane o. Buk kojowa ŋino taabinto ayeedonek gi ci azi ne, “Ŋino jook o alaņ agayi.” Ma zin jook ci adiņđiņanu ma alaņ agayu o neen ci

kaduwakuj igeet noko. ²⁴ Nōōnō nēen o ēenyca looc dook kibeen kaal o ēel loota dook. Nōōnō nēen ween Manyi o abal tammu taden ki looc. Alaŋ niini abaak ceezine ci ēenyca ɔl ci deer kiyo joowane ci adilyai o. ²⁵ Ma alaŋ buk arɔŋ niini gi ci agoonek ēeti ci deer nōōnō, eeci nōōnō nēen o anyek eet ci deer roget kibeen kaal dook. ²⁶ Ma Jooi baale laadun ɔwa e ēenyca eet codoi. Ma iyya ēeti nici itira moden dook. Ma anyek Jooi nōōgɔ kabaayito loocok dook. Maje laadun ruk maŋaan ketēēnya Jooi eet ci deer e, aga niini noko katin iiten jaŋ kibeen ŋindaŋ ci ka kabaakti niigi. ²⁷ Agɔŋ Jooi gi nico o, ka coma bac abaaban ɔl nōōnō, ma arɔŋ nōōnō, ma ajowa niigi nōōnō ŋaati olla amugi niigi gɔl onin. Maje zin bar buk giye ween didi Jooi alaŋ reen ŋaatina. ²⁸ Kiyo azi zɔz ne, “Jook nēen ci ēenycanet ageet keelit tɔ, kiziti ɔl ci deer koroget kɔtɔz demdem o.” Buk gɔŋ beniinowa ugooc azi ne, “Keegin naaga dɔl ci Joowo.” ²⁹ Zin giye o keegine naaga dɔl ci Joowo, alaŋ abon ŋaati kanyeke naaga Jook kizi gi ci ēenyca ēeti ceen arit warkine, karabɔŋ een zurtenene, karabɔŋ een biyene. ³⁰ Ma Jooi iinyaye o ŋaan kagayi ɔl nōōnō e apez kaal o agɔŋ ɔl ger labak. Bar zin inoko iricanek niini ɔl vitenane dook ka kabada niigi kotoŋit gɔl o ger. ³¹ Eeci Jooi erewun iiten ci ka kapayi niini ɔl dook payiin ci abil tɔp eete o eŋera niini ka kapak nōōgɔ. Eyelizak zin Jooi gi nico ɔl dook gole o itijawi niini eet nico daayiza.” ³² Mazi azii niigi zɔz o Pɔl akati ŋaazi daayiza, atararti ɔl ogen nōōnō. Maje bar ogen azi ne, “Karooŋnya di kiziikta zɔz nico bodo.” ³³ ɔtɔ ni Pɔl ŋaati lotento noko. ³⁴ Ma aromonek ɔl ogen nōōnō, ma atuwe. Buk ŋaatineŋ ŋinaante anyak eet ci kazi Donsis ci gɔŋ alote ki ɔl biye ci kazi Arapagus noko, kibeen ŋaa ci kazi Damaris, kibeen ɔl oogi.

Aavi Pɔl kuture o kazi Korintiya

18 ¹ Ma vurta otoŋ Pɔl Atinas ook kuture o kazi Korintiya. ² Ma ŋinaante urumtɔ ki eet ceen Juz kazi Akila ci aritai looce o kazi Pantas. ɔrkɔra niini kibeen ŋaa cin kazi Parsila looce o kazi Italiya avunak Korintiya, eeci baale alaani o adikir kazi Kaladiyas ɔtɔk ɔl o Juz dook kuture o kazi Rom abil Italiya. Ma ako Pɔl ka kook kicin nōōgɔ. ³ Ma ako abaak ŋaatineŋ, ma aliŋliŋ ki nōōgɔ, eeci gɔŋ ajowa niini guruc ci adayin o ŋaati aloli keemane kiyo niigi o. ⁴ Ma iinyaye o yubzento dook ako gɔŋ niini ceeze o lotento, ma ako azɔzɔ ki ɔl ŋinaante. Arɔŋ niini ka ketēēza ɔl o Juz kibeen Garik zooze ci ka kutuyi niigi Yesu. ⁵ Mazi arum Silas kibeen Timozi looc ŋaao avuni niigi looce o kazi Masidoniya, odoma Pɔl uuwak iinya dook. Ayelek niini ɔl o Juz gi o ēene Yesu Kiristo o are niigi nēen. ⁶ Mazi avɔ abor niigi nōōnō, ma aduwak kaal ci ger, ēbedeke niini nōōgɔ ŋaati ajulan tuduwac rumanene ogin, ma anek nōōgɔ ne, “Mā akolonenu gole o Joowo, ijinit eleeti ugooc maany. Maje naana kuduwayuj igeet. Inoko zin kawɔ naana kako kuuwawei zɔz o Joowo ɔl ween moden.” ⁷ ɔtɔ ni Pɔl otoŋ nōōgɔ, ma ako abaak ceeze ci eet ceen moden kazi Titos Justus ci gɔŋ adiŋdiŋan Jook. Ma ceez ci eet nico noko apadano ki ceez o lotento. ⁸ Maje Karispas ween alaan o ceez o lotento agama buk niini Jook kibeen ɔl o kɔrɔk onin dook. Buk ɔl ogene kutura iziiyit zɔz o Joowo. Utuyɔ ni niigi, makacin otoonye. ⁹ Ma baaline oman uwunoze Pɔl. Anek Jooi nōōnō wunozyai ne, “Mā aŋole looc. Bar meda wayiz calaŋ abil. ¹⁰ Eeci karome naana kibeen ineet, ma akom eet ci ka kutuguweyin ineet gi ci ger, eeci kuture nico kanye ɔl cigan meelik.” ¹¹ Abaawun ni Pɔl ŋinaante irkit codoi kibeen nyelɔwe tɔrkɔnɔm, ma ademzek ɔl zɔz o Joowo. ¹² Ma waano ēene Galiyo alaan ci abal looc ci kazi Garik neke, ulute ɔl o Juz ŋaatodoi, ma avu agam Pɔl, ma avɔyi ceeze o roonnyo. ¹³ Ma akɔlak nōōnō rooni alaane ci kazi Galiyo noko zooze ci ane niigi ne, “Ēeti nici arɔŋ ka kanyek ɔl kidiŋdiŋanit Jook gole ci aŋɔrɔwɔ kibeen lotinok ogaacak.” ¹⁴ Mazi arɔŋ kɔzɔz Pɔl, enek Galiyo ɔl o Juz ne, “Mate waan ēeti ci anyaanu noko kutugu didi gi ci ger oma, kaziŋnuŋ waan igeet. ¹⁵ Bar mazi een olla daŋɔn ci zoozo, ma akati zaar ci ɔl oogi, been lotinok ugoocok doon, ɔtɔ iroonit niiga maany. Alaŋ naana kawɔye tɔ.” ¹⁶ ɔtɔk ni niini nōōgɔ kudunit ceeze o roonnyo. ¹⁷ Enico agamit niigi dook eet o kazi Sosenis ween alaan o ceez o lotento, ma adɔk nōōnō ceez o roonnyo bitaala. Maje Galiyo apez gi nico labak.

Abadaak Pɔl Antiyok

¹⁸ Ma arome Pɔl kibeen ɔl o tuwento kuture o kazi Korintiya iinya ci meel. Ma vurta ɔtɔ, ma ako atɔt kavool ɔrkɔr niini kibeen Akila been Parsila avɔ looce o kazi Siriya. Maje rak ma ŋaan kɔtɔt niini kavool kuture o kazi Senkiya e, akoc rak ɔ, eeci aterkedek niini Jook gi ci ka kutuguwek. ¹⁹ Mazi avɔ arum niigi kutur o kazi Evesos, otoŋek Pɔl Akila kibeen Parsila ŋinite. Ook niini ceeze o lotento, ma ako azɔzɔ kibeen ɔl o Juz. ²⁰ Ma arɔŋ ɔl nōōnō kaavu rak ŋinti reen, bar ajura niini. ²¹ Mazi awɔ, enek ɔl ne, “Mā arɔŋnyan te Jooi kabada, ŋaan kabadakuj.” Ma enice otooŋun kavool ŋinaante idiceya. ²² Mazi ako arum kutur o kazi Sisiriya, idicek ook Jerusalem, ma ako azaa ɔl o tuwento ŋinaante. Ma bodo adicek ako Antiyokti. ²³ Mazi ako adica iinya ci miliny ŋinaante, ɔtɔ bodo ook looce o kazi Galatiya kibeen Pijiya, ma ako ilot niini ɔl o tuwento dook ŋinaante ka kodoyit tuwenta.

Liŋliŋon o Apolos

²⁴ Maje iinyaye niceke anyak eet ceen Juz kazi Apolos akunak Evesos. Aritai niini kuture ci kazi Alikzandariya. Niini eet ci aganek zɔz ɔrɔt, ma aga buk warage o Joowo ɔrɔt. ²⁵ Edemez baale niini gɔl o Joowo, ma agawun juruj. Ma uuwak gɔŋ niini zɔz o Joowo zinize onin dook, ma ademzek ɔl gi o akati Yesu juruj. Bar zin olla aga niini onyen o Jɔn doon, ma ŋaan kaga ŋaazi o Yesu daayiza. ²⁶ Mazi ako azii Akila kibeen Parsila nōōnō azɔz moozeta ceeze o lotento, ooti nōōnō ɔl, ma avɔ oobek kaal koogi ci akati gɔl o Joowo juruj. ^{27–28} Ma vurta oroŋun Apolos ka kook looce o kazi Garik. Ma atirit ɔl o tuwento nōōnō ŋaati ayeedi warage ci ka konyowozek niini ɔl o tuwento looce o kazi Garik ka kataltai ɔl nōōnō. Mazi ako arum looc, ook itirit ɔl o anyek Jooi deten onin ka kutuyɔ ŋaati adaŋon niini kibeen ɔl o Juz kɔla. Ma atēēza niini nōōgɔ daŋonte nico gole ci ayelzeke niini nōōgɔ waragewe o Joowo Yesu nēen ween Kiristo.

Aavi Pɔl kuture o kazi Evesos

19 ¹ Mazi ŋaan aavi Apolos kuture o kazi Korintiya, ēerɔn Pɔl, ma ako adiir loocok ci meel, ma ako zēē been kutur o kazi Evesos. Ma itene oman ojowa niini ŋinaante ɔl ci tuwento koogi. ² Ma ajin nōōgɔ anek ne, “Ma dim yo mā atuwenu e, iyyayuj Vɔŋiz o Joowo?”
Ma abedek niigi nōōnō anek ne, “Ŋaan buk laadun kiziikta zɔz ci akati Vɔŋiz ci Joowo.”
³ Ma ajin Pɔl nōōgɔ anek ne, “Mazin da oonyenu ku waanice?”
Ma abedek niigi nōōnō anek ne, “Koonyena naaga gole baal ademzek Jɔn ɔl baal oony niini e.”

⁴ Ma anek Pól nǎǎǎǎ ne, “Mazin toonyenet o Jón baale akati ǎl o abada oǎene ugeec. Ma waanice aduwak Jón ǎl o Israyil ka kutuweec eet o anowa nǎǎǎǎ vurta. Zin eeti nica Yesu neen.”

⁵ Mazi ako azii niigi zǎǎǎǎ nico, otoonyce niigi zaare o Manyi Yesu. ⁶ Mazi ataadek Pól nǎǎǎǎ azeeen, iiyak nǎǎǎǎ Vǎǎǎǎzi o Joowo, ma azǎǎǎǎ niigi zooze calaǎ agayi, ma buk uuwak niigi zǎǎǎǎ o Joowo. ⁷ Een ǎl ci baal akunak Vǎǎǎǎzi o Joowo neke amǎǎǎ ram.

⁸ Ma abaak Pól ǎinaante nyelowe iiyu, ma gǎǎǎǎn ako niini ceeze o lotento, ma azǎǎǎǎz kibeen ǎl moozeta. Azǎǎǎǎz niini kibeen nǎǎǎǎǎ arǎǎǎǎ ka keteeza nǎǎǎǎǎ zooze o akati baliin o Joowo. ⁹ Maje ǎl oogi ǎaatineeǎ adǎi zinzeeti kak calaǎ atuwe. Ma bar azǎǎǎǎ niigi kaal ci ger ci akani gǎl o Joowo ǎl dook ǎuma. Udunai ni Pól ǎl o tuwento ceeze o lotento, ma akǎyi nǎǎǎǎǎ ceeze ci eet o kazi Tiranás demziinto, ma gǎǎǎǎn ako ilot niini nǎǎǎǎǎ ǎinaante tup. ¹⁰ Ma ademez Pól ǎl ǎinaante irkitok ram. Ma enice ǎl o Juz been moden dook o abaak looce o kazi Asiya iziyyit zǎǎǎǎ o akati Manyi Yesu.

Lǎǎǎǎz o Sikiva

¹¹ Ma iinyaye niceke anyek Jooi Pól kutugu kaal ci ateet ǎl biye ǎǎǎǎt ele. ¹² Ako zee mayo nuun een rumane ogin acabi ǎǎ kibeen o acabi barkǎny avǎyi ǎl ole o amǎǎǎ, ma anyek rumane nicigi nǎǎǎǎǎ korogit moorizowe, ma buk atǎǎǎ miniiǎ o Loryento ger ǎaatineeǎ. ¹³ Ma anyak ǎl oogi ole o Juz ci azǎǎǎ looc gǎǎǎǎ ǎaati atǎǎyi miniiǎ o Loryento ǎla. Orooǎit ni buk niigi katamanit kutuguzǎ kaal nicoko zaare o Manyi Yesu. Ma anek niigi miniiǎ o Loryento ne, “Karicanekuǎ iǎeet zaare o Yesu o gǎǎǎǎ uuwak Pól ka aaryai eete nico.” ¹⁴ Maje ǎinaante anyak alaan ci ceez o Joowo ci kazi zaar ne Sikiva. Anyak niini lǎǎǎǎz torgerem. Ma lǎǎǎǎz cigine noko agǎǎǎǎ buk gǎǎǎǎ kaal nicoko. ¹⁵ Ma iitene oman arǎǎǎǎ kaarya miniiǎit ci Loryento eete oman. Bar anek miniiǎit nǎǎǎǎǎ ne, “Kaga naana Yesu kibeen Pól. Mazi yo niiga eeginu ǎl jaǎ?”

¹⁶ Ma aǎǎǎǎz nek eeti ci anyak miniiǎit ci Loryento noko nǎǎǎǎǎ, ma adǎǎǎ nǎǎǎǎǎ kanyayit tobe, ma areec rumane ugeec lai. Omogun niini nǎǎǎǎǎ ǎǎǎǎt. Ma avir niigi ole ci eet nico o. ¹⁷ Mazi azii ǎl o Juz kibeen moden dook o abaak ǎinaante gi nico, anyayit ǎoliin, ma atitiny niigi zaar o Manyi Yesu ǎǎǎǎt. ¹⁸ Ma avu ǎl ci tuwento meelik, ma abǎrak kǎle kaal ugeec ger baal gǎǎǎǎ agǎǎǎ e. ¹⁹ Ma anyaa ǎl ci meel ole o tuwento baal gǎǎǎǎ agǎǎǎ ǎarizet e waragenya ugeec ǎarizetu, ma avu avaat ǎl kǎrgena. Maje guruca ci baal ataalan ǎl waragenya nicoko o meelee ǎǎǎǎt ele (50,000). ²⁰ Ma kaala ci adǎi baal agooni iitene nice neke anyek ǎl ci meel kutuweec Jook, ma anyek ǎl o tuwento kodoyit tuwente uneeǎ.

Abor ǎl kuture o kazi Evesos nǎǎǎ

²¹ Mazi ako odotiz kaal nici, oroǎǎǎǎ Pól kimiire kook Jerusalema ka kook rak kidiir looc o kazi Masidoniya kibeen Garik, ma adicek been Jerusalem. Ma aǎi niini ne, “Katin ma kook kuruma Jerusalem, kadicei kaka kuture o kazi Rom.” ²² Itoonun ni niini Timozi kibeen Erastus o gǎǎǎǎ atirit niigi nǎǎǎǎǎ liǎliǎǎǎnta karakte kǎǎt looce o kazi Masidoniya, ma ako amǎǎǎ rak niini iinya ci miliny looce o kazi Asiya.

²³ Ma iinyaye niceke anyawun macuconet ci appe kuture o kazi Evesos zooze ci demziin o akati gǎl o Joowo. ²⁴ ǎinaante anyak eet ceen arit ci dediinto kazi zaar ne Dimitiros. Eenyca gǎǎǎǎ niini ceezi ci miliny ziiyi ci atobzek ceez o adikir o jook o kazi Artimis. Ma gǎǎǎǎn ataaline niini ceezi nicoko, ma anyaa liǎliǎǎǎnti nicini nǎǎǎǎǎ been ǎl o aliǎliǎǎ ki nǎǎǎǎǎ guruc ci meelik ger. ²⁵ Olota ni niini ǎl ogin aliǎliǎǎ ki nǎǎǎǎǎ dook kibeen ǎl koogi o aliǎliǎǎ liǎliǎǎǎnti ci atobǎ kibeen liǎliǎǎǎnti cin o ǎaatoǎoi. Ma aku anek nǎǎǎǎǎ ne, “ǎl ogan, agayu niiga arǎǎǎǎt cinai o aku liǎliǎǎǎnti cinai noko. ²⁶ Inoko zin icintu, ma iziiktu niigalya gi o agǎǎǎǎ eeti o kazi Pól. Azi niini ne, “Joowane ci adila eeti ci deer o alaǎ een joowane ceen didi.” Ma eteeza niini ǎl ci meel kuture nico kibeen looce o kazi Asiya dook. ²⁷ Zin giye nico anyek katin niigi liǎliǎǎǎnti cinai noko kizi gi ci labak. Alaǎ een zin bar liǎliǎǎǎnti cinai o doon, bar buk anyek iima ceez o jook o kazi Artimis kizi gi ci labak. Jooi ci titiny gǎǎǎǎ adiiǎǎǎǎ ǎl Asiyakti kibeen loocok dook noko epeze katin.”

²⁸ Mazi azii ǎl zǎǎǎǎ nico, otoborit nǎǎǎ, ma agereny azi ne, “Adiiǎǎǎ jooi onaaǎ kazi Artimis doon o aavi Evesosa.” ²⁹ Ilorit ni ǎl dook kutura bornet nǎǎǎ, ma avǎ agam eet ci kazi Gayus kibeen Aristarkos ceen ǎl ceen Masidoniyet baal gǎǎǎǎ ǎrkǎr kibeen Pól. Ma agurut nǎǎǎǎ avǎyi ǎaao gǎǎǎǎ lotento adikir. ³⁰ Maje Pól alya arǎǎǎ kook ǎaati lotento neke buk. Alamit ni bar ǎl o tuwento nǎǎǎǎ. ³¹ Ma itoonak alaata ogene ole o loocu een laǎǎǎǎǎ otok ka calaǎ ayelza ele ǎaao aloten ǎl. ³² Ma amacucǎ ǎl o alote iitene nice ǎǎǎǎt, ma olla awalwal niigi dook. ǎl ogen agereny aduwa gi oma, bodo ogen agereny aduwa gi cineeǎ doon, zee ma alaǎǎan buk ǎl ci meel ǎaatineeǎ aga gi ci te laadun alotan niigi ǎaatoǎoi o. ³³ ǎinaante anyak eet ceen Juz kazi Alikzandar, ma anyek ǎl o Juz nǎǎǎǎǎ kitiǎa kibil ǎl ǎuma. Ma abaaban ǎl ogen ane, Coma anyak zǎǎǎǎ nico niini, eeci een niini eet ci Juz. Ma ajaǎǎan niini ǎl ǎaati adǎǎi aziit arǎǎǎ ka kǎǎǎǎǎ kenek nǎǎǎǎǎ ne, “Ilori nico alaǎ akana ǎl o Juz.” ³⁴ Bar mazi iieyz niigi nǎǎǎǎǎ izi eet ci Juz, egerenyit bodo niigi dook ziik ram anǎ ne, “Adiiǎǎǎ jooi onaaǎ Artimis aavi Evesosa doon.”

³⁵ Ma vurta ajaǎǎan alaani o kuturo ǎl, ma anek nǎǎǎǎǎ ne, “Igeeta ǎl o Evesoso, aga ǎl dook nǎǎǎ kuturi cinai kazi Evesos noko anyak ceez o Artimis o adiiǎǎǎ kibeen be baal iina tamma e. ³⁶ Akǎm zin eet ci ka kadaǎ gi nico. Abon zin di ativaninu calaǎ agoonu gi ci ger. ³⁷ Anyaanu niiga ǎl nicoko ǎina gaga nǎǎǎ, eeci ǎaan bac nuun kogoroziit kaal o eel ceeze o joowane ogaac, ma akǎm buk gi ci ger aduwak jook onai kazi Artimis. ³⁸ Mǎ arǎǎǎ te Dimitiros kibeen ǎl o aliǎliǎǎ ki nǎǎǎǎǎ kǎkǎltak eet oma rooni, anyak iinya o roonnyo tǎ, ma anyak buk alaata o roonnyo. Abon zin akǎǎ niigi roonnyok iinyaye niceke. ³⁹ Mazi bar te anyaku gi oma ci appe kujuk zǎǎǎǎ nico, abona zin anyeku ǎl dook kutura kolotai ka kozooziit gi nico. ⁴⁰ Eeci giye ci agoonu waanico noko, anyet tedec alaata o Rom kiziti ǎl ci kilor bornet nǎǎǎ o neen naaga, ma akǎm inoko eet ci ka kuduwa keǎ ci zǎǎǎ ci agernyi ǎl o.” ⁴¹ Mazi ako odotiz zǎǎǎǎ, azaan niini ǎl.

Ako Pól Masidoniya been Garik

20 ¹ Mazi ako ajaǎǎani gernyi, otowa Pól ǎl o tuwento, ma adizkek nǎǎǎǎǎ tuwenta, ma anek ne, “Abona, kǎtǎǎwa zin naana.” Idicek ni niini ook looce o kazi Masidoniya. ² Ma ako azǎǎǎ looc nice dook, ma adizkek ǎl ǎinaante zoozowe o Joowo. Ma ako zee been Garik. ³ Mazi ako arum niini Garik, ook ǎmǎǎǎ ǎinaante nyelowe iiyu. Mazi arǎǎǎ kitiǎa kook Sิริyakti, iziik niini ǎl o Juz areyi arǎǎǎ ka kuruyit nǎǎǎǎ. Zin giye nico imiire niini, ma ako adiiir Masidoniya. ⁴ ǎrkǎr niini kibeen Sopater ween ǎeerti Pirus o aku kuture o kazi Bariya, ki Aristarkos, ki Sekundus o avu kuture o kazi Tesalonika, ki Gayus o aku kuture o kazi Darbi, ki Ticikos, ki Tovimas o avu looce o kazi Asiya, been Timozi. ⁵ Ma araki niigi ǎaatineeǎ, ma avǎ areyet kuture o kazi Toras. ⁶ Mazi ako idicai iitene o gǎǎǎǎ aloten ǎl adayi ǎǎǎen o alaǎ amokcar, kotooda kavool kuture o kazi Vilipiya, ma kawoya liila iinya tur zee ma kavǎ karumnya nǎǎǎǎǎ kuture o kazi Toras. ǎinaante kǎmǎnta iinya torgerem.

Arogoz Pól logo ci adaai

⁷Ma yomana iitene ween Sabit kulutewa naaga ka kadakta dayiin o laŋotizetu kaadana daayiz o Yesu. Ma uuwak Pól zee been baalin keŋ, eeci arɔŋ ka kɔɔto ŋeeretine ci aalna o. ⁸Maje lambeta ci meelik alanyit ceeze ci wun kalotena o. Eenyaci ceez nici gɔɔn tadena. ⁹Maje buk ŋinaante anyak logo ci kazi Yutikus aavi niini nyapildiŋa. Mazi ŋaan azɔɔz Pól nɔko, uduŋun logoti nici zee makacin eteeda ooŋnya. Ma iina kuruk looc ceez eci bitaalu e. Mazi avɔ adɔŋa ɔl nɔɔnɔ, bar adaawa. ¹⁰Ma aduŋna Pól ceez tadena akunak looc, ma uubononek nɔɔnɔ, ma atorkot nɔɔnɔ, ma anek ɔl ne, “Má atiranyu gaga. ŋaan arogi niini bodo labak.” Zin didi orok logoti. ¹¹Ma amiironek Pól ceez tadena bodo, ma akɔ adak dokoc o adaan daayiz o Yesu. Ma azɔɔz Pól ŋinti wun zee makacin aal tammu. ɔɔto ni niini. ¹²Ooti ni ɔl logo ona iina e ɔl. Ma atalne niigi ɔɔɔt, eeci urugun niini bodo.

Ako Pól kuture o Kazi Miletus

¹³Ma karayina naaga rak kavoola kavoya kuture o kazi Asos ka kook kamadawet Pól ŋinaante. Anyet ageeta karaktewa, maje niini arɔŋ ka kɔɔto zɔɔne zee been ŋinite. ¹⁴Mazi akɔ amadanet niini ageeta Asosa, kɔrkɔrta naaga dook ki nɔɔnɔ kavoola, ma kadiceka kavoya kuture o kazi Mitilin. ¹⁵Ma iitene co ŋinaante kidiceya bodo zee ma kavɔ karumnya looc o kazi Ciyas. Bodo iitene co kivitaya kutur o kazi Samos. Ma kadiceka kavoya kuture o kazi Miletus. ¹⁶Eeci Pól alaŋ arɔŋ koota Evesosa. Agɔɔn niini nɔko o, eeci alaŋ arɔŋ kidica iinya ci meel Asiyakti. Arɔŋ niini kiyiik kook karaba iiten o Pintikos Jerusalema.

Ilot Pól alaŋ o ɔl o tuwento

¹⁷Itoonek ni Pól otok alaŋ o ɔl o tuwento kuture o kazi Evesos ka kivita kurumto ki nɔɔnɔ kuture ci kazi Miletus o. ¹⁸Mazi avɔ arum niigi looc, enek niini nɔɔgo ne, “Agayu inoko gɔl ci baayiz can kabaai o nɔko, eeci koromte naaga ki igeet waanbaal kakunakuŋ looce ci kazi Asiya noko zee been inoko o. ¹⁹Iinyaye niceke dook kaliŋliŋ naana kizi gabaren ci Joowo calaŋ kadoŋ ele. Aciritnan gɔɔn aneet ziniz liŋliŋonte can noko ɔɔɔt ele, ma akunakan gɔɔn piryakzet gole ci arɔŋ kuruktan ɔl o Juz. ²⁰Ma agayu buk iinya baal kuuwawekuŋ zɔɔz o Joowo e, akom gi ci karooduŋ kaale o kacin naana agano ŋaati kaduwakuŋ igeet dook ka kitirituŋ. Ma kademezuj kɔla ki korogjowe ugooc. ²¹Ma kiloti ɔl o Juz kibeem moden buk ɔɔɔt ka kabada niigi oŋene ugeec kivitak Jook ka kutuweec niigi Manyi onai Yesu. ²²Ma zin gole o kaziiŋne Vɔŋiz o Joowo, kaka naana Jerusalema. Alaŋ kaga gi ci akɔ agoononekan ŋinaante. ²³Olla kaga aduwakan gɔɔn Vɔŋizi o Joowo aneeta kuturyowe o kakoye dook gi ci kaka kanyaye tiŋeere piryakzet been cabiin Jerusalema. ²⁴Ma zin naana alaŋ kari ziniz gi ci akati roget ci ele can o. Olla bar kari ziniz gi ci ka kidicai liŋliŋoni cane baal anyan Manyi Yesu kutugu o doon. Ma zin liŋliŋoni nici akati uuwayi ci zɔɔz o abon baal anyek Jooi ɔl irkente onine.

²⁵Maje zin naana kozobuŋ igeet dook kuduwayuŋ zɔɔz o baliin o Joowo. Inoko zin kagawa naana alaŋaan niiga acinaŋ aneet tiŋeere bodo. ²⁶Zin inoko waanico kanekuŋ ne, Mā anyak ŋaatonooŋ eet ci ŋaan kutuwɔ, alaŋaan nici een can. Izi cin doon. ²⁷Eeci baale kuduwayuŋ kaal dook o aroŋek Jooi ɔl kutuguzɔ.

²⁸Ebeyit zin eleeti ugooc maany. Ebeyit buk ɔl o tuwento anyuŋ Vɔŋizi o Joowo ka uzuuti. Otowaac ɔl o tuwento kiyo gɔɔn oowa eeti eza ogin o. Eeci anyewun Jooi nɔɔgo kizi ɔl cigin daayize o ŋeerin. ²⁹Kaga nɔko mā katin kɔɔɔwa naana, anyak katin ɔl ci ger atobo ki guzule ŋaatonooŋ ci avu uulal ɔl o tuwento. ³⁰Katin ɔl ogen ŋaatonooŋ ele aduwa kaal ceen vɔɔŋ ka kalabta ɔl o tuwento, ka koneec nɔɔgo. ³¹Egenyit zin. Aada buk iinya baal gɔɔn awucnan ziniz cane o ŋaaten igeet tup baalin ki waazin, ma kademezuj igeet dook irkitok iiyu e.

³²Inoko zin kooŋnekuŋ igeet Jook ka kuzuutuŋ niini. ŋaan anyuŋ igeet dooyiz been mayuwenet o gɔɔn anyek niini ɔl ogin irkente onin. ³³Agayu niiga gɔɔn baale ŋaan kizi appe ziniz cane o guruci, karabɔŋ een rumanene culu. ³⁴Agayu buk niiga gɔɔn baale kaliŋliŋ naana azeene cigan o maany, ma kataala kaal o karoŋ naana kibeem kaal o arɔŋ ɔl o korkorya. ³⁵Ma gole baal kaliŋliŋe naana ɔɔɔt e, keyeleyuŋ igeet gɔl ci ka itiriti buk niiga ɔl o amaŋ. Aada zin zoook baal aduwa Manyi Yesu azi ne, Appe mayuwenet ɔɔɔt ŋaati kanyeke ɔl kaal, kujuk mayuwenet ci kadoman kaal ɔla.”

³⁶Mazi akɔ aŋorneke Pól zooze nico, akati niini kibeem ɔl dook kozoŋti looc, ma aŋarye. ³⁷Ma aluwek niigi Pól ɔɔɔt ele ŋaati atorkodi, ma acoco nɔɔnɔ ŋalyamɔ, ma anek niigi nɔɔnɔ ne, “Bitɔ zin. Tɔ yaak.” ³⁸Ma awucnek nɔɔgo zinzeetine gi ci aneke Pól nɔɔgo ne, Alaŋ bodo acinaŋ aneeta been neen o. Ma itoonek niigi nɔɔnɔ gɔl zee been kavool.

Ako Pól Jerusalema

21 ¹Ma ŋaati kavoolo neke kenekteya nɔɔgo ne, “Abona. ɔɔto zin. Imiirte yaak.” Kidiceya ni naaga. Ma kabaayiza liil tɔp nɔko zee ma kavɔ karumnya kutur o kazi Kos. Ma iitene co koota kuture ci kazi Rodis. Ma kadiceka zee been kutur ci kazi Patara. ²Ma ŋinaante kojoktawa kavool ci akɔ looce o kazi Venosiya. Ma katooda kavool nico, ma kadiceka. ³Ma kavoya zee been ŋinti kacina looc o kazi Sipras, ma ŋinaante kanyarŋta koota ki tenet ka koota looce o kazi Siriya. Mazi karumnya kutur o kazi Tayor kivitaya dɔwɔn, ma abil kavooli ka kaarta ɔl kaal bitaala. ⁴Ma ŋinaante kojoktawa ɔl ci atuwe, ma karomena ki nɔɔgo iinya torgerem. Ma dooyize o Vɔŋiz o Joowo uduktak ɔl ci tuwento noko Pól calaŋ akɔ niini Jerusalema. ⁵Mazi akɔ idicai iinya o karomena ki nɔɔgo, kidiceya naaga keronye onaaŋ. Ma itooneket niigi dook kibeem ŋaai been dɔl gɔl. Ma liiltoga kakata naaga dook kozoŋti looc kaŋaruyowa. ⁶ŋinaante keŋertowa, kotooda naaga kavool, ma amiironek niigi korogjok ugeec.

⁷Kitiŋgazo ni Tayora, ma kavoya kuture o kazi Patalemis. ŋinaante kɔɔt kazaaya ɔl o tuwento, ma kamona ŋinaante iiten codoi. ⁸Ma iitene ci ano gɔɔn o kitiŋgazo, ma kavɔ karumnya kutur o kazi Sisiriya. Ma ŋinaante koota ole ci eet o kazi Pilip o gɔɔn uuwak zɔɔz o Joowo, ma kamona ŋinaante. Niini eet codoi ole ween torgerem baal aŋera ɔl o tuwento Jerusalema e. ⁹Anyak niini dɔl ceen kabarze wec ci uuwak zɔɔz o Joowo. ¹⁰Ma kaavtiya ŋinaante iinya oogi zee makacin urumet eeti oman ci uuwak zɔɔz o Joowo ci kazi zaar ne Agabas ci looc o kazi Judiya. ¹¹Mazi aku arumnyet, ɔɔga voocu o acabi Pól barkony, ma acabi niini zɔɔ been azeen ogin maany, ma azi ne, “Azi Vɔŋizi o Joowo ne, Katin eet ci voocu nico o acap ɔl o Juz nɔɔnɔ Jerusalema nɔko kiyo kacabi naana ele can noko. Ma anyek tiŋeere niigi nɔɔnɔ ɔl ween moden ka kɔɔt kɔkoltak niigi nɔɔnɔ rooni.”

¹²Mazi kaziiŋna gi nico, kilalteya naaga been ɔl oogi ŋinaante Pól ka calaŋ akɔ Jerusalema. ¹³Bar abedeket niini ageeta aneket ne, “Naa dim utuluz zee ma amonaŋ ziniz o? Alaŋ naana kari ɔɔ gi ci ka kook kacabɔi Jerusalema, yo nuun ma een daayiz ŋinaante ŋaaten Manyi Yesu, abon ŋaatan labak.”

¹⁴Zin ɔkomeyet ageeta ŋaati katēezana nɔɔnɔ. Makacin kenekteya naaga nɔɔnɔ ne, “ŋaan agooni eo arɔŋ Jooi.”

¹⁵ Mazi kadicana iinya koogi njinaante, kuluta kaal, ma kavoya Jerusalema. ¹⁶ Ma korkorya kibeem ol ci tuwento koogi looce ci kazi Sisiriya noko. Avoyet niigi ageeta ka koot komonta korge o eet o kazi Manason Jerusalema. Eeti nici eet ci Sipras ci atuwe niini baale laadun.

Eerononek Pól Jemis

¹⁷ Mazi kavó karumnya Jerusalema, ataltawet ol o tuwento ageeta aróot. ¹⁸ Ma iitene co kórkórtá kibeem Pól koota njáati Jemis. Ma njinaante kojoktawá alaat o tuwento dook. ¹⁹ Ma azaa Pól nóogó, ma aduwak kaal dook o agóon Jooi modeni liŋliŋonte onin. ²⁰ Mazi avó azii niigi zóoz ci Pól noko, atanaazó niigi dook Jook. Ma anek niigi Pól ne, “Gótóna, cin di ol ci Juz meel aróot utuyó. Maje njáato njáan azooni niigi dook lotinok o Mosis aróot nókó. ²¹ Ma uduktak ol ogen nóogó zóoz ci akanin ineet. Anek ol nóogó ne, Edemezu niina ol o Juz abaak modeni dook ka kotoŋit lotinok o Mosis. Ma azi niigi bodo ne, Aduwai nóogó ka calaŋ atéet dól ugeec, ma alaŋ buk agóon kéerane o ol o Juz. ²² Abon zin kagóon naaga gi ci anyek nóogó kataltó, eeci má oca aziinjnin niigi ineet urumu Jerusalema njina, abornekin koca niigi ineeta nŋ. ²³ Tugu zin gi ci kaduwakin naaga ineet ce. Jjinaanto anyak ol ceen wec ci baal aterkedek Jook zóoz kaale ci ka kutuguzó. ²⁴ Bitó zin niina romozek nóogó ka zóto utuguz niina ki nóogó kéer o adaali eeleeti ceeze o Joowo. Ruk zin niina guruc ci daalinet cineeŋ noko, ka zin má odot daalinet cineeŋ o, ka kinimit niigi kokocit ooti labak. Zin gole nico aga tedec ol o Juz dook abac niigi kaal baal ger azoozin niigi ineet e, ka bar zin kagaac niigi ineet neen o njáan azoone lotinok o Mosis. ²⁵ Maje zooze ci akati moden o atuwe kitoonteya iiten baale naaga nóogó warage ci kaneka ne, Má adaku dayiin ci ataabi ol joowane ci adilyai, ki biye, been kelek calaŋ ateedi alemeti. Buk má agoonu waanjzet.”

²⁶ Ma iitene co ooyi Pól ol ceen wec noko, ma avó adaali niini ki nóogó. Ook ni niini ceeze o Joowo adikir, ma akó aduwak ol iinya o ka koŋorei daalinet been o ka kanyaake niini nóogó todayok o taabinto.

Agami Pól ceeze o Joowo

²⁷ Mazi ka kidicai iinya ween torgerem daalinto, icinit ol ci Juz ogen ci avu looce o kazi Asiya Pól ceeze o Joowo. Akatak ni niigi nóonó kóle, ma avu agam niigi nóonó. ²⁸ Ma agereny niigi azi ne, “Ol o Israyil, ivita itiritó. Eeti nicini eet o góon azóp loocok dook ademezek ol gerzitin ci akat ol o Israyil ki lotinok o Mosis been ceez o Joowo o neen. Been nuun inoko o éle anyaa niini moden koogi ceez o Joowo eecitó, ka kivita kegerezanit njinti Joowo alile noko.” ²⁹ Aduwa niigi gi nico o, eeci iiten baale acin niigi eet o kazi Tovimas o kutur o kazi Evesos arome ki Pól Jerusalema, ma bar abaaban niigi anó ne, “Coma da iiten nice anyaa Pól nóonó ceez o Joowo eecitó.”

³⁰ Ilorta ni ol dook kutura boret nŋ, ma adokonyonek niigi dook Pól, ma agam nóonó, ma agurak bitaalín ceeze o Joowo. Ma anyook eeti oman ceez. ³¹ Ma adóok kóle dook Pól aróŋ ka kuruyit nóonó kadaak. Mazi akó arum awaŋi ci ilori ol o Jerusalema dook boret nŋ o alaan o takirnya o Rom, ³² taman nókó anyaa alaani nici takirnya ki alaat ugeec, ma adokonyonek niigi dook kóle. Mazi acin kóle nóonó kibeem takirnya, otoŋit niigi njáati adóoyi Pól.

³³ Ook ni alaani ci takirnyawu noko njáati Pól, ma agam nóonó, ma aricanek takirnya ogin kacabit nóonó ziiye raman. Ma ajin niini ol anek ne, “Eet jaŋ nici? Agóon niini naagin?”

³⁴ Ma agereny ol ogene njatineeŋ aduwa gi cineeŋ doon, maje bodo ogene agereny aduwa gi oma doon. Ma akóm alaani gi ci azii akati Pól kina. Iricanek ni niini takirnya kooti Pól njáao takirnyawu. ³⁵ Mazi arum gól o góon katóodi ceez, odoŋit takirnya Pól, eeci aróŋ kóle kagamit nóonó. ³⁶ Ma anowa ol dook nóonó, ma agereny anó ne, “Uruyit kadaak. Uruyit kadaak.”

³⁷ Mazi aróŋ kooti takirnya Pól ceeze uneeŋ eecitó, ozoozek niini alaan o takirnyawu enek ne, “Nyan da kuduwayin gi ce.”

Ma anek alaani Pól ne, “Kodi! Aganei zóoz ween Garik. ³⁸ Alaŋ een ineet eet baal een Masiren baal abornekin akuma nŋ, ma akóyi ol o ger yowonto een eet tur lak eet ram (4000) balala e neen?”

³⁹ Ma abedeke Pól nóonó anek ne, “Akóm. Alaŋ een aneet. Keen naana eet ci Juz. Karitai kuture o kazi Tarsas looce o kazi Silisiya. Keen zin naana eet ci kutur o titiny éle. Inoko nyan kozoozek ol nicoko.”

⁴⁰ Anyek ni alaani nóonó waŋi ci azózi. Ma abil Pól jena gole o katóodi ceez, ma ajaŋan ol njáati adóŋi aziit. Mazi avó ajaki niigi, ozoozek niini nóogó otoge o ol o Juz.

Aduwak Pól ol kaal baal agóon

22 ¹ Ma anek Pól nóogó ne, “Baatigan been gótónóga, iziiktaŋ di ka kuduwayuŋ kaal ogan baal kagoon.”

² Mazi azii niigi azoozek niini nóogó zooze o Juz, ajaktó tiv. Enek ni Pól nóogó ne, ³ “Keen naana eet ci Juz. Karitai kuture o kazi Tarsas looce o kazi Silisiya. Ma kiroktai zee ma kadikir Jerusalema njina, ma ademezan eeti o demziinto kazi Gamalil. Ma kademez gól ci kazoone lotinok o jijitigaac aróot. Ma karoŋ kiliŋliŋozek Jook aróot kiyo niiga waanico njina noko. ⁴ Ma baale góon kagidi ol o atu gól o Yesu, ma karui oogi njatineeŋ kadaayitó. Ma kagam ol ci mac been njáai, ma kari nóogó sijn. ⁵ Inoko buk alaani o ceez o Joowo adikir kibeem ol o roonnyo dook aga kaal nicigi dook kaal ci aleemnyai didi. Eeci góon baale anyan niigi alya waragenya ci ayeedek ol o Juz kuture o kazi Damacik. Ma kakó naana njinaante ka kook kagam ol o tuwento ka kanyaak nóogó Jerusalema njáati acabin ziiyi ka kivita kódoekte.

Aduwa Pól gól onin utuwi Yesu

⁶ Koowa ni iitene oman zee ma góla waaz njáati kóŋŋóze Damacik iyyayan vooritin ci aku tamma boyonjyon, ma ataranan aróot éle. ⁷ Ma kiinai looc ruwak, ma kazii molok ci anekan ne, Cól, Cól, naa amarninan nókón? ⁸ Ma kajin nóonó kanei ne, Ineet njeneen Manyi? Ma abedekan niini anekan ne, Aneeta Yesu o Nazaret góon amarnine niina o. ⁹ Maje ol o korkorya e acin buk niigi vooritin nico, bar alaŋ azii molok ci azoozekan o. ¹⁰ Ma kajin kanei ne, Yo zin kutugu gitaz Manyi? Ma abedekan Manyi anekan ne, Tiŋa jena. Bitó Damacika. Njáan akó aduyakin kaal dook o aróŋ Jooi ka tugu njinaante. ¹¹ Ma enice éle ootozawan vooritin ci ona ataranan noko kebere kizi ruben. Ma agamnyan ol ogene korkorya e aziit, ma ayitan avoyan Damacika.

¹² Maje kuture nice anyak eet ci kazi Ananayas ci góon adiŋŋan niini Jook, ma azooni lotinok ogaac. Ma atitiny ol o Juz abaak njinaante dook nóonó kizi eet ci abon. ¹³ Iyyayan ni niini, ma aku abilnekan, ma azi ne, Gótóna onan Cól, cinó bodo. Taman nókó kicinó didi, ma kagelem nóonó. ¹⁴ Ma anekan ne, Eŋerawin Jooi o jijitigaac ineet ka ga gi o arooŋekin niini ineet tugu, ka cin Yesu ween gabaren onin abon ka buk ziik zóoz onin aduwa niini moloye onin maany. ¹⁵ Eŋerawin zin niini ineet ka izi niina bacoi cin ka

duwak ol dook kaal o icinu kibeen o iziiwu. ¹⁶ Zin inoko alaŋaan bodo ŋinti wun. Bar tiŋa jena ka toonye ka kotoonyai oŋe ugene gole ci ajine Jook zaare o Manyi.”

Ako uuwak Pɔl modeni

¹⁷ Ma iitene oman kabadaya Jerusalem. Mazi kako kaŋarye ceeze o Joowo, kuwunoze. ¹⁸ Ma wunozyaye nicoko kacin Manyi, ma anekan niini ne, “Tiŋa taman. Tɔ Jerusalema ŋina, eeci ol ŋina alaŋ agama gi ci aduwai niina nɔɔgo akanan aneet o. ¹⁹ Ma kabedeke naana nɔɔno kanei ne, Manyi, aga ol gi baal goon kazobe ceezi o lotento, ma kagame ol o atuyin ineet, ma karuye nɔɔgo e ɔɔɔt.

²⁰ Ma iiten baal aruyi ol bacoi unun kazi Istiven kadaak e, kaave waanice tɔ. Ma katalne naana iiten nice daayize onin ŋinaante, ma kabei rumanɛ ci ol baal amony nɔɔno e. ²¹ Eneyan ni Manyi ne, Tiŋa je. Toŋ Jerusalem ka kitooneyin moden o abaak reena.”

²² Ma azii ol Pɔl zee makacin uduwa zɔɔz ci akati moden. Zin bar enico egerenyit niigi ɔɔɔt ano ne, “Uruiyit kadaak. Uruiyit kadaak. Alaŋ agano niini ki roget.” ²³ Ma agereny ɔɔɔt, ma areec rumanɛ ugeec eleetinu, ma azaacek tɔɔ tammu keŋ bornet nɔŋa.

²⁴ Iricanek ni alaani o takirnya o Rom takirnya ogin ka kooti Pɔl ceeze uneen. Ma aricanek nɔɔgo ka kodooyit nɔɔno nyabowa zee ma aduwa gi ci agernyi ol ɔɔɔt noko. ²⁵ Bar ako mazi acap niigi nɔɔno ka kodooyit, enek Pɔl alaan o miliny takirnyawu aavi ŋinaante ne, “Agano dim yo ŋaati adooku eet ceen Romen iŋaan kapawozek nɔɔno gi ci gerze roonnya?”

²⁶ Mazi azii alaani nici gi nico, itiŋa ook alaane o adikir, ma ako ajin nɔɔno anek ne, “Eeti we eet ceen Romen gi. Gitaz zin inoko ci arooŋ tuguwek naana nɔɔno o?”

²⁷ Ook ni alaani ci adikir noko ŋaati Pɔl, ma ako ajin nɔɔno anek ne, “Duwayan di, een niina Romen gi?”

Ma abedeke Pɔl nɔɔno anek ne, “Ii. Keen Romen.”

²⁸ Ma anek alaani ci adikir noko nɔɔno ne, “Baale naana ma ka kizi Romen e, karui guruc ci meel.”

Ma abedeke Pɔl nɔɔno anek ne, “Keen zin bar naana Romen o karitai ele.”

²⁹ Taman noko eelit takirnya ona agez Pɔl e otoŋit nɔɔno, makacin buk alaani ci takirnyawu noko anyawun ŋoliin, eeci agawun niini Pɔl eet ceen Romen, ma anyak buk niini ŋoliin giye baal acabi nɔɔno ziiyi e.

Abil Pɔl ol o roonnyo ŋuma

³⁰ Orooŋun ni alaani ci takirnyawu noko ka kojowa gi ci akolake ol o Juz Pɔl rooni o. Ma iitene co ɔɔga ziik o acabin Pɔl, ma aricanek alaate o ceez o Joowo kibeen ol o roonnyo dook kulute. Ooyi ni niini Pɔl, ma ako anyek nɔɔno kibil nɔɔgo kɔrgena.

23 ¹ Ma agelem Pɔl ol o roonnyo, ma azi ne, “Gɔtɔnɔga, kaga naana zinize can o, akom gi ci ger kagoon baayize onan dook ŋume o Joowo zee been waanico o.” ² Mazi azi noko, aricanek alaani o adikir ceeze o Joowo kazi Ananayas ol o ajɔŋɔz Pɔl ka korooyit nɔɔno otok.

³ Ma anek Pɔl nɔɔno ne, “Ŋaan buk tiŋeere arukin Jooi ineet noko. Inoko ineet alina ele cune o bitaala doon, aje eecito een gerze. Aave niina ŋina o ka payan aneeta lotinowe, maje bar niinalya alaŋ azoone lotinok giye o aricanek ol ka kuruktan niigi aneet.”

⁴ Maje ol o ajɔŋɔz Pɔl anek nɔɔno ne, “Ku adom alaan ci adikir ceeze o Joowo?”

⁵ Ma abedeke Pɔl nɔɔgo anek ne, “Gɔtɔnɔga, alaŋ kaga naana een niini alaan ci ceez o Joowo adikir o. Eeci azi warage o Joowo ne, Má adom alaan ci abal ol ugun.”

⁶ Mazi ako acin Pɔl ol o roonnyo ogen ol o Sajuzi, ogen buk ol o Parici, egerenyewun niini nɔɔgo enek ne, “Gɔtɔnɔga, keen naana Pariciwen. Baaba buk Pariciwen. Kaave naana roonnya ŋina o, eeci katu gi ci katin ol o adaai iŋaani bodo korogit.”

⁷ Taman noko mazi aduwa niini gi nico, adaŋtɔ ol ween Parici been Sajuzi. Makacin eŋertɔ ol o roonnyo. ⁸ Eeci goon ano ol o Sajuzi ne, “Akom ol ci bodo iŋaaz daayiza, ma akom buk toonnyak ci Joowo been vonjizok.” Maje ol o Parici dook atu niigi kaal ceen iiyu noko dook eel tɔ. ⁹ Ma agereny niigi ɔɔɔt ele, makacin ol ogen ceen Parici ci goon ademez lotinok itingazo jena, ma abeki niigi azi ne, “Akom gi ci ger kajowana eete nico. Bar karabɔŋ da didi azoozek vonjizi o Joowo nɔɔno. Karabɔŋ azoozek toonnyaiti ci Joowo, alaŋ kaga. Mazi abil noko, abon labak.”

¹⁰ Ma adaŋo niigi ɔɔɔt ele, makacin anyawun alaani o takirnyawu ŋoliin, ma abaaban azi ne, Bar bɔŋ tedec aŋuuk ol Pɔl zee makacin uruiyit kadaak. Zin giye nico iricanek niini takirnya ogin ka kɔɔt ola eecito ka kɔɔt kaarya niigi Pɔl ŋaatineen kooti nɔɔno ŋaa uneen abaayi.

¹¹ Ma baaline co iiya Manyi, ma aku abilnek Pɔl, ma anek ne, “Má aŋole looc. Inoko ize niina bacoi can Jerusalema ŋina. Karooŋnyin zin inoko bito buk izi bacoi can kuture o adikir kazi Rom.”

Arɔɔŋ ol kuruyit Pɔl kadaak

¹² Ma ŋeertine co urumtɔ ol ci Juz ogen ŋaatodoi, ma azɔɔz zɔɔz ci ka komonyci Pɔl. Ma aterket gi calaŋ niigi adayin maŋaan kuruyit Pɔl kadaak. ¹³ Ma ŋinaante anyak ol ci meel ayaŋ eet ram ci aduwa buk gi nico. ¹⁴ Ma avo niigi alaate o ceez o Joowo been alaate o adikir, ma avo anek nɔɔgo ne, “Koromta naaga dook terkeediin ci adɔi kak ŋaatodoi ka calaŋ kadayina zee ma karuka Pɔl kadaak. ¹⁵ Inoko zin niiga been ol o roonnyo itoontek otok alaan o takirnya o Rom ka kanyaayun niini igeet Pɔl ŋina. Uduktak nɔɔno enektek ne, Karooŋnya kijinta Pɔl bodo. Ka zin mā itoona niigi nɔɔno, ka kiiya komonyca naaga nɔɔno gɔla iŋaan kurumun niini igeet ŋina.”

¹⁶ Maje bar ŋeerti ŋɔɔni Pɔl iziiwun buk zɔɔz nico. Ook ni niini ceeze o takirnyawu, ma ako aduwak Pɔl zɔɔz nico. ¹⁷ Ma awa Pɔl alaan ci takirnyawu miliny, ma anek ne, “Biti di logo nico alaane unooŋ. Anyak gi ci arɔɔŋ kuduwak nɔɔno.” ¹⁸ Zin ooyi alaani nici nɔɔno alaane o adikir, ma ako anek ne, “Anekan eeti o acabje kazi Pɔl e ne, Kanyaayin logo nico, eeci anyak gi ci arɔɔŋ kuduwayin ineet.”

¹⁹ Agamun ni alaani nɔɔno aziit, ma akoyi ŋaatineen doon, ma ako ajin anek ne, “Gitaz ci arooŋ duwayan o?”

²⁰ Ma abedeke logoti nɔɔno anek ne, “Alote alaate o Juz arɔɔŋ ka kalabtawin ka kijintin ineet tiŋeere ka nyowozek nɔɔgo Pɔl kici bar ka kijinit bodo niigi nɔɔno juruŋ. ²¹ Bar zin má azii niina zɔɔz cineen o been neen, eeci anyak ol ceen eet ram ki biritok ci ka koroodi gɔla kereec nɔɔno. Ol nicigi aterket gi calaŋ adayin ma alaŋ awoden zee ma amony niigi Pɔl. Areyi niigi inoko ŋinaante, olla arooŋnyin ineet ka toon Pɔl.”

²² Enek ni alaani ci takirnyawu o nɔɔno ne, “Má aduwai zin eet oma bodo gi ci aduwakan noko.” Anyewun ni nɔɔno kɔtɔɔ.

Itoononek Pól alaan o kazi Vilek

²³ Ma awa alaani ci takirnyawu noko alaati ci miliny een ram, ma aku anek nɔɔɔ ne, “Eɲerta takirnya ceen eet amɔtɔ (200) ka kɔɔt kuture o kazi Sisiriya kibeen ɔl ci atɔt jɔmane een eet iyyu kamɔtɔ (70) been ɔl ci dilanyawu een eet amɔtɔ (200). Olotit kaal ugooc ka ɔtɔɔ ziiye ween tɔrkɔc tija. ²⁴ Aarya jɔmane koogi ka anycek Pól kɔtɔt. Uzuuti nɔɔɔ zee ma avɔ arumnyu alaan o kazi Vilek.”

²⁵ Eteyeedek ni alaani ci takirnyawu o warage alaan o kazi Vilek anek ne, ²⁶ “Aneeta Kaladiyas Lisiyas kitoonekin warage nico ineet Vilek o adiɲɲi abal looc. Rak ɔɔwa kazaayin. ²⁷ Agam ɔl o Juz eet nico, ma arɔɔɲ kuruyit kadaak. Mazi kazii eeti nici Romen gi, kɔrkɔrta been takirnya ogan, ma kavɔ keelana nɔɔɔ. ²⁸ Ma karooɲ kaga gi ci arɔɔɲ kurukti niigi nɔɔɔ kadaak o. Kooye ni nɔɔɔ ole o Juz roonnyo. ²⁹ Ma kicina akɔm niini gi ci ger agɔɔn ka waan kapawozeke nɔɔɔ daayizi, karabɔɲ een cabiin. Olla bar akɔlak ɔl nɔɔɔ rooni zooze ci akati lotinok ugeec doon. ³⁰ Zin kitoonekin ineet o, eeci arɔɔɲ kuruyit ɔl o Juz nɔɔɔ kadaak. Ma kuduwaya ɔl o akɔlak nɔɔɔ rooni ka kɔɔt kudukta niigi zɔɔɔ cineeɲ o ineet ɲuma ɲinaante.”

³¹ Utuguzɔ ni takirnya eo aduwaki alaani uneeɲ nɔɔɔ. Ma avɔyi Pól baaline nice ele kuture o kazi Antipatis. ³² Ma iitene co abada takirnya o awɔ zɔɔne. Maje o atɔt jɔmane idiceke niigi Pól. ³³ Ma avɔyi nɔɔɔ zee been kutur o kazi Sisiriya. Ma ɲinaante anycek niigi alaan o kazi Vilek warage o itoonyak, ma anyek niigi nɔɔɔ Pól buk. ^{34–35} Ma akɛep alaani nici warage nico, ma ajin Pól anek ne, “Akun niina looce jaɲ?” Mazi akɔ acin niini nɔɔɔ aku looce o kazi Silisiya, enek nɔɔɔ ne, “Ma avu arum ɔl ci akɔlak ineeɲ rooni o looc, ɲaan kaku kapai zɔɔɔ nico.” Iricanek ni niini ɔl ka kebeyit Pól ceenze baal eenyet Erod.

Akɔlak ɔl o Juz Pól rooni

24 ¹ Mazi akɔ adicai iinya ceen tur, ook alaani o ceez o Joowo adikir kazi Ananayas kuture ci kazi Sisiriya noko. ɔrkɔr niini been ɔl o Juz adikir kibeen eet ci gɔɔn apak zoozok kazi zaar ne Tertalas. Ma avunak niigi Vilek, ma avu aduwak nɔɔɔ zoozok ci akani Pól. ² Ma awa Vilek Pól, ma ɔɔba Tertalas zɔɔɔ o akɔlake niigi Pól rooni azi ne, “Alaan o adiɲɲi, een niina alaan ci ageny, ma abalet ɲinti wun juruɲ, ma kanyaka ganɔn. Ma agoon kaal ci abon meel loocowe cigaac noko. ³ Katalnana naaga kaal nicoko iinya dook, ma katalnin naaga ineet buk ɔɔɔt. ⁴ Alaɲ karooɲ zin kidica waɲi unun ka zɔɔzi, bar kalayin olla ineet ka ziik zɔɔɔ can kutur noko juruɲ. ⁵ Kojoktawo naaga eeti nici eet ci ger uulalet. Anyek niini ɔl o Juz kɔɔyɔkɔ viten nicoko dook. Ma een niini alaan o bor o atu eet o aku kuture o kazi Nazaret. ⁶ Ma buk ataman niini arɔɔɲ kanyek ceez o Joowo kizi gerze. Kagamta ni naaga nɔɔɔ. Ma karooɲnya kapakta nɔɔɔ lotinowe ogaacak. ⁷ Bar iyya alaani o takirnyawu kazi Lisiyas aamawet nɔɔɔ ɔyiza. ⁸ Ma iricanek niini ɔl o akɔlak nɔɔɔ rooni ka kivitayin ineet. Inoko tedec ma ajin niinalya eet nico, ɲaan ajowa kaal ci kakɔlaka naaga nɔɔɔ rooni o dook.” ⁹ Ma agama ɔl o Juz dook zɔɔɔ nico, ma azi ne, “Kaal nici dook zoozok ci aleemnyai.”

Aduwak Pól zɔɔɔ onin Vilek

¹⁰ Mazi anyek alaani o kazi Vilek Pól waɲi ci azɔɔzi, enek Pól nɔɔɔ ne, “Kagayin naana ineet nɔkɔ een eet o apai ɔl o looc nico irkitok ci meelik. Inoko zin katalne ɲaati kaduwakin ineet zɔɔɔ can o. ¹¹ Iinyaye baal een amonki ram ɔtɔ e kako Jerusalema ka kook kidiɲɲan Jook ɲinaante. Inoko mā ajin eet oma, aduwakin koca nɔkɔ. ¹² Ma ɲaan kicintan ɔl o Juz ɲaati kadaɲona ki ɔl koogi ceenze o Joowo. Ma ɲaan buk kicintan niigi aneeɲ ɲaati kakane ɔl ceezine o lotento, karabɔɲ een ɲaaman Jerusalema. ¹³ Ma akɔm buk nɔɔɔ bacok cigeec giye o akɔlakan niigi aneeɲ rooni ɲaatun. ¹⁴ Inoko zin kaduwakuɲ iigeet gi o gɔɔn kagoon naana. Kadiɲɲan gɔɔn Jook o jijiɲigaacak ɲaati kanowe gɔl o Yesu. Ma gɔl nico anyek niigi kizi vɔlɔɲ. Bar zin buk naana katu kaal dook o ayeedi lotinowe o Mosis kibeen waragenyaye o nyakanjanetu. ¹⁵ Kanyei zin buk naana tuwen ci abil kiyo cineeɲ o Joowa. Ma tuwen nici akati ɲaazi o katin ɲaani ɔl dook o abon kibeen ɔl o ger buk daayiza bodo. ¹⁶ Maje zin gɔɔn tup kataman naana ɔɔɔt karooɲ kizi ziniz cane o vɔɔr Joowa been ole ci deer o buk.

¹⁷ Baale kamalanɲ Jerusalema ɲina irkitok oogi. Zin kabadaya bodo kanyaai ɔl ogan Juz guruc, ma buk kakun ka kataap Jook. ¹⁸ Koowa ni ceenze o Joowo ka kook kutugu keer o taabinto. Mazi kako kataabi Jook, ɔt ojoktawan ɔl o Juz ogen ɲinaante. Akɔm ɔl ci meel ci karomena ki aneeɲ ɲinaante, ma akɔm buk ɔl ci agereny. ¹⁹ Bar ɲinaante anyak ɔl ceen Juz ci avu looce o kazi Asiya. Abon zin buk inoko niigilya avu ɲina ka kɔkɔltayan rooni ɲaatun, mā anyak gi ci ger kagoon. ²⁰ Karabɔɲ anyi ɔl ci aavtiz ɲina noko kuduktayin ineet, mā anyak gi ci ger ajowa ɲaatan iitene baal kaave ole o roonnyo ɲuma e. ²¹ Kaga naana gi codoi ɲɔr nɔkɔ ci baale kaduwa nɔɔɔ ɲuma ɲaati kagernye kaneke ne, Apayekaj niiga aneeɲ gerzitin waanico o, eeci katu gi ci katin arogni bodo ɔl o adaai.”

²² Maje Vilek agawun gi o akati gɔl o Joowo juruɲ. Alamun ni niini rooni. Ma anek nɔɔɔ ne, “ɲaan kapai rooni cunooɲ o iiten ci akuni alaani o takirnyawu kazi Lisiyas.” ²³ Ma iricanek niini alaan o miliny takirnyawu o abek Pól ka kozooti nɔɔɔ juruɲ, ka buk gɔɔn kanyek waɲi ci avɔyi bitaala, ma anyek laɲotigin kanyaaktak nɔɔɔ kaal ci arɔɔɲ niini labak.

Abil Pól ɲume o Vilek kibeen Dersila

²⁴ Ma iinyaye ogen iyya Vilek kibeen ɲaa onin een Juzen kazi Dersila. Ma itoon niini ɔl kook kanyaaktak nɔɔɔ Pól. Ma avu azii niini nɔɔɔ ɲaati aduwan zɔɔɔ o akati tuwen ɲaati Yesu Kiristo. ²⁵ Ma azɔɔz Pól zɔɔɔ ci akati gɔl o anyeke eeti ele kobona ki gɔl o agami eeti ele kaale o ger been gɔl o ka kapayi Jooi ɔl katin. Mazi akɔ azii Vilek kaal nicoko, anyawun ɲoliin ɔɔɔt, ma anek nɔɔɔ ne, “Bitɔ zin. Kiziiwa. Mā kanyei waɲi, ɲaan bodo kawanin.” ²⁶ Bar Vilek ecin arɔɔɲ Pól ka waan kɔtɔlɔk nɔɔɔ guruci. Ma giye nico awa gɔɔn niini Pól kiiya kɔzɔɔzɔ ki nɔɔɔ tup.

²⁷ Mazi akɔ adicai irkitowa ceen ram, ook Vilek ɲaaman, ma aku arigiz nɔɔɔ alaani ci kazi Porcas Vestas. Maje Vilek waanice alaɲ arɔɔɲ koboroc Pól sijina, eeci arɔɔɲ niini ɔl o Juz ka kereezit nɔɔɔ.

Abil Pól ɲume o Vestas

25 ¹ Mazi akunak Vestas kutur o kazi Sisiriya, amon ɲinaante iinya iyyu nɔkɔ. Ma adicek akɔ Jerusalema. ² Ma ɲinaante ɔkɔltak alaata o adikir ceenze o Joowo kibeen alaati o Juz Pól rooni ɲaati Vestas. ³ Ma ilalek niigi Vestas ka kitirit nɔɔɔ kanyek Pól kook Jerusalema, eeci arɔɔɲ niigi kɔɔt kedetit Pól gɔla ka kuruyit kadak. ⁴ Bar abedeke Vestas nɔɔɔ anek ne, “Acabje Pól kuture o Sisiriya. Ma buk naanayla kamiire kako ɲinaante kataman. ⁵ Anycaɲ alaati ugooc ɲina kɔrkɔrta ki nɔɔɔ koota Sisiriya ki kɔɔt kɔkɔltak eet nico rooni mā da anyak gi ci ger.”

⁶Ma amon Vestas njinaante iinya turge karabonj een amoto. Otoo ni niini ook Sisiriyakti. Ma itene co ook ceeze o roonnyo, ma anyek ol kanyaaktak Pol rooni.

⁷Mazi ako arum Pol ceez o roonnyo, itingazo ol o Juz baal avu Jerusalema e jena, ma aliya noono. Ma akat niigi Pol kaalyane ci ger meel, bar akom bacok ci zoozok cigeec noko. ⁸Adajun ni Pol zooz cineej o. Ma anek Vestas ne, “Akom gi ci ger kagoon ci akati lotinok o Juz, karabonj een ceez o Joowo, karabonj een alaan o Rom adikir.”

⁹Bar giye o aronji Vestas ol o Juz ka kereezit noono, ijinun niini Pol enek ne, “Agama njiaati akoye Jerusalema ka kook kicine zooz cune o njinaante?”

¹⁰Ma abedeke Pol noono anek ne, “Akom. Agano njiaatan njiaati apaye rooni nico niinalya njina. Eeci rooni nici rooni ci alaan o Rom adikir. Ma akom gi ci ger kagoonei naana ol o Juz. Buk niinalya aga gi nico. ¹¹Mate da kabac naana lotinok, ma kutuguwa gi ci ger, kaganona waan njiaati apawonekan daayizi, ma alaj kavir giye nico. Bar mazi akolakan niigi aneet rooni gaga, alaj koca abon njiaatun karabonj een eete oman njiaati anyaan kootan ol nici. Mazi abil noko, agano koca njiaati apayi zooz nico alaane o Rom adikir.”

¹²Enico otongomto Vestas been ol ogin atirit noono roonnyo. Ma ebedeke niini Pol anek ne, “Inoko ma amaace niina roonnye nico, ma aroonj bito alaane o Rom adikir, abona labak. Njaan ako njiaatin.”

Abil Pol njume o alaan o kazi Agiripa

¹³Ma iinyaye ogen iya alaan o kazi Agiripa been njaa onin kazi Bernis avunak niigi Sisiriya ka kivita katala alaan o colai kazi Vestas. ¹⁴Mazi avo amon njinaante iinya iyu, oobewun Vestas noogo zooz o Pol. Anek ne, “Anyak njina eet ci acabje, ma oonjek Vilek looc noono sijina. ¹⁵Mazi kako iiten baale Jerusalema, okoltayan alaata o Juz kibeen alaata o adikir ceeze o Joowo rooni ci eet nico. Ma aroonnyan niigi aneeta ka kapayek noono gi ci ger. ¹⁶Ma kanei naana noogo ne, Ma keere ci ol o Rom abon goon kanyaa eet o akolak ol rooni kiya kurumto niini kibeen ol ci akolak noono rooni o, ka buk kojowa niini gol ci aduwan zooz cin. Ma alaj abon njiaati oonjane ol eet ci akolyak rooni o njiaan kutuguwe noko. ¹⁷Mazi avo avu alaata nica njina, njaa kaavu naana njinti reen. Kiya iitene ci ano goon o taman noko, ma karicanei takirnya koot kanyaakta eet nico. ¹⁸Ma njiaaz ol ci akolak noono rooni noko jena. Ma bar kabaaban ecan kazi ne, Coma akolak niigi noono rooni kaale ci ger agoon. Bar alaj akola niigi rooni ci abil noko.

¹⁹Bar da niigi olla adajon zooz ci akati Jook uneej, kibeen buk zooz ci akati eet o kazi Yesu baal adaai e. Maje bar Pol azi ne, Njaan Yesu arogi. ²⁰Ma enice olla kabaranje gole ci ka kojowai keej ci zooz nico juruj. Kijina ni Pol ma agama niini kook Jerusalema ka kook kapaye rooni cine o njinaante. ²¹Bar amaac niini zooz can o. Ma azi ne, Agano njiaati azooni ol noono zee ma itoononek alaan o Rom adikir ka kook kapak zooz cin o. Zin kiricaneya ol ka kebeyit noono zee ma katin kitoonei naana noono alaan o Rom adikir.”

²²Enek ni Agiripa Vestas ne, “Karooj di kiziik eet nico naanalya.”

Ma abedeke Vestas noono anek ne, “Njaan azii noono njeeere.”

²³Ma njeeere iya Agiripa kibeen njaa onin kazi Bernis. Ma atalna ol noogo dijdjonta. Ma avu avo niigi kibeen alaata o takirnyawu adikir kibeen alaata o abal kutur ceeze o aloten ol o roonnyo. Ma aricanek Vestas takirnya ka kanyaakta niigi Pol. ²⁴Izi ni Vestas ne, “Alaan Agiripa kibeen igeet ol dook o aavtizu njina, icinit di eet nico. Ol o Juz abaak njina kibeen Jerusalema akolak niigi dook noono rooni njiaatan. Agereny niigi azi ne, Abon adaai eeti nici. ²⁵Maje bar zin naana akom gi ci ger kajowa ci agoon niini ka waan kagantoi ki daayiz. Zin giye o aronji niini kook kapawoi zooz cine o alaane o Rom adikir, kagama zooz cin o ka kitoonek noono alaan nice. ²⁶Maje bar naanalya akom gi ci ger kajowa njiaatin ka waan keteyeedek alaan nice. Zin inoko kanyaayuj naana noono igeet dook, ma zin ricik ineeta Agiripa. Kanyaakuuj zin o ka kijinit naaga dook kola njina coma kajowa gi ci akati noono ka keteyeeet. ²⁷Kabaaban alaj agano njiaatan njiaati kitoone eet ci acabje njiaan kojoyai gi ci akolaki ol noono rooni o.”

Aduwak Pol zooz onin Agiripa

26¹Enek ni alaan ci kazi Agiripa o Pol ne, “Kanyin ineet waji ci ka zozi.”

Odonj Pol aziit, ma azi ne, ²“Alaan Agiripa, katalne naana iiten nico otot njiaati ka kozoozi zooz ci akolakan ol o Juz aneet rooni volona njiaatun o. ³Eeci aga niina keerane o Juz ki danjon uneej otot. Kalayin zin ineet ka ziiyan zinize ci alal.

⁴Agayan ol o Juz dook aneet baayiz can njiaan baale keen logoz e zee been inoko o. Aga niigi baayiz onan dook looce onan been Jerusalema. ⁵Aga niigi baayiz onan irkitok baal keene Pariciwen e dook, bar alaj aronj kudukta zooz ween didi. Ma zin ol o Parici neen o goon agam lotinok otot kujuk ol oogi. ⁶Zin inoko kabil naana roonnya njina o, eeci kare naana tuwenta terkediin baal aterkedek Jooi jigitigacak. ⁷Buk boryowa ogaacak een amoto ram adinjnan Jook waazin ki baalin, ma areyi niigi ka kojokta terkediin nico. Alaan o adinjnan, zin giye o katuwene. Ma karewe naana terkediin nico okoltayan ol o Juz rooni. ⁸Mayo zin buk niiga ol ci aavtiyu njina noko alaj atuyu zooz ci njiaani Jooi ol daayiza o naa?

⁹Baale naanalya kabaaban kazi ne, Abon kamarnine ol o atu Yesu o Nazaret, ma kagoone kaal ci ger. ¹⁰Zin didi baale kutuguwa kaal ci ger Jerusalema otot. Anyan goon waanice alaata o adikir ceeze o Joowo doyiz ci kako kagame ol ci atu Yesu, ma kari sijin. Mazi goon waanice apayek ol noogo daayiz, kagama. ¹¹Lak ci meel ger kaminanje noogo ceezine o lotento. Ma kagidi noogo ka kadaarit tuwen uneej. Ma kabornei noogo nonj otot, makacin buk waanice koowa kuturyowe ci moden oogi ka kook kigit noogo njinaante.

Aduwa Pol gol o agaman niini Yesu

¹²Zin gi nico neen o kakoye baale kuture o kazi Damacik. Ma anyan alaata o adikir ceeze o Joowo warage ci kanyaye doyiz, ma aricanekan niigi aneet kook kigit ol njinaante. ¹³Alaan Agiripa, iitene nice mazi kawo gola waaz, kacin vooritin ci aku tammu tadana ci ataran looc otot kujuk ii. Ma ataranan vooritin nici aneet kibeen ol o korkorya. ¹⁴Ma kiinana naaga dook, ma kazii molok ci azooskan aneet zooze o Juz anekan ne, Col, Col, yalaminjan dim nokon? Adei ele maany giye calaj aziinjan o. Inoko zin ibilu niina kiyo tanj o goon ajurak oonnyak ma kadak nyalaado ka kitiya o.

¹⁵Ma kajin naana noono kanei ne, Ineet njeneen Manyi?

Ma abedekan niini aneet anekan ne, Aneeta Yesu o goon amarnine niina o. ¹⁶Inoko zin tija je. Kayelzeken ele o ka kejerawin izi gabaren can been bacoi ci ka duwak ol gi ci ona acin noko kibeen kaal ci katin kayelekin ineet. ¹⁷Njaan goon katin keelanin ineet ole o Israyil kibeen ole ween moden kitoonekin ineet noogo. ¹⁸Karoojnyin ineet ka bito kol kebere ugeec, ka badai noogo muura kivitak vooritin, ka badai noogo doyize o Loryento ka kivitak Jook, ka zin kaaryai onje ugeec tuwente o atuyan niigi aneet, ka kojokta buk niigi njintineej ole o njera Jooi.

Aduwa Pól liqliqon onin

¹⁹ Zin niina alaani Agiripa, kiziiwa naana gi o kacin akunakan tamma. ²⁰ Ma giye nico kook kuuwawa rak oowa kuture o kazi Damacik kibeen Jerusalema been looce o Judiya dook been ole ween moden. Ma kuuwayizeya nōōgo gi ci ka kabadai niigi onene ugeec kivitak Jook, ka kutuguzo niigi kaal ci abon ci ayelza badaan uneen. ²¹ Zin zooze nico agamtan ol o Juz ceeze o Joowo, ma arōōj kuruktan niigi aneeta kadaak. ²² Bar zin Jooi eelawan iiten nice, ma azuunan zee been inoko o. Zin kabilnekuŋ naana njina inoko o ka kuduwayuŋ igeet dook ol o adikir ki o miliny buk kaal nicoko. Ma gi ci kaduwa noko gi baal aduwa Mosis been nyakananet dook e ele neen. ²³ Azi baale niigi ne, Katin apirna Kiristo o ka kitoona Jooi. Ma niini eet o ka kitiŋa daayiza oowa neen. Uuwayek katin niini ol o Juz kibeen moden gol ci ka kojoktai niigi roget. Ma gi nici atobō ŋaatineen kibeen vooritin.”

²⁴ Mazi ŋaan azōōz Pól nōkō, egerenyek Vestas nōōnō anek ne, “Pól, aamnyin maŋoni. Anyin ineet demziin cune ademzine oōōt o kaamin maŋoni.”

²⁵ Ma abedeke Pól nōōnō anek ne, “Alaan onan, alaŋ aamnyan maŋoni. Kazooz naana zōōz ceen didi. ²⁶ Alaani Agiripa, koobekin naana ineet kaal nicoko moozete onan dook o, eeci aga niina kaal nicoko. Bar kane agawu niina nōōgo dook, eeci kaal nici alaŋ baale agooni roodinta. ²⁷ Ma zin kagayin nōkō atu niina kaal baal ayeet nyakananeta e. Alaŋ een neen?”

²⁸ Ma abedeke Agiripa Pól anek ne, “Arooŋ dim nyan kizi Kiristan waŋe ci miliny noko?”

²⁹ Ma abedeke Pól nōōnō anek ne, “Mayo nuun een waŋi ci miliny, karabōŋ een ci appe, kajinekin ineet Jook ka coma niina been ol dook ci aziŋnan aneet njina noko eelnu kiyo naana o. Bar zin ka olla kizi cabiin doon calaŋ acabin niigi buk.”

³⁰ Itiŋgazo ni alaani o kazi Vestas ki alaani o kazi Agiripa o ki ŋaa onin kazi Bernis been ol o oŋkōr ki nōōnō dook jena. ³¹ Mazi avō adun niigi, izito ne, “Akōm gi ci ger eeti nici ka waan kagantōi niini ki cabiin, karabōŋ een daayiz.” ³² Ma anek Agiripa Vestas ne, “Mā da waan calaŋ arōōj niini rooni cin o kiroone alaane o Rom adikir, abon waan kōōga nōōnō.”

Atōt Pól kavool ci akō Roma

27 ¹ Mazi akō agamnyai zōōz ci ka kitoonteket niigi ageeta Italiya kavoolo o liilu, anycek niigi Pól been ol ci acabje oogi eet o kazi Juliyas. Ma eeti ci kazi Juliyas noko abal takirnya ci Rom kazi zaar cigeec ne Takirnya o Alaani o Rom. ² Kotooda ni naaga kavool ci ol o Adamitama ci arōōj kook kuturyowe o eel liiltoga looce o kazi Asiya, ma kawoya. Korkorya ki eet ci kazi Aristarkos ceen Masidoniyan. Aku niini kuture o kazi Tesalonika. ³ Ma iitene co kurumta kutur o kazi Sidon. Maje Juliyas abona ŋaati Pól oōōt, ma anyek nōōnō kook kicin laŋotigin ka kook kanycek niigi nōōnō kaal ci arōōj. ⁴ Mazi kadiceka ŋinaante, ook itirginyek ŋōōti ci appe oōōt, makacin konyokontozeya libir o looc o aleya maama kazi Sipras o akōm ŋōōt ci appe ivaan. ⁵ Ma kabaayiza liil o looc o kazi Silisiya been Pampiliya, ma kavoya kuture o kazi Mira abil looce o kazi Lisiya. ⁶ Ma ŋinaante ojowa Juliyas kavool ci aku kuture o kazi Alikzandariya ci akō looce o kazi Italiya. Ma atoodeket niini ageeta kavool nico.

⁷ Ma kawoya liila kidicilim iinya koogi, eeci atirginye ŋōōti kavool. Ma kawoya zee makacin kurumta kutur o kazi Kinidas. Ma atirginyet ŋōōti nōkō, ma alaŋ kanimnya kidiceya gole nico. Kōnyōkōnta ni bodo libire o aŋōōzō ki looc o kazi Karit o alaŋ ŋōōti ivaani oōōt, ma kadiirya njino kazi Salomoni. ⁸ Ma kawoya ŋaati kajoŋoza dōwōn, ma akonyet ŋōōti oōōt zee makacin kurumta njino kazi Gōgōl ci Abon. Ma gōgōli nici aŋōōzō ki kutur o kazi Laseya.

⁹ Ma kamona ŋinaante ŋinti wun kal zee makacin iiya tagizi, ma appe ŋōōti oōōt ele, ma alaŋ agano ŋaati waan kadiceka keronye onaaŋ zee makacin idicai iiteni o gōōn agōōni ol o Juz taabinet o aaryane oŋe. Itilo ni Pól ol dook kavoola anek ne,

¹⁰ “Lōgōze, kacin ri naana keroni cinai noko ŋaan gerze nōkō. Iima alibe kavoolo nici, ma akoloni ijo nico, ma adaai ol buk.”

¹¹ Maje bar eeti o wolinto kibeen eet o kavoolo akat Juliyas calaŋ azii niini zōōz ci aduwa Pól o. ¹² Maje gōgōli nici alaŋ abon ŋaati waan ka aavtiye rak niigi ŋinaante tagiz dook. Ma arōōj ol ci meel ŋaatineen kōōōzō kōōt kuture o kazi Venosiya ka kōōt kabaayito tagiz dook ŋinaante. Ma Venosiya gōgōl ci aavi looce o kazi Karit. Abil niini libire ci akō ki nyagi e. Ma alaŋ ivaan ŋōōti oōōt ŋinaante tagiza.

Loomo ci appe liila

¹³ Mazi ivaan ŋōōti ci miliny aku libire ci tenetu o, abaabanit ol gol ci ka kurumti niigi Venosiya. Ma oōōga ziik o gōōn acabin kavooli ka kibili. Ma avō kavoola avō looce nice ŋaati aŋōōzi dōwōn. ¹⁴ Bar ŋintimiliny nōkō ivaana ŋōōti ci appe ci aku looce nice. Ma ŋōōti nici ŋōōt o gōōn azi ol ne ŋōōt o jenu. ¹⁵ Ivaan ŋōōti nici oōōt, ma iiciwō kibeen kavool, makacin oōōmeyeret weet, ma kakonyeka kavool libir ci akōyi ŋōōti o olla kōōyōōt ŋōōti doon. ¹⁶ Mazi kavō kayanŋya viriviro o miliny aliya maama kazi Cada, aŋaŋane ŋōōti kidicilim. Ma kuukona kibeen ŋōōt zee makacin kodōŋteya kavool o miliny agurut gōn gōn o adikir tadana. ¹⁷ Ma kamacuceka kavool ci adikir o loronya ka kōōk. Zin oōōŋlōte ol looc abaaban niigi ane, Coma tedec agamnyi kavooli dōwōne o looc o kazi Libya. Ma aara niigi rum o gōōn ayōōti ŋōōti kavool, ma anyek kavool kitiiri kōōyōōt ŋōōti doon. ¹⁸ Zin ŋaan amena ŋōōti nōkō, ma iitene co ujuktek niigi ijo oogi liil. ¹⁹ Ma bodo iitene ci aalna o ujuktek niigi kaal o gōōn alinliŋi ol kavoola liil. ²⁰ Ma kawoya iinya ci meelik calaŋ kacina ii kibeen monyony, maje ŋōōti amena ivaan oōōt nōkō. Ma kabaabana kaziya ne, “Oōōma gol ci keeltaya eleeti.”

²¹ Mazi avō anyak ol iinya ci meel calaŋ adayin, itinŋa Pól nōōgo njuma, ma azi ne, “Lōgōze, inoko da iziiktaŋ aneet, ma kaavtiz Karita ebaal kaduwakuŋ igeet e, ŋaan waan kojokta piryakzet, ma ŋaan waan kokolozit kaal ci meelik nōkō. ²² Inoko zin anycek zinzeeti kodoyit. Eeci akōm tedec ŋaatunoŋ eet ci adaai kina, bar olla tedec akō alibe kavooli doon. ²³ Bilija iyyayan toonnyaiti ci Jook o kalinliŋonei, ma kadiŋdiŋan naana nōōnō. ²⁴ Ma anekan ne, Pól, mā aŋole looc. Arooŋnyin Jooi ineet bitō bil njume o alaani o Rom adikir. Ma giye o areezin Jooi ineet, ŋaan arogoz niini ol dook kavoola. ²⁵ Zin abon anyeku zinzeeti kodoyit. Eeci katu naana Jook, ŋaan agōōn niini kaal dook eo aduwakan aneet. ²⁶ Olla zin tiŋeere akō alip ŋōōti kavool cinai noko ŋaaman.”

Liben o kavoolo

²⁷ Ma kanyakta iinya amonki wec ci amacucet ŋōōti liil o kazi Adriya keŋa calaŋ kacina dōwōn. Ma baalin keŋa abaabanit ol o wolinto anō ne, Coma oŋōōzit dōwōn. ²⁸ Ma ajukek be ci acabonek lorōnti ci wun liil keŋ ka kayabiziti maam, karabōŋ ŋaan abiz liili, karabōŋ oŋolane. Mazi akō acin niigi loro nico, ajowa een mitiret eet ram. Bodo ŋintimiliny nōkō ajukek be nico liil, ma acin enico izi mitiret eetom kamōtō. Zin enico agaac niigi oŋōōzit dōwōn. ²⁹ Enico anyayit niigi ŋoliin oōōt anō ne, “Coma ayizonek tedec kavooli ŋinten biyen kilibe.” Acaptek ni ziik ci adiŋdiŋ een wec kavool vorta, ma ajukek liil eecitō ka kōōtō kavoolo

kidicilim. Ma anjarye niigi ka kiiya jeeretini taman. ³⁰ Oroojit ni ol o wolinto kinyit kudunit kavoola, ma arek kavool o miliny liil, ma bar alaba ol anek ne, “Kavɔ kareka ziik ci adiɗɗiŋ oogi kavool ɔɔ ka kalam.”

³¹ Bar anek Pɔl takirnya kibeena alaan uneer ne, “Mā anyeku ol ci wolinto o kudunit kavoola, alaŋ oca niiga arugnu.” ³² Eteedit ni takirnya loro ci acabin kavoole ci miliny o. Ma anyek kavool kiriikti maama.

³³ Mazi ako amaman tammu, ilalek Pɔl nɔɔgo dook ka kadaktɔ. Anek nɔɔgo ne, “Ŋaan baal aavtiyu iinya amonki wec zee been inoko o, ŋaan adaktɔ. ³⁴ Kilalekuŋ zin igeet adaktɔ ka odoyit. Kaga naana akom tedec eet codoi ŋaatunooŋ ci ako adaai kina.”

³⁵ Mazi ako odotiz Pɔl giye nico, odoma ni dokoc, ma anyek Jook zany nɔɔgo ŋuma, ma atet dokoc nico, ma adak. ³⁶ Agamit ni niigi dook zinzeeti, ma adake. ³⁷ Maje naaga dook kavoola keegina eet amonki iyu kamoto ki tiin torkonom. (276) ³⁸ Adaktɔ ni ol zee mazi anyer, odomta niigi labi dook kavoola ujuktek liil ka kɔvɔlvɔl kavoole.

³⁹ Mazi ako aaliz tammu, icinit ol o wolinto dɔwɔn, bar alaŋ aga dɔwɔn ci looc jaŋ. Bar olla acin niigi gɔgɔl ci abon ŋaati kutul een kazac, ma abaaban niigi anɔ ne, Abon ako agamnyi kavooli ŋinaante. ⁴⁰ Eteedit ni niigi loronya o acaboneke ziiya o adiɗɗiŋ kavool vurma ka kiitazak ziiya boloc. Ma buk ɔɔga loronya o acabin keen o wolinto ka kotowolek kavool dɔwɔn. Ma adon rum o ayɔɔti ŋɔɔti kavool kavool ɔɔwa, ka kotoyootek ŋɔɔti kavool dɔwɔn. ⁴¹ Bar ŋintimiliny nako izi kavooli kegez kazace ci eel liil keŋa ŋaan kurum dɔwɔn. Ma agam kazac kavool ɔɔ calaŋ anyek kotɔɔ. Ma apalpalanniyak maama kavool ɔɔɔt, makacin ilibe kavool vurut.

⁴² Oroojit ni takirnya kuruyit ol o acabje dook kadaayitɔ ka calaŋ ariitonek niigi dɔwɔn, ma avir. ⁴³ Maje Juliyas arɔɔŋ ka korogoz Pɔl. Alamun ni niini takirnya calaŋ agɔɔn nako. Ma aricanek niini ol o aganek riiti dook kiitazak liil rak ɔɔwa ka kitiirizo kɔɔt dɔwɔna. ⁴⁴ Maje ol ogene ka koneec nɔɔgo ŋaati ariiti niigi keene ona alibjai kavoola e. Zin gole nico kurumta naaga dook dɔwɔn yaak.

Aavi Pɔl Looce o Kazi Malta

28 ¹ Mazi kavɔ karumnya dɔwɔn yaak, uduktayet ol zaar ci looc nico kazi ne Malta. ² Ma atalnanet ol ci abaak ŋinaante o ɔɔɔt. Maje tammu atiiil, ma alal looci ɔɔɔt. Ma avaadeket niigi ageeta goo ci ka kaavtiya. ³ Ma ako alota Pɔl areema ci ka karek goo nico. Mazi aku arek niini areema nicoko goo, uduna kowat areemaye nicoko, alaŋana goo, ma adak kowat nico Pɔl aziit ɔɔɔt, ma arumuz nyigit calaŋ aduŋna. ⁴ Mazi acin ol o abaak ŋinaante aluconek kowat Pɔl aziit, izito ne, “Eeti nici didi inoko eet ci amony ol. Mayo nuun ŋaan kadaak niini liila o, alaŋ tedec anyek Jooi o cacinto nɔɔnɔ korok.” ⁵ Maje bar Pɔl arurut aziit, ma iinak kowat goo, ma alaŋ agoonek nɔɔnɔ gi ci ger. ⁶ Ma are ol nɔɔnɔ ka kiiiv aziiti, karabon bar iina taman kadaak. Mazi ako areyi niigi ŋinti wun, ma akom gi ci ger agoononek nɔɔnɔ, abaabanit bodo izito ne, “Eeti nici Jook gi.”

⁷ Maje korogjowa o Publiyas ween alaan o looc nice ajone ŋaati kaavtiya o. Ma atalnanet niini ageeta ɔɔɔt, ma katikena ŋaatin, ma kaavtiya iinya iyu. ⁸ Maje iinyaye niceke baati Publiyas amɔɔr ɔɔŋ ceeza abarit ele, ma awowek gɔl. Ook ni Pɔl ŋaatin, ma ako anjaryonek ŋaati ataadeke nɔɔnɔ azeen, makacin izi maya. ⁹ Mazi ako agooni gi nico nako, ivita ol dook o amɔɔr looce nice, ma arogoz Pɔl nɔɔgo. ¹⁰ Ma anyet niigi ageeta kaal ci meelik adiziket. Mazi ka kotooda kavool kotooza, anycet buk kaal ci ka keeranta.

Urum Pɔl Rom

¹¹ Mazi kavɔ kadicana nyelowe iyu, kotooza kavoole ci aku kuture o kazi Alikzandariya. Kazi kavool nico zaar ne Joowane ween Code. Acabje kavoole nico liiltoga nyelowe o tagizo dook looce nice. ¹² Koota ni zee ma kavɔ karumnya kutur o kazi Sirakus, ma kaavtiya ŋinaante iinya iyu. ¹³ Bodo ŋinaante kidiceya zee ma kavɔ karumnya kutur o kazi Regiyam. Ma iitene co ɔkɔla ŋɔɔti ci tenetu o. Kidiceya ni. Mazi een iinya ram kurumta kutur o kazi Putoli. ¹⁴ Ma ŋinaante kɔɔt kojoktawa ol ci tuwento oogi, ma alamnyet niigi ageeta komonta ŋaatineer iinya torgerem. Enico kidiceya koota kuture o adikir kazi Rom. ¹⁵ Mazi avɔ aziijnet ol o tuwento abaak Roma, urumteyet gɔl melegenya o Apiyas. Maje ogen arumeket gɔl ŋaati anyak ceezi ci dayiino een iyu. Mazi ako acin Pɔl nɔɔgo, anyewun Jook zany, ma anyek ziniz kodok.

Aavi Pɔl Roma

¹⁶ Mazi kavɔ karumnya Rom, anycek ol Pɔl kabaak ceeze cin doon koromte ki takiren ci abek nɔɔnɔ. ¹⁷ Mazi ako adica iinya iyu, otowa niini alaati o Juz kuture nice ka kivita kulute. Mazi avɔ alote, enek niini nɔɔgo ne, “Gɔtonoga, ako nuun zee maŋaan kutugu gi ci ger ole ogaac kibeena keeranene ogaac baal anyet jigitigaac e, acabjan niigi aneet Jerusalema gaga nako, ma anyakaan niigi aneet alaati o Rom. ¹⁸ Mazi avɔ ajinan ol o Rom, ɔkoma gi ci ger ajowa niigi ŋaatan ci ka waan kagantoya ki daayiz. ¹⁹ Bar mazi ako abor ol o Juz gi o ka koborocɔi naana, kuduwaya alaan ka kitoonawan Rom ŋina ka kiiya kicin zɔɔz can o alaani o Rom adikir. Alaŋ zin bar kagoon gi nico o ka kɔkɔlak ol o Juz rooni. ²⁰ Gi zin ci karoŋ kurumtoi ki igeet o neen, ka kuduwayuŋ gi nico. Inoko zin kacabje naana giye ci akati zaar o Kiristo o are ol o Israyil dook nɔɔnɔ tuwenta.”

²¹ Ma anek niigi nɔɔnɔ ne, “Ŋaan kurumtet ageeta waragenya ci avu Judiya akanin ineeta. Ma ŋaan buk kiziiikta ole ogaac avunaket ŋinaante kaviyak ci ger akanin ineet. ²² Bar zin inoko karoŋnya ka kiziiikta baabaninok cugun o, eeci kagaya naaga loocok dook azɔɔz ol kaal ci ger akati ol o atu Yesu.”

²³ Aryek ni niigi iiten ci ka kurumtoi ki Pɔl. Mazi aku iiten nica, ivita ol ci meelik, ma avu arumɔ kibeena Pɔl ŋaao gɔɔn aave niini. Ma azɔɔz ki nɔɔnɔ, ma oobek niini nɔɔgo zɔɔz ci akati baliin o Joowo ii gil. Arɔɔŋ ka keteeza nɔɔgo zooze o akati Yesu ŋaati aduwaki niini nɔɔgo lotinok o Mosis kibeena kaal o ayeet nyakananeta. ²⁴ Makacin agamta ol ogene ŋaatineer zoozok nicoko, aje ogene alaŋ atu. ²⁵ Ma adanɔ niigi maany zooze nico ŋinti wun, ma azaacek bodo Pɔl nɔɔgo zɔɔz ci anek ne, “Aduwak baale Vɔŋizi o Joowo nyakanane o kazi Izaya jigitugooz zɔɔz ci aleema. ²⁶ Azi baale niini ne, “Bitɔ enek ol nicoko ne, Aziiknu gɔɔn tiŋeere niiga kaal iini, ma buk acinu keberen, bar alaŋ agayu keŋti cigeec nako been neen. ²⁷ Eeci ol nicoko bakbaye zinzeeti, Ma adiiit iin ugeec ka calaŋ aziikne. Ma amot kebere ka calaŋ acine. Mate waan calaŋ agɔɔn niigi nako, acine waan, ma aziijne. Ma arek waan kaal nicoko zinzeeti ugeec. Ma avunakan aneet, ma waan karuguz naana nɔɔgo.”

²⁸ Ma vurma enewun Pɔl nɔɔgo ne, “Abon zin agayu niiga inoko itoonek Jooi zɔɔz cin rogeto noko moden. Bar zin tiŋeere azii niigi.” ²⁹ Enico mazi avɔ azii niigi zoozok nicoko, ɔɔzɔɔ. Ma avɔ adanɔ niigi maany zooze nico ɔɔɔt ele.

³⁰ Ma abaak Pɔl Roma irkitok ram ceeze ci aruweke niini ol guruc. Ma atalna niini ŋinaante ol dook o avu acin nɔɔnɔ. ³¹ Ma uwayek niini ol zɔɔz o akati baliin o Joowo, ma ademzek nɔɔgo zɔɔz o akati Manyi Yesu Kiristo. Ma azɔɔz niini moozete onin dook, ma akom eet ci alam nɔɔnɔ zɔɔza.